

Liahona



Unsaon Nako Pagtabang?

Kon Ang Mga Minahal
Mobiya sa Simbahan,
pahina 30

Pagkat-on gikan Niadtong
Kinsa Mibalik,
pahina 26

Sa Unsang Paagi ang Pagsabut
sa Kasaysayan sa Simbahan
Makatabang, pahina 12

ANIA
DINHI ANG
SIMBAHAN






Punta Arenas **Chile**





LITRATO GIKAN SA GETTY IMAGES

Ang Simbahan sa Chile lig-on, gikan sa mga disyerto nga lungsod sa amihanang ngadto sa metropolitan sa Santiago diha sa sentro, ngadto sa Punta Arenas stake didto sa habagatan, ngadto sa pito ka mga ward ug duha ka mga branch niini. Ania ang pipila ka kamatuoran mahitungod sa Chile ug sa Simbahan didto:



1956 Ang unang kongregasyon naorganisar

1972 Ang unang stake naorganisar

1988 Ikaupat nga nasud sa kalibutan nga moabut sa 50 ka stake

1994–96 26 ka bag-ong mga stake gimugna





Gikan sa *Liahona*

Ang sulod niini nga isyu nahimo na sa wala pa ang COVID-19 pandemic. Ang uban nga mga detalye mahimong di na haom sa pagka karon. Palihug iapply ang mga sugyot basi sa kasamtangan nga mga panudlo gikan sa Simbahan ug sa gobyerno.

Nakasinati Ko og Pagkaibog diha sa Sama og Sekso—Moabi-abi ba kaha Nako og Balik Ang mga Miyembro sa Simbahan?
Bouke "Bob" S. Ecoma Verstege

40



Kasaysayan sa Simbahan: Usa ka Tinubdan sa Kalig-on ug Inspirasyon
Elder Quentin L. Cook, Kate Holbrook, ug Matt Grow

12



Sa Dihang Gibati Nako nga Naling-la mahitungod sa Simbahan
Travis Ewell

26

Unsaon Nato sa Paglig-on ang Atong Pagtuo—nga Mag-uban

Sa atong pagtuon sa Basahon ni Mormon niining bulana, atong makat-unan ang mahitungod ni Korihor, kinsa mipatuo sa daghan nga mga miyembro sa Simbahan nga sila nailad sa mga propeta apan miangkon sa kaulahian nga siya mismo nalingla ni Satanas ug milingla sa uban. Atong makat-unan ang mahitungod sa mga Zoramite, usa ka tibuok nga katawhan kinsa mipahilayo sa ilang kaugalingon gikan sa Simbahan. Ug kita makakita ni Alma nga Batan-on, nga sa higayon nga aktibong nakig-away batok sa Simbahan, nagtinguha sa paglig-on sa iyang kaugalingong mga anak batok sa mga pagpili nga modala kanila palayo gikan sa Ginoo ug sa Iyang Simbahan.

Pipila kanato adunay mga sakop sa pamilya o mga higala kinsa mopili nga dili na moapil sa gipahiuli nga Simbahan sa Ginoo. Kini mahimong sakit kaayo alang kanato kinsa kusganong mibati sa atong pagtuo. Gusto kita nga motabang, apan daghan kanato ang maghunahuna kon unsaon.

Usa ka isyu sa magasin dili gayud makatubag sa matag rason kon nganong ang pagtuo mabugnaw o hingpit nga makapasabut kon unsay buhaton kon mahitabo kini. Ang panaw sa tanang tawo sa hugot nga pagtuo managlahi.

Apan uban niini nga isyu kami naglaum sa paghatag og tabang, sama sa:

- Ang kasinatian sa usa ka tawo sa pagbalik sa Simbahan ug sa unsay iyang nakat-unan gikan niini (tan-awa sa pahina 26).
- Ang kaimportante sa pag-abi-abi sa tanan (tan-awa sa 40).
- Mga sugyot alang sa mga ginikanan kon unsaon sa pagmaniobra sa ilang mga relasyon uban sa hamtong nga mga anak kinsa mipili og lahi nga dalan (tan-awa sa pahina 30).
- Makatabang nga mga panglantaw sa kasaysayan sa Simbahan ug sa unsang paagi kini makapalig-on sa atong hugot nga pagtuo (tan-awa sa pahina 12).

Nanghinaut kami nga kining mga artikulo maghatag og usa ka punto sa pagsugod nimo sa pagtinguha og balaan nga giya alang sa inyong personal nga mga kahimtang.

Matinuoron,
Ni Adam C. Olson
Tigdumalang Editor



Mga Sulod

- 5 Usa ka Imbitasyon alang sa mga Artist sa Tibuok Kalibutan** 🕒
- 6 Mga Hulagway sa Hugot nga Pagtuo** 🕒
Ignatius ug Adelaide Baidoo
Ang mga Baidoo personal nga nakakita sa mga panalangin sa programa sa literasiya sa ebanghelyo sa ilang stake ug pamilya.
- 8 Mga Baruganan sa Pagpangalagad**
Pagpangalagad pinaagi sa mga Kalihokan sa Simbahan
Ang mga kalihokan sa Simbahan naghatag kanato og mga oportunidad nga magkahigalaay, motabang, ug mangalagad sa uban.
- 12 Kasaysayan sa Simbahan: Usa ka Tinubdan sa Kalig-on ug Inspirasyon**
Ni Elder Quentin L. Cook, Kate Holbrook, ug Matt Grow
Sa unsang paagi nga ang pagtuon sa kasaysayan sa Simbahan makapalambo sa atong pagtuo ug tinguha nga mas mosunod sa ebanghelyo?
- 20 Paghulagway sa mga Pioneer didto sa India**
Ni Taunalyn Rutherford
Kining matinud-anong mga Santos nagpakita kon unsay gipasabut nga mahimong mga haligi sa Simbahan.
- 26 Sa Dihang Gibati Nako nga Nalingla mahitungod sa Simbahan**
Ni Travis Ewell
Human si Brother Ewell nakahibalo og mga butang nga nakapatay-og sa iyang pagtuo ug maoy nakaingon nga siya mibiya sa Simbahan sulod sa usa ka panahon, nakaamgo siya unsay nawala sa iyaha.
- 30 Kamo Mohigugma, Siya Moluwas** 🕒
Ni Krista Rogers Mortensen
Usa ka inahan nakaamgo nga bisan unsa pa man ang pagpili sa iyang hamtong nga mga anak, siya nagkinahanglan lamang sa paghigugma kanila.
- 32 Mga Tingog sa mga Santos sa Ulahing mga Adlaw** 🕒
Usa ka pamilya mipadaplin sa ilang kaugalingong mga pagsulay aron mangalagad; usa ka maisug nga airman mibarug sa iyang mga gituohan ug nakapadasig sa uban; usa ka inahan mihupot sa usa ka saad; ang pagpasaylo moabut sa wala damha nga higayon.
- 36 Dali, Sunod Kanako: Basahon ni Mormon** 📖 🕒
Kining sinemana nga mga artikulo makasuporta sa imong pagtuon sa Basahon ni Mormon karong bulana.
- 40 Nakasinati Ko og Pagkaibog diha sa Sama og Sekso—Moabi-abi ba kaha Nako og Balik Ang mga Miyembro sa Simbahan?**
Ni Bouke "Bob" S. Ecoma Verstege
Sa dihang si Brother Verstege mibati og pag-aghat nga mobalik sa Simbahan, nabalaka siya mahitungod sa pagdawat sa ubang mga miyembro kaniya.

🕒 Mga Dali nga Mabasa

📖 Suporta sa *Dali, Sunod Kanako*

Anaa sa Hapin
Mga larawan gikan sa
stock.adobe.com ug
unsplash.com



Mga Seksyon

Mga Young Adult

44


Ang umaabut mahimong usa ka makahadlok nga butang. Apan uban sa tabang sa Langitnong Amahan, kitang tanan **maka-padayon uban sa hugot nga pagtuo sa umaabut**. Niining bulana, basaha ang mga istorya gikan sa ubang mga young adult kinsa nakakat-on og pipila ka mga **importanting mga paagi sa pag-pangandam** alang sa umaabut.



Kabatan-onan

52

Pagkat-on kon sa unsang paagi nga **ang ebanghelyo makausab sa inyong pamilya** ug nganong importante ang imong **yano nga mga pagpili** sa kinabuhi.




Kabataan

Higala

Mahimo kang **usa ka misyonaryo**, sama ni Alma!



PANG-DIGITAL LAMANG NGA MGA ARTIKULO SA HULYO



Aduna ka bay mga pangutana mahitungod sa Ebanghelyo? Aniyay Lima Ka Pamaagi sa Pagpangita og mga Tubag

Ni Chakell Wardleigh

Usa ka young adult mipaambit kon sa unsang paagi nga ang mga pangutana makapalig-on sa hugot nga pagtuo kon inyo kining tugutan.



Giunsa Nako sa Pagpangandam alang sa Templo sa India
Ni Yeshwanth Kosireddy

Usa ka young adult gikan sa India mipaambit kon sa unsang paagi siya nangan-dam alang sa iyang unang oportunidad sa pag-adto sa templo.



Unsa ang Gikinahanglan aron Madawat ang Atong Matarung nga mga Tinguha

Ni Marc Deo Dela Cruz

Usa ka young adult sa Pilipinas mipaambit kon sa unsang paagi iyang nakaplagan ang hugot nga pagtuo sa dihang nausab ang iyang plano alang sa umaabut.

PANGITA PA OG DUGANG

Diha sa Gospel Library nga app ug sa liahona.ChurchofJesusChrist.org, makahimo ka:

- Pagpangita sa bag-ong isyu.
- Pagdiskobre sa digital lamang nga sulod.
- Pagpangita sa milabay nang mga isyu.
- Pagsumiter sa imong mga sugilanon ug mga feedback.
- Pag-subscribe o paghatag og regalo nga subskripsyon.
- Pagpalambo sa pagtuo gamit ang mga himan nga digital.
- Pagpaambit og paboritong mga artikulo ug mga video.
- Pag-download o pag-print og mga artikulo.
- Paminaw sa paboritong mga artikulo.

KONTAKA KAMI

Ipadala ang imong mga pangutana ug feedback ngadto sa liahona@ChurchofJesusChrist.org.

I-sumiter ang imong mga sugilanon diha sa liahona.ChurchofJesusChrist.org o i-email ngadto sa:

Liahona, flr. 23
50 E. North Temple Street
Salt Lake City, UT 84150-0023, USA

HULYO 2020 VOL. 23 NU. 7
LIAHONA 16722 853

Internasyonal nga magasin sa Simbahan ni Jesukristo sa mga Santos sa Ulahing mga Adlaw

Ang Unang Kapangulohan: Russell M. Nelson, Dallin H. Oaks, Henry B. Eyring

Ang Korum sa Napulog Duha ka mga

Apostoles: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, Ulisses Soares

Editor: Randy D. Funk

Mga Adviser: Becky Craven, Sharon Eubank, Cristina B. Franco, Walter F. González, Larry S. Kacher, Jan E. Newman, Adrián Ochoa, Michael T. Ringwood, Vern P. Stanfill

Tigdumalang Direktor: Richard L. Heaton

Direktor sa mga Magasin sa

Simbahan: Allan R. Loyborg

Business Manager: Garff Cannon

Tigdumalang Editor: Adam C. Olson

Luyo-luyo sa Tigdumalang Editor:

Ryan Carr

Tig-abag sa Pagmantala: Camila

Castroñón

Pagsulat ug Pag-edit: David Dickson,

David A. Edwards, Matthew D. Flitton, Garrett H. Garff, Jon Ryan Jensen, Aaron Johnston, Charlotte Larcabal, Michael R. Morris, Eric B. Murdock, Joshua J. Perkey, Jan Pinborough, Richard M. Romney, Mindy Selu, Lori Fuller Sosa, Chakell Wardleigh, Marissa Widdison

Direktor sa Art: Tadd R. Peterson

Desinyo: Jeanette Andrews, Fay P. Andrus, Mandie Bentley, C. Kimball Bott, Thomas Child, Joshua Dennis, David Green, Colleen Hinkle, Eric P. Johnson, Susan Lofgren, Scott M. Mooy, Aleni Regehr, Mark W. Robison, K. Nicole Walkenhorst

Coordinator sa Intellectual Property: Collette Nebeker Aune

Tigdumala sa Produksyon:

Jane Ann Peters

Produksyon: Ira Glen Adair, Julie Burdett, José Chavez, Thomas G. Cronin, Bryan W. Gygi, Gimny J. Nilson, Marissa M. Smith

Prepress: Joshua Dennis, Ammon Harris

Direktor sa Pag-impronta:

Steven T. Lewis

Direktor sa Pagpang-apud-apod:

Nelson Gonzalez

Paghubad: Shahlom Alinsug

Mailing address: Liahona, Fl. 23, 50 E. North Temple St., Salt Lake City, UT 84150-0023, USA.

Ipadala ang subskripsyon, mga pangutana, ug mga taho ngadto sa Dateline Philippines sa Liahona, The Church of Jesus Christ of Latter-day Saints, Temple Drive, Greenmeadows Subdivision, Quezon City 1110, Metro Manila, Philippines o sa P. O. Box 1505, Ortigas Center, Emerald Avenue, Pasig 1600, Metro Manila, Philippines. Numero sa telepono 635-9183. Presyo sa subskripsyon sa Pilipinas, P48 matag tuig, P4.00 matag gula, gawas sa mga espesyal nga isyu. Sa pag-subscribe ug pag-renew sa magasin, bisitahi ang <http://store.ChurchofJesusChrist.org>. Paliug ayaw kalimti sa pagbutang sa imong ward/branch isip address asa ipadala ang imong subskripsyon.

Kon dunay mga pangutana mahitungod sa subskripsyon paliug tawag sa Church's Global Service Center (GSC) sa 1800-8-680-3950 alang sa mga subscriber sa PLDT ug Smart o 1800-1-441-0687 alang sa mga subscriber sa Globe.

Isumiter ang mga manuskrito ug mga pangutana online sa liahona.ChurchofJesusChrist.org; kon ipadala ngadto sa Liahona, Fl. 23, 50 East North Temple Street, Salt Lake City, UT 84150-0023, USA; o i-e-mail sa: liahona@ChurchofJesusChrist.org

Ang Liahona (usa ka termino sa Basahon ni Mormon nga nagpasabut nga "kompas" o "direktor") gimantala sa Albanian, Armenian, Bislama, Bulgarian, Cambodian, Cebuano, Chinese, Chinese (simplified), Croatian, Czech, Danish, Dutch, English, Estonian, Fijian, Finnish, French, German, Greek, Hungarian, Icelandic, Indonesian, Italian, Japanese, Kiribati, Korean, Latvian, Lithuanian, Malagasy, Marshallese, Mongolian, Norwegian, Polish, Portuguese, Romanian, Russian, Samoan, Slovenian, Spanish, Swahili, Swedish, Tagalog, Tahitian, Thai, Tongan, Ukrainian, Urdu, and Vietnamese. (Ang kasagad magkalahi depende sa pinulongan.)

© 2020 pinaagi sa Intellectual Reserve, Inc. Tanang mga katungod gigahin. Gigamit sa Ang Simbahan ni Jesukristo sa mga Santos sa Ulahing mga Adlaw nga may pagtugot. Gimprinta sa Estados Unidos sa Amerika ug sa Pilipinas.

Copyright nga impormasyon: Gawas kon sa laing paagi gipasabut, ang mga indibidwal mahimong mokopya sa materyal gikan sa Liahona alang sa ilang personal, dili pangkomersyo nga paggamit (lakip sa mga calling sa Simbahan). Kini nga katungod mahimong kuhaon pag-usab sa bisan unsang panahon. Ang biswal nga material dili mahimong kopyahan kon kini adunay mga pagdili diha sa linya sa kredito sa maong

artwork. Ang copyright nga mga pangutana kinahanglan ipadala ngadto sa Intellectual Property Office, 50 E. North Temple St., Fl. 13, Salt Lake City, UT 84150, USA; email: cor-intellectualproperty@ChurchofJesusChrist.org.

For Readers in the United States and Canada: July 2020 Vol. 23 No. 7. LIAHONA (USPS 311-480) Cebuano (ISSN 1096-5114) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431) POSTMASTER: Send all UAA to CFS (see DMM 507.1.5.2). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

USA KA IMBITASYON ALANG SA MGA ARTIST SA TIBUOK KALIBUTAN

Giimbitar kamo sa paghimo og bag-ong mga buhat sa art alang sa umaabut nga ika-12 nga International Art Competition, gipaluyohan sa Church History Museum sa Salt Lake City, Utah.

Tanang artistic media, mga estilo, ug kultural nga mga paagi dawaton. Ang mapili nga mga salmot ipasundayag sa Church History Museum ug online.

Kini nga kompetisyon nga adunay mga hurado mokuha gikan sa mga artist sa tibuok kalibutan sa paningkamot aron sa pag-awhag sa paglalang sa mga hulagway sa kalidad sa mga Santos sa Ulahing mga Adlaw, mopasundayag sa gilapdon ug pagkalain-lain sa kultura nga pasundayag sa mga Santos sa ulahing mga adlaw, ug sa pagpalapad sa Church History Museum nga koleksyon.

- Tema: "All Alike unto God [Ang Tanan Managsama ngadto sa Dios]," dinasig sa 2 Nephi 26:33
- Petsa sa pagsumiter: Pebrero 1–Hunyo 1, 2021
- Mga edad: Ang mga sumasalmot kinahanglan 18 anyos o magulang pa
- Mga ganti: Ang mga artist kansang mga buhat napilian alang sa exhibition pahibaloon sa Oktubre 2021
- Petsa sa pagpasundayag: Marso 2022 hangtud sa Oktubre 2022

Bititaha ang ChurchofJesusChrist.org/artcompetition alang sa detalyado nga mga lagda, mga kinahanglanon aron makaapil, online nga pagparehistro, ug sa pagtan-aw sa makapadasig nga mga buhat gikan sa nanglabay nga mga kompetisyon. ■

"[Ang Ginoo] kay siya nag-buhat niana nga maayo tali-wala sa mga katawhan; ug siya wala magbuhat sa bisan unsa gawas nga kini yano ngadto sa mga katawhan; ug siya nagdapit kanilang tanan sa pagduol ngadto kaniya ug sa pag-ambit sa iyang kaayo; ug siya wala maglimud kang bisan kinsa nga moduol ngadto kaniya, itum ug puti, ulipon ug gawasnon, lalaki ug babaye; ug siya naghinumdom sa mga luog; ug ang tanan managsama ngadto sa Dios, Judeo ug Hentil."

—2 Nephi 26:33

Ang Tanan Managsama ngadto sa Dios

PADULONG SA TUO GIKAN SA WALA SA IBABAWING BAHIN: SI KRISTO NGA ADUNAY KORONA MGA TUNOK NI ADAN LEE SHERWOOD; ANG MGA MGA TIPA-KITPAK NI PAIGE CROSLAND ANDERSON; BUHING TUBIG, NI ROSE DATOC DALL; SI KRISTO MGA-GAYO, NI LEROY GLEN TRANSFIELD; ANG PLANO SA KALUWASAN, NI JULIE WUEN YIM



Ignatius ug Adelaide Baidoo

Accra, Ghana



Sila si Ignatius ug Adelaide nakakita kon sa unsang paagi ang parograma sa literasiya sa Simbahan ug ang gipanghingusgan nga nakasentro sa panimalay nga pagkat-on sa ebanghelyo nakapanalangin sa mga sakop sa ilang stake ug sa pamilya.

CHRISTINA SMITH, TIGLITRATO

Ignatius:

Nalambigit ko sa programa sa literasiya sa ebanghelyo isip usa ka sakop sa kapangulohan sa stake. Nakabisita ko og usa ka klase ug nakaamgo nga kini dili lamang alang niadtong kinsa dili makabasa ug makasulat. Kini alang kanatong tanan aron mas masabtan ang ebanghelyo ni Jesukristo.

Ang Dali, Sunod Kanako ug ang nakasentro sa panimalay nga pagkat-on sa ebanghelyo makatabang usab sa mga pamilya nga mobasa sa mga kasulatan ug makat-on gikan sa usag usa.

Adelaide:

Sa among pamilya, naningkamot kami ug gibuhat ang tanan namong mahimo. Ang tanan miapil. Malipayon kaayo ko kon sa unsang paagi ang akong mga anak nagtinabangay kon magbasa kami sa Basahon ni Mormon. Ganahan sila sa Basahon ni Mormon. Maanindot kaayo ang among higayon sa pagbasa ug pagpaambit sa among mga pagpamatuod.



PAGDISKOBRE PA OG DUGANG

Pagtan-aw pa og dugang sa lakat sa hugot nga pagtuo sa mga Baidoo, lakip sa dugang nga mga litrato, sa online o Gospel Library nga bersyon niini nga artikulo sa [ChurchofJesusChrist.org/go/7620](https://www.ChurchofJesusChrist.org/go/7620).

Pagkat-on gikan ni Presidente Henry B. Eyring kon sa unsang paagi nga ang atong mga paningkamot makapahimo sa atong mga panimalay nga dapit sa hugot nga pagtuo ug ang gugma makahatag og mahangturong kalipay sa atong mga pamilya sa [ChurchofJesusChrist.org/go/7720](https://www.ChurchofJesusChrist.org/go/7720).



Mga Baruganan sa Pagpangalagad

PAGPANGALAGAD PINAAGI SA MGA KALIHOKAN SA SIMBAHAN





Usa ka paagi nga kita makapangalagad sa atong kaubanang mga miyembro, mga silingan, ug mga higala mao ang pinaagi sa mga kalihokan sa Simbahan. Kon magplano kamo og kalihokan mahitungod sa mga panginahanglan o mga interes sa usa ka tawo nga inyong gipangalagaran o kamo modapit kanila sa pag-apil sa mga kalihokan o mga oportunidad sa pagserbisyo alang sa uban, ang mga kalihokan sa ward, stake, o gani sa multistake nga lebel makahatag og makahuluganon ug makalingaw nga mga paagi sa pag-awhag og panaghiusa ug paglig-on sa mga miyembro.

Ang mga kalihokan sa Simbahan makahimo usab og daghang mga oportunidad sa pagpangalagad. Sama pananglit, ang mga kalihokan sa Simbahan makahatag og mga oportunidad sa pag-apil sa mga proyekto sa pagserbisyo nga mopanalangin sa uban ug mo-ugmad og positibong mga relasyon sa komunidad. Ang mga kalihokan sa Simbahan mahimo usab nga usa ka kahigayunan sa pagtabang sa dili kaayo aktibong mga miyembro sa Simbahan ug sa mga higala sa laing mga tinuohan o mga higala nga walay giapilan nga relihiyon.

Ang paglakip sa daghang mga tawo sa mga kalihokan sa Simbahan mohimo og usa ka oportunidad alang sa Ginoo sa pagpanalangin ug paglig-on sa atong mga ward ug branch, sa atong kasilinganan, ug sa atong mga komunidad.

Pag-ugmad og Positibo nga mga Relasyon

Padulong na ang tingtugnaw, ug si David Dickson walay ideya kon unsaon nga ipabiling mainitan ang iyang pamilya.

Si David, iyang asawa, ug duha ka mga anak nga babaye bag-o lang mibalhin ngadto sa bukiran nga siyudad sa Fredonia, Arizona, USA, usa ka habog nga disyerto nga dapit nga gipalibutan og talag-saong pulahon nga mga pangpang, sagebrush ug mga evergreen.

Ang panimalay nga girentahan sa mga Dickson nagsalig sa usa ka sug-angan nga kahoy ang gigamit isip nag-unang tinubdan sa kainit. Dali nga nahibaloan ni David nga ang pagpangahoy usa ka kahanas nga gikinahanglan tungod kay ang mga tingtugnaw sa Fredonia puno sa nyebe ug yelo.

“Wala koy bisan unsang igsusugnod nga kahoy o usa ka chainsaw o bisan ang kahibalo kon unsaon sa paggamit ang usa niana!” Miingon si David. “Wala ko kahibalo unsay akong buhaton.”

Pipila ka mga miyembro sa ward nangutana kang David kon ang iyang pamilya adunay igo nga kahoy nga makalahutay sa tingtugnaw. “Wala ra magdugay nakaamgo sila nga ako walay igo nga kahoy,” miingon si David. “Sa wala madugay ang korum sa mga elder mitanyag sa pagtabang kanako nga manguha og kahoy. Napuno sa pasalamat, gidawat nako ang ilang tanyag.”

Sa wala madugay nahibaloan ni David nga kini nga byahe sa pagpangahoy sama sa daghang mga kalihokan sa ward nga maayo pagkaplano, organisado kaayo, ug daghan ang manambong. Usa ka Sabado sa buntag, si David, ang korum sa mga elder, ug ang ubang mga miyembro sa ward mipadulong ngadto sa kabukiran sa usa ka caravan sa mga trak ug mga trailer.

“Sulod sa usa ka hapon, salamat sa ilang mga himan ug kahibalo ug kahanas, ang mga miyembro sa ward mihatag sa akong pamilya og nagpatong-patong nga binugha nga milungtad kanamo og dul-an sa duha ka mga tingtugnaw,” miingon si David. “Mas importante, natudloan ko sa tanang kinahanglan nakong mahibaloan mahitungod sa pagpangahoy sa akong kaugalingon. Sa dihang mibiya ko sa Fredonia, nahibalo ko unsaon sa paggamit ang usa ka chainsaw, ug mitabang ko sa daghang dili nako maihap nga pagpangahoy nga mga kalihokan sa ward.”

Ang maong mga kalihokan sa ward wala lang mipalambo og positibong mga relasyon tali sa mga miyembro sa Simbahan apan mipalambo usab og positibong mga relasyon sa tanang mga tawo sa komunidad.

“Nakahinumdom ko og usa ka babaye, dili miyembro sa Simbahan, kinsa bag-o sa dapit,” miingon si David. “Siya misunog na lang sa kahoy gikan sa iyang balay mismo aron mainitan. Sa dihang nahibalo mi sa iyang kahimtang, among gisiguro nga siya adunay





igong igsusugnod nga kahoy aron makalahutay sa tingtugnaw. Mapasalamaton kaayo siya nga naglisud siya og sulti.”

Ang mga paningkamot sa pagpangalagad sa Fredonia misiguro nga ang tanan luwas ug mainitan latas sa tingtugnaw.

Pagtabang sa Uban

Samtang nagserbisyo og misyon didto sa Romania, si Meg Yost ug ang iyang kompanyon kanunay mibisita sa usa ka pamilya kinsa wala na magsimba sa dugay nang panahon. “Ang mga Stanica usa sa labing unang mga miyembro sa Simbahan sa Romania,” miingon si Meg, “ug kami nahigugma kanila.”

Sa dihang miabut ang panahon sa pagplano ug pag-organisar og usa ka kalihokan sa branch, ang mga lider mihukom nga ang branch mopahigayon og usa ka “Gabii sa Pioneer.” Kini mahimong usa ka gabii sa pagsaulog sa maisugong mga pioneer kinsa mitabok sa Estados Unidos aron makaabut sa Walog sa Salt Lake. Mahimo usab kini nga usa ka oportunidad sa pagpasidungog sa mga pioneer sa Simbahan sa Romania.

“Among nahunahunaan nga kini mahimong usa ka nindot nga paagi alang sa pipila ka mga miyembro sa pagpamatuod sa ilang pagkakabig ug sa unsang paagi nakita nila ang pagtubo sa Simbahan sa Romania,” miingon si Meg. “Nahunahunaan dayon namo nga ang pamilyang Stanica kinahanglang maapil. Gidapit namo sila sa pag-apil, ug sila naghinam-hinam!”

Sa gabii sa kalihokan, ang mga Stanica wala pa gihapon mabot sa dihang oras na nga magsugod.

“Nabalaka mi nga dili sila moabut,” mihinumdom si Meg. “Apan igo ra gayud, sila misulod sa pultahan. Ang mga Stanica mihatag og usa ka maanindot nga pagpamatuod sa ebanghelyo ug sa Simbahan. Nakahugoy-hugoy usab sila sa ubang mga miyembro kinsa wala nila nakita sa dugayng panahon.”

Ang mga miyembro sa branch mihangup ug miabi-abi sa mga Stanica. Pagkasunod Dominggo, malipayong nasurprisa si Meg nga nakakita ni Sister Stanica diha sa simbahan.

“Sa dihang mibisita ko sa branch pipila ka bulan ang milabay, nagsimba gihapon siya!” Miingon si Meg. “Nagtuo ko nga ang kahigayunan nga siya nagpamatuod ug mibati nga naapil ug gikinahanglan sa branch nakatabang gayud niya.”

4 ka mga Ideya alang sa Pagpangalagad pinaagi sa mga Kalihokan sa Simbahan

- **Pagplano og mga kalihokan nga matubagang mga panginahanglan:** Ang mga kalihokan mao ang usa ka nindot nga paagi nga matubag ang daghang nagkalain-laing mga panginahanglan. Mahimo kining planohon sa pagtubag sa piho nga mga panginahanglan sa usa ka indibidwal o grupo. Kini usab kinahanglan makatubag sa mga panginahanglan niadtong kinsa moapil, bisan kon kana nga panginahanglan mao ang mas makaila ang usag usa, mas makakat-on sa ebanghelyo, o mobati sa Espiritu.
- **Dapita ang tanan:** Samtang planohon ninyo ang mga kalihokan, paghimo og espesyal nga paningkamot sa pagdapit niadtong kinsa makabenepisyo gikan sa pag-apil. Hinumdumi ang bag-ong mga miyembro, dili kaayo aktibong mga miyembro, kabatan-onan, mga single adult, mga tawo nga may kakulangan, ug mga tawo sa ubang tinuohan. Ipadangat ang pagdapit uban sa ilang labing maayong mga tinguha nga anaa sa hunahuna, ug ipadayag kon unsa gayud ninyo ka gusto nga moadto sila.
- **Awhaga ang pag-apil:** Kadtong inyong gidapit mas makabenepisyo gikan sa mga kalihokan kon sila adunay oportunidad sa pag-apil. Usa ka paagi sa pag-awhag sa pag-apil mao ang pagpagamit sa mga indibidwal sa ilang mga gasa, mga kahanas, ug mga talento atol sa kalihokan.
- **Abi-abiha ang tanan:** Kon ang inyong mga higala motambong sa kalihokan, buhata ang tanan ninyong mahimo aron mobati sila nga giabi-abi. Sa samang paagi, kon makakita kamo og mga tawo nga wala ninyo mailhi, magmahigalaon ug abi-abiha usab sila! ■

PAGDISKOBRE PA OG DUGANG

Sa ChurchofJesusChrist.org, kamo makatan-aw sa video nga “Inviting Others to ‘Come and Help’” aron makita kon unsa diay ka sayon ang pagdapit sa uban nga moserbisyo uban kanato.





ABLIHI ANG IMONG KASINGKASING

“Kinahanglan kitang mahimong mabinantayon kanunay ug mangita og bag-ong mga nawong kon motabong og mga kalihokan ug mga miting sa Simbahan. . . . Makahimo kita og yanong mga butang sa pagtabang nga kining bag-ong mga higala nga mobati nga gihangop ug giabiabi . . . , sama sa mainitong pagtimbaya, tinuorayng pagpahiyom kanila, . . . pagpaila kanila sa ubang mga miyembro, ug uban pa. Kon atong ablihan ang atong mga kasingkasing ngadto sa bag-o natong mga higala . . . , naglihok kita sa diwa sa pagpangalagad.”

Elder Ulisses Soares sa Korum sa Napulog Duha ka mga Apostoles, “Usa ra Diha kang Kristo,” *Liahona*, Nob. 2018, 38.

PAGPANGALAGAD PINAAGI SA PAGDAPIT

Pagsusi alang sa umaabut nga mga kalihokan sa ward o branch. Hunahunaa kadtong kinsa kamo nangalagad ug ikonsiderar ang pagdapit kanila sa mga kalihokan.



IPAAMBIT ANG INYONG MGA KASINATIAN

Ipadala kanamo ang inyong mga kasinatian samtang nangalagad kamo sa uban o kamo ang gipangalagaran. Adto sa Liahona.ChurchofJesusChrist.org ug i-klik ang “Mosumiter og usa ka Artikulo o Feedback.”



**Ni Elder
Quentin L. Cook**

Sa Korum sa
Napulog Duha ka
mga Apostoles

Mga Sidebar
pinaagi sa mga
Church historian
nga si Kate
Holbrook ug
Matt Grow

Kasay- sayan sa Simbahan

USA KA TINUBDAN SA KALIG-ON UG INSPIRASYON

Niini nga artikulo, gikan sa tibuok kalibutan nga debosyonal nga gipahigayon didto sa Nauvoo, Illinois, niadtong Septyembre 9, 2018, si Elder Quentin L. Cook ug ang mga Church historian nga si Kate Holbrook ug Matt Grow mitubag sa mga pangutana kabahin sa kasaysayan sa Simbahan nga gipangutana sa mga young adult gikan sa tibuok kalibutan.

Elder Cook: Ang kasaysayan sa Simbahan mahimong usa ka dakong tinubdan sa pagtuo, apan sa ubang tawo, kini nasaypan sa pagsabot o nataligam-an. Ang pipila tuyo pa gani nga mituis sa mga istorya sa nangagi aron makamugna og pagduha-duha.

Sa pagkat-on og *kasaligan* nga kasaysayan sa Simbahan, atong mabugkos ang atong mga kasingkasing ngadto sa mga Santos sa kagahapon ug karon. Makakita kita og mga ehemplo sa dili perpektong mga tawo sama kaninyo ug kanako kinsa mipadayon uban sa pagtuo ug mitugot sa Dios nga motrabaho pinaagi nila sa pagtuman sa Iyang buhat. Mosaad ko nga ang pagtuon sa kasaysayan sa Simbahan makadugang sa inyong pagtuo ug tinguha nga mas hingpit nga mosunod sa ebanghelyo.

*Samtang mas magkat-on
pa kita mahitungod sa
mga Santos sa nangagi,
malig-on kita sa pagtu-
man sa atong kaugali-
ngong misyon isip anak
nga babaye o anak nga
lalaki sa Dios.*

Ang istorya sa Pagpahiuli maoy usa ka istorya sa sakripisyo, determinasyon, ug pagtuo. Kitang tanan kabahin sa Pagpahiuli ug kasaysayan sa Simbahan. Matag usa kanato adunay misyon nga tumanon niini nga kinabuhi nga makatabang sa ebanghelyo sa paglukop sa yuta. Samtang mas magkat-on pa kita mahitungod sa mga Santos sa nangagi, malig-on kita sa pagtuman sa atong kaugalingong misyon isip anak nga babaye o anak nga lalaki sa Dios.

Sa sobra sa 24 ka tuig nga nagserbisyo ko isip usa ka General Authority, ang tinguha sa mga Kaigsoonan mao ang magmatinuuron kutob sa mahimo, diha sa kasaysayan sa Simbahan ug sa doktrina. Among gibati nga ang paningkamot sa pagpagawas niining bag-ong mga kapanguhaan—ilabi na sa *Joseph Smith Papers*, ang Gospel Topics Essays, Mga Hisgutanan sa Kasaysayan sa Simbahan, ug karon ang pipila ka volume nga *Mga Santos*¹—usa ka nindot nga paagi aron ang mga tawo makatuon og mga butang sa konteksto

nga tinuod ug makatabang kanila nga makasabot sa ebanghelyo ni Jesukristo sa masaligan nga paagi.

Usa sa akong paborito nga mga istorya sa *Mga Santos* mao ang istorya ni Addison Pratt nga miadto sa South Pacific. Aduna siyang mga 60 ka bunyag. Ang akong asawa, si Mary, ug ako adunay kahigayunan sa pagbisita sa Austral Islands, French Polynesia, diin nagtudlo si Addison Pratt.

Usa sa labing talagsaong mga kasinatian nga aduna ako sukad mao ang makadungog sa usa ka batan-ong babaye didto nga miingon, “Ika-pito ko nga henerasyon nga miyembro sa Simbahan.” Nabunyagan ni Addison Pratt ang iyang dugay na nga katigulangan sa wala pa miadto ang mga Santos sa Utah.

Bisan asa man kamo sa kalibutan, bisan unsa pa kamo nga kalawatan naggikan, importante kamo, usa kamo ka bahin sa kasaysayan sa Simbahan. Nagkinahanglan kaayo kami kaninyo ug gusto namo kamo. Mapanalanginan ninyo ang mga kinabuhi sa mga tawo.



Si Joseph Smith ug ang Basahon ni Mormon

Sa dihang tin-edyer pa ko, kami nagtuo nga ang akong magulang nga lalaki dili maka-serbisyo og misyon tungod kay ang ward gitugutan lang sa pagpadala og usa ka batan-ong lalaki sa matag higayon ngadto sa misyon. Ang uban kinahanglang mahimong andam alang sa pag-apil sa militar. Apan nahibaloan sa among bishop ug presidente sa stake nga makapadala pa sila og usa. Busa, nakig-istorya sila sa akong igsoon nga lalaki mahitungod niini, ug siya mipauli ug misulti sa akong mga ginikanan.

Maayo nga tawo ang akong amahan, apan siya dili aktibo sa Simbahan. Negatibo ang iyang tubag—apan alang sa usa ka dili kasagaran nga rason. Wala siya manaway sa Simbahan o gani sa usa ka misyon, apan ang akong igsoong lalaki nangandam alang sa medikal nga eskwelahan. Ang akong amahan miingon, “Giangdam na nimo ang imong kaugalingon nga moadto sa medikal nga eskwelahan. Nakakuha na

Nganong dili man mas bukas ang Simbahan bahin sa pipila ka kontrobersyal nga mga butang sa kasaysayan niini?

Ni Kate Holbrook

Sa dihang kwatro anyos pa ko, ang akong inahan ug ang akong lola nagtrabaho sa Beehive House, ang daang balay ni Brigham Young sa Siyudad sa Salt Lake, Utah. Gitudloan ko nila sa tanan mahitungod kang Brigham Young ug nga siya adunay daghang mga asawa. Mga 10 ka tuig ang milabay, akong nakat-unan nga si Joseph Smith adunay daghang mga asawa. Wala koy nahibaloan mahitungod sa mga bato sa manalagna, nga gigamit ni Joseph sa pagtabang sa paghubad sa Basahon ni Mormon, hangtud nga nahingkod ko. Ang Simbahan wala motago og impormasyon gikan kanako, apan ang impormasyon sa kasaysayan wala kaayo gihatagan og gibug-aton sa dihang bata pa ko.

Ang akong nakat-unan sa akong mga miting sa Dominggo ug sa akong mga klase sa seminary mao ang kon unsa ang labing importanting buhat sa Simbahan. Nakakat-on ko sa paghinulsol. Nakakat-on ko sa pagpahiangay sa akong kinabuhi sa ebanghelyo ni Jesukristo. Nakakat-on ko unsaon sa pagtukod og relasyon ngadto sa akong Amahan sa Langit. Kini mao ang mga butang sa akong kinabuhi nga akong gipakabililhon. Nasayud ko nga alang sa ubang tawo, mahimong sakit kaayo nga makat-on bahin sa usa ka butang nga inyong gihunahuna nga angayang nasayran apan wala ninyo masayri. Mao

kana nganong si Matt ug ako mihimo niini nga buhat. Nanghinaut kami nga kana nga kasinatian sa mga tawo mahimong kabahin na karon sa nangagi tungod kay kita aduna na sa basahon nga *Mga Santos*, diin naghulagway sa usa ka hingpit nga kasaysayan alang sa katawhan.



Unsaon nato pagkahibalo kon kasaligan ang usa ka tinubdan mahitungod sa kasaysayan sa Simbahan?

Ni Matt Grow

Nagtrabaho ko sa Simbahan sulod sa miaging siyam ka tuig nga nagsulat mahitungod sa kasaysayan. Nakita nako ang panglantaw sa atong mga General Authority kalabut sa atong kasaysayan. Ang panag-istoryahanay dili kabahin sa “Unsaon nato sa pagtago o pagpapas sa kasaysayan?” Hinoon, ang mga pag-istoryahanay kabahin sa “Unsaon nato sa paghimo sa kasaysayan nga daling makuha, maanaa, ug masabtan?”

Nasayud kitang tanan nga ang hagit sa panahon sa impormasyon dili mao ang pagpangita og mga tubag—gipalibutan kita sa mga tubag—apan ang pag-ila tali sa maayong mga tubag ug bati nga mga tubag, maayong impormasyon ug bati nga impormasyon. May daghan kaayong diskusyon diha sa internet bahin sa atong kasaysayan, ug kadaghanan niini nakamugna og mas daghang lalis kay sa katin-awan.

Pagbantay sa mga tinubdan sa impormasyon nga nagtinguha lang sa pagdaut og mga tawo. Pangita hinoon og mga tinubdan sa impormasyon nga gibase sa mga rekord nga gihimo mismo sa mga tawo ug nga nagtinguha nga mahimong makiangayon kanila. Sayon ra ang pag-ingon nga duna kay “nasakpan” nga sayop sa nangagi, aron pagsulti og kinutlo o panghita-bo nga wala sa konteksto ug mohimo niini nga makapahadlok.

Isip historian, naningkamot kong sundon ang tambag sa usa ka British nga nobelista. Miingon siya, “Ang nangagi usa ka langyaw nga nasud: lahi ang ilang gipanghimo didto.” (L. P. Hartley, *The Go-Between* [1953], prologue). Nagpasabut kana nga kon mobisita kita sa nangagi, dili nato gusto nga mahimong “ngil-ad nga turista.” Gusto natong masabtan ang mga tawo sa ilang kaugalingong konteksto ug sa ilang kaugalingong kultura. Gusto natong magmapailubon sa unsay atong nakita nga ilang mga sayop. Gusto natong magmapainubsanon mahitungod sa mga limitasyon sa atong kaugalingong kahibalo. Ug gusto natong adunay diwa sa gugmang putli bahin sa nangagi.



ka og mga klase. Mas daghan ka og mahimong kaayohan kon mosulod ka sa medical school kay sa kon magmisyon ka.”

Nianang gabhiona, kining matinud-anon, talagsaon nakong igsoon milingkod tapad nako, ug nag-istoryahanay kaming duha. Nakahukom kami nga adunay tulo gayud ka mga pangutana nga motino sa iyang tubag sa among amahan. Ang una mao ang, “Si Jesukristo ba ang Manluluwas sa kalibutan?” Ug ang ikaduha mao ang, “Pulong ba sa Dios ang Basahon ni Mormon?” Ug ang ikatulo mao ang, “Si Joseph Smith usa ba ka propeta?” Nakaamgo ko nga ang mga tubag niadtong tulo ka mga pangutana makaapekto sa hapit tanang desisyon nga akong himoon sa tibuok nakong kinabuhi.

Kanunay nakong gihigugma ang Manluluwas ug akong nabasa ang Basahon ni Mormon, apan sa pagkaamgo kon unsa ka importante kadto nga mga tubag, nag-ampo ko nianang gabhiona ug nakadawat pinaagi sa Espiritu Santo og usa ka mahinungdanong maayo nga tubag niadtong mga pangutana. Si Jesukristo mao ang Manluluwas, ang Basahon ni Mormon mao ang pulong sa Dios, ug si Joseph Smith usa ka propeta. Nagpamatuod ko nga kining mga butanga tinuod.

Dinaghan nga Kaminyoon

Gusto ko nga mohimo og tulo ka mga punto mahitungod sa dinaghan nga kaminyoon. Una, klaro nga adunay daghang sakripisyo niadtong dinaghan nga mga kaminyoon. Dihay daghan kaayong gugma ug panaghi-usa, apan dihay sakripisyo usab, ug ang mga ginikanan niadtong mga kaminyoon mitudlo sa ilang mga anak sa pagsakripisyo. Daghan sa mga anak niadtong dinaghan nga mga kaminyoon ang midala sa ebanghelyo ni Jesukristo sa tibuok kalibutan ug mipanalangin sa daghan nga mga kinabuhi.

Ikaduha, adunay pipila, sama ni Vilate Kimball, kinsa nakadawat sa ilang kaugalingong personal nga pagpadayag—sa wala pa sila nasayud sa hingpit kon unsa ang moabut—nga kini nga doktrina nagagikan sa Dios.²

Ug ikatulo, sa senior nga mga konseho sa Simbahan, adunay pagbati nga ang dinaghan nga kaminyoon sama sa pagkabuhat niini nakakab-ot sa katuyoan niini. Kinahanglan nga tahuron nato kadto nga mga Santos, apan kana nga katuyoan natuman na.

Karon, adunay mga pangutana nga wala matubag. Apan gusto ko nga masayud kamo nga aduna kitay mahigugmaong Langitnong Amahan kinsa adunay perpekto nga plano, nga ang Iyang plano mahitungod sa kalipay, ug nga aduna kitay usa ka Manluluwas nga mibuhay sa tanan alang kanato. Makasalig kita Kanila.

Nganong ang mga istorya sa Unang Panan-awon ni Joseph Smith managlahi og gamay?

Ni Matt Grow

Si Joseph Smith mirekord o mihangyo sa iyang mga tigsulat sa pagrekord og upat ka managlahing istorya sa Unang Panan-awon. Ang mga istorya nagsaysay og usa ka makanunayong istorya, apan anaay mga kalainan. Dili kana angay natong ikatingala. Kon adunay hingpit nga pagkaparehas sa tanang istorya, diha na nga ako, isip usa ka historian, magduda tungod kay dili ingon niana motrabaho ang panumduman. Atong makita ang samang sundanan sa ubang mga istorya sa kasaysayan o sa mga kasulatan (tan-awa sa Mga Buhat 9:7; 22:9).

Hinumdumi usab kon unsa ka lisud ang paghulagway sa usa ka sagra-dong kasinatian gamit ang mga pulong. Si Joseph mitawag sa pinulongan nga usa ka “gamay, pig-ot nga bilanggoan” (sa *History of the Church*, 1:299). Hunahunaa ang inyong kaugalingon nga labing sagra-dong mga kasinatian. Unsa ka sayon ang pagpahayag niini nga mga kasinatian gamit ang mga pulong? Angay kitang magsaulog nga duna kitay daghang mga istorya tungod kay naghatag kini kanato og bag-ong ideya ug bag-ong panglantaw. Basaha ang upat ka mga istorya sa Unang Panan-awon diha sa Gospel Topics essays. Ang pagbuhat niini makapalambo sa inyong pag-pasalamat sa unsay nahitabo nianang adlaw.

Unsay papel sa Urim ug Thummim diha sa paghubad sa Basahon ni Mormon?

Ni Kate Holbrook

Si Joseph Smith mihubad sa Basahon ni Mormon pinaagi sa gasa ug gahum sa Dios. Ang Urim ug Thummim, nga gihisgutan diha sa Basahon ni Mormon, gilubong uban sa mga palid. Sa dihang gihatag ni Moroni ang bulawang mga palid kang Joseph, gihatag usab niya kaniya ang Urim ug Thummim. Ang bato sa manalagna, nga gigamit usab ni Joseph sa paghubad, wala gilubong uban sa mga palid. Usa kini ka butang nga nakit-an mismo ni Joseph pipila ka tuig ang milabay nga nakatabang niya nga mobati nga nahiangay sa espirital nga pagpadayag. Busa, gigamit niya ang duha.

Si Emma Smith, nga usa sa iyang mga tigsulat, nahinumdom wala madugay nga sa matag higayon nga molingkod si Joseph aron mosugod na usab sa paghubad, dili siya mangutana, “Asa na ko dapit? Asa ta dapit mihunong?” Moderetso ra siya og sugod diha gayud sa punto kon asa sila mihunong. Kon motan-aw mo og usa ka pahina sa personal nga journal ni Joseph Smith nga iyang gisulat tulo ka tuig human sa paghubad sa Basahon ni Mormon, puno kini sa gipangkurisan nga mga pulong, dili kompleto nga mga hunahuna, ug putol-putol nga mga kapahayag [sentence]. Kon motan-aw kamo og usa ka pahina sa gidiktar nga Basahon ni Mormon, walay usa niana. Kompleto kini, nindot ang pagkahan-ay—kompleto ang mga kapahayag, walay gipangkurisan.

Kanang tanan makaikag nga hunahunaon, apan ang importante kanako mao ang mga sulod sa Basahon ni Mormon. Ang Basahon ni Mormon mao ang diin si Haring Benjamin mitudlo kanako sa pag-una sa pagkamanggihata-gon kay sa paghukom, diin si Alma mitudlo kanako kon unsay ipasabut kon ako mabunyagan, unsa ang akong saad nga buhaton alang sa uban ug sa akong isig ka Santos. Ang Basahon ni Mormon mao ang diin si Mormon ug Moroni mitudlo kanako mahitungod kon unsa ka importante ang gugmang putli ug unsay buhaton aron makabaton niini. Ang Basahon ni Mormon mihulma kon kinsa ako ug kon unsa ang akong pagtan-aw sa kalibutan.







Nganong nagbuhat sila sa dinaghan nga kaminyoon sa unang mga adlaw sa Simbahan?

Ni Kate Holbrook

Ang instruksyon sa Basahon ni Mormon mahitungod sa dinaghan nga kaminyoon miingon nga ang tinagsa nga kaminyoon [monogamy] maoy gusto sa Ginoo alang sa Iyang mga katawhan, apan adunay mga eksepsyon kon Siya mosugo sa pagbuhat sa dinaghan nga kaminyoon aron sa pagpasanay og matarung nga mga katawhan (tan-awa sa Jacob 2:30). Mao kini ang talagsaong eksepsyon nga gisugo si Joseph Smith sa pag-establisar. Naglangay-langay si Joseph sulod sa mga katuigan sa pagbuhat niini, apan sa katapusan iya kining gi-implementar tungod kay gusto siya nga magmasulundon sa sugo sa Dios kaniya. Misulay siya sa pagbuhat sa dinaghan nga kaminyoon sa tunga-tunga sa mga 1830s, apan niadtong 1841 lamang nga hinay-hinay, mas opisyal, niyang gisugdan ang pagpaila sa buhat ngadto sa iyang sinaligan nga mga kauban. Nakalitan sila. Nangamuyo sila pinaagi sa pag-ampo ngadto sa ilang Amahan sa Langit aron makasabut niini nga baruganan, ug nakadawat sila og personal nga espirituhanong mga saksi nga husto kini alang kanila niana nga panahon.

Ang dinaghan nga kaminyoon, opisyal nga gibuhar sulod sa 50 ka tuig, usa ka butang nga ang mga tawo mahimong makapili. Ang mga eskolar naningkamot sa pagtino kon pila gayud ka hamtong nga mga Santos sa Ulahing mga Adlaw ang miapil sa dinaghan nga kaminyoon, apan nasayud kita nga sa kinatibuk-an nga minoriya ra sa mga Santos. Ug nasayud kita nga daghan kanila ang labing mapahinunguron, lig-on nga mga miyembro sa atong Simbahan. Niadtong 1890, si Presidente Wilford Woodruff (1807–98) miisyu og manipesto nga nagtapos sa buhat sa dinaghan nga kaminyoon. Sa dihang ang pipila ka mga tawo nakadungog niini nga manipesto, nahuwasan sila. Ang dinaghan nga kaminyoon lisud alang kanila. Sa dihang ang ubang mga tawo nakadungog niini nga manipesto, nahugno sila. Daghan kaayo sila og gisakripisyo, ug duna silay mga pagpamatuod niini nga baruganan.

Pipila ka mga miyembro sa Simbahan naghunahuna kon unsa ang kahulugan sa atong nangagi nga binuhatan sa dinaghan nga kaminyoon alang sa sunod nga kinabuhi. Ang mga lider sa Simbahan nagtudlo nga ang dinaghan nga kaminyoon wala kinahang-lana alang sa kahimayaan o sa mahangturong himaya. Bisan tuod personal ko nga mapasalamaton nga ang tinagsa nga kaminyoon mao ang lagda ug ang dinaghan nga kaminyoon mao ang eksepsyon, dili nako ipakaminos ang mga pagpamatuod ug dungganon nga pagkamasulundon sa atong espiritwal nga katigulangan kinsa mibuhar niini nga baruganan. Nagmasulundon sila, ug sila adunay usa ka pagpamatuod nga kini husto.



Templo ug mga Pakigsaad

Sa Kirtland, Ohio, usa sa talagsaong mga butang nga nahitabo mao ang pagtukod ug pagpahinungod sa Templo sa Kirtland. Ang pagpahinungod nga pag-ampo, nga nadawat ni Joseph Smith pinaagi sa pagpa-dayag, makita diha sa ika-109 nga seksyon sa Doktrina ug mga Pakigsaad. Niana nga pag-ampo mihangyo siya sa Ginoo sa pagdawat sa pagkahimo ug pagsakripisyo sa mga Santos sa pagtukod sa templo.

Usa ka semana human sa pagpahinungod sa templo, si Joseph Smith ug si Oliver Cowdery adunay laing panan-awon. Nahitabo kini sa Pasko sa Pagkabanhaw, nga mao usab ang Pagpalabay. Ang Ginoo miabut diha sa panan-awon ug midawat sa balay. Misulti Siya sa mga Santos nga sila kinahanglang maglipay kay, “uban sa ilang kusog, nagtukod niini nga balay sa akong ngalan” (Doktrina ug mga Pakigsaad 110:6). Human matapos ang panan-awon, tulo ka karaang mga propeta ang mipakita: si Moises, kinsa mipahiuli sa mga yawe sa pagpundok sa Israel gikan sa upat ka bahin sa yuta; si Elias, kinsa mitugyan sa dispensasyon sa ebanghelyo ni Abraham; ug si Elias, kinsa mipahiuli sa mga yawe sa gahum sa pagbugkos (tan-awa sa Doktrina ug mga Pakigsaad 110:11–16).

Ang pagpahiuli niadtong mga yawe importante gayud kaayo sa pagpatuman sa mga katuyoan sa Ginoo. Gikinahanglan nato dili lamang ang Basahon ni Mormon apan ang kadtong mga yawe ug mga ordinansa sa templo usab. Kadto nga mga yawe mas labing importante karon.

Akong namatikdan nga kon usa sa Napu-log Duha ka mga Apostoles ang tawagon nga mahimong propeta, ang iyang kasing-kasing motutok ngadto sa mga ordinansa sa templo sa labing talagsaong paagi. Pribilehiyo nako nga maanaa sa pagpahinungod sa Nauvoo Illinois Temple uban ni Presidente Gordon B. Hinckley (1910–2008). Nakahinumdom ko kon unsa ka lawom

ang iyang pagbati nga natukod kini nga templo ug unsa ka importante ngadto kaniya ang pagdala og mga templo ngadto sa mga Santos. Si Presidente Thomas S. Monson (1927–2018) mipadayon niana nga paningkamot ug nakadawat sa sama nga inspirasyon gikan sa langit nga nadawat ni Presidente Hinckley. Ug nakita nato kana nga inspirasyon sa mahinungdanong paagi diha ni Presidente Russell M. Nelson. Ang responsibilidad sa pagkaprope- ta miabut na diha kaniya, ug siya adunay usa ka dugang nga pagbati sa kabililhon sa mga ordinansa sa templo.

Usa sa iyang unang mga men- sahe isip Presidente sa Simbahan mao ang pag-awhag sa mga tawo sa pag-adto sa templo, modawat sa ilang mga ordinansa, ug magpabilin sa dalan sa pakigsaad. Pagkahuman niana, miingon siya nga kon ikaw sa bisan unsang rason napahilayo gikan sa dalan sa pakigsaad, balik diha niana nga dalan.³



Sa unsang paagi ang buhat sa templo mipanalangin sa nahaunang mga Santos sa Ulahing mga Adlaw?

Ni Matt Grow

Sa dihang namatay si Joseph Smith, ang mga bungbong sa Templo sa Nauvoo wala pa sa katunga ang nahuman, ug wala madugay naklaro ni Presidente Brigham Young (1801–77) nga ang mga Santos abugon pag-usab. Busa nangutana siya sa Ginoo: “Angay ba kaming magpabilin dinhi ug mohuman sa templo nasayud nga biyaan ra dayon namo kini kon mahuman na, o mobiya na kami karon?” Klaro nga miabut ang tubag, “Pabilin” (tan-awa sa Brigham Young diary, Ene. 24, 1845, Church Archives; Ronald K. Esplin, “Fire in His Bones,” *Ensign*, Mar. 1993, 46). Ang mga ordinansa sa pagtuga ug pagbugkos importante kaayo nga ang mga Santos kinahanglan nga magpabilin.

Ug busa pagkasunod tuig, mihatag sila sa ilang tanang kapanguhaan ngadto sa pagtukod sa templo. Paingon sa katapusan, ang ilang mga balay gisunog palibut sa Nauvoo, ug ang mga Santos nangandam sa pag-adto sa kasadpan samtang ilang gihuman ang templo. Sa Disyembre 1845, adunay igong nahuman sa templo nga ang mga Santos makapahinungod og bahin niini, makahatag og mga pagtuga niadtong kinsa takus, ug makabugkos sa mga bana ug mga asawa sa usag usa.

Sa misunod nga pipila ka bulan, kanunay silang nagtrabaho sa pag-andam sa tanan sa espirituhanong paagi alang sa dakong panaw padulong sa kasadpan. Alang kanako importante ug sagrado nga nasilyo ko sa samang gahum ngadto sa akong asawa, mga anak, mga ginikanan, ug mga henerasyon nga nag-una ug sa mga henerasyon nga moabut pa. Mao kana ang nahimong posible sa Pagpahiuli.



Makapaambit ka ba og usa ka hitabo gikan sa Pagpahiuli nga nakapalig-on sa imong pagpamatuod?

Ni Kate Holbrook

Akong nahinumduman ang istorya ni Emma Smith nga misulay sa pag-eskapo sa pagpanggukod sa Missouri. Bahin lang sa Suba sa Mississippi ang mikaging—dili igo nga ang usa ka karwahe nga adunay mga tawo ug ang ilang mga kabtangan makabiyahe niini. Kini usa ka lapad nga suba, ug makuyaw ang pagtabok niini. Si Emma adunay sais anyos nga bata nga nagkupot sa usa ka bahin sa iyang sayal, usa ka otso anyos sa pikas nga bahin, usa ka dos anyos niini nga bukton, ug usa ka masuso sa pikas nga bukton.

Ang bayaw nga babaye sa usa sa mga tigsulat ni Joseph mitahi og cotton nga mga bag nga mibatoni libut sa hawak. Niana nga mga bag ubos sa iyang sayal, gidala ni Emma ang bugtong nga kopya sa hubad ni Joseph sa Biblia, diin siya nagtrabaho sulod sa pipila ka bulan. Uban sa mga dokumento ug sa iyang mga anak, hinay-hinay siyang milakang tabok sa mikaging nga suba, naglaum nga siya dili mabuwat.

Alang kanako, mao kana ang kinadak-ang timaan sa kaisug ug hugot nga pagtuo—nga kon kinahanglan ninyo mobuhat og usa ka butang alang sa unsay inyong gituohan, padayon lang kamo gayud, mopadayon sa pagbuhat sa ginagmay nga mga butang aron mouswag bisan kon kini malisud o daw walay bili.



“Pagmalipayon”

Daghan kaninyo adunay mga pagsulay ug mga kagul-anan. Ang uban niana moabut tungod kay adunay kabubut-on. Ang uban niana moabut tungod kay adunay kaaway. Apan kinahanglan ninyong masayaran nga duna kitay mahigugmaong Amahan sa Langit ug nga ang Pag-ula ni Jesukristo makapanalangin kanato sa mga paagi nga tingali dili nato hingpit nga masabtan.

Pipila ka mga historian miingon nga ang gidaghanon sa mga Santos kinsa milayag gikan sa Missouri ngadto sa Nauvoo atol sa tingtugnaw sa 1838–39 ingon ka daghan sa 8,000. Tingtugnaw kadto. Asa man si Joseph? Didto siya sa Bilanggoan sa Liberty, naguol sa unsay gisinati sa mga Santos. Mibati siya nga gibiyaan siya.

Nianang walay klaro nga kahimtang, nadawat niya ang pipila sa labing nindot nga mga kasulatan—ang mga seksyon 121, 122, ug 123 sa Doktrina ug mga Pakigsaad. Mahinungdanon kini. Nanghinaut ko nga basahon ninyo kini. Ang *Mga Santos* adunay mubo nga asoy niini nga panghitabo:

“Nangaliyupo si Joseph alang sa inosente nga mga Santos. ‘O Ginoo,’ nangamuyo siya, ‘hangtud kanus-a sila mag-antus niini nga mga kadautan ug dili makatarunganon nga mga pagdaug-daug, sa dili pa malukmay ang imong kasingkasing ngadto kanila?’

“Akong anak, kalinaw nganha sa imong kalag,” mitubag ang Ginoo. ‘Ang imong kalisdanan ug ang imong kasakitan sulod lamang sa mubo nga higayon; ug unya, kon ikaw molahutay pag-ayo, ang Dios mobayaw kanimo sa kahitas-an; ikaw magmadaugon ibabaw sa imong tanan nga mga kaaway.’

“Ang Ginoo mipasalig kang Joseph nga wala siya makalimti. ‘Kon ang mga apapangig gayud sa impyerno mobuka ug moabli sa baba og dako diha kanimo,’ ang Ginoo miingon kang Joseph, ‘ikaw masayud, akong anak, nga kining tanan nga mga butang makahatag kanimo og kasinatian ug alang sa imong kaayohan.’

“Gipahinumduman sa Manluluwas si Joseph nga ang mga Santos dili mag-antus nga labaw pa sa unsay Iyang nasinati.

Nahigugma Siya kanila ug makahimo sa pagtapos sa ilang kasakit, apan gipili hinoon Niya nga mag-antus og kalisdanan uban kanila, midala sa ilang kaguol ug kasubo isip kabahin sa Iyang maulaong sakripisyo. Ang maong pag-antus mipuno Kaniya og kalooy, mihatag Kaniya og gahum sa pagtabang ug paglunsay sa tanan nga modangup Kaniya sa ilang mga pagsulay. Giawhag Niya si Joseph nga magpadayon ug misaad nga dili gayud mosalikway kaniya.”

Nagtuo si Elder Heber C. Kimball (1801–68) nga ang mga maghuhukom sa Korte Suprema sa Missouri mopagawas kang Joseph, apan mihukom sila nga dili. Si Heber mibalik ngadto sa Bilanggoan sa Liberty ug, wala gitugutan nga mosulod ngadto sa prisohan, mitawag ngadto kang Joseph uban sa dili maayong balita.

Si Joseph mainiton ug mahigalaon ngadto kaniya. “Pagmalipayon,” miingon siya. Dayon misugo siya ni Heber nga “ipalayo ang tanang mga Santos sa labing dali kutob sa mahimo.”⁴

Adunay usa ka leksyon alang kanimo niana: pagmalipayon bisan unsa pa ang inyong mga hagit. Kon adunay piho nga mga butang nga motintal kaninyo, palayo gikan niini. Mosalig sa Espiritu Santo. Ang ehemplo ni Joseph sa Bilanggoan sa Liberty ug ang mga Santos nga mibiya sa Missouri padulong sa Nauvoo maoy nindot nga mga ehemplo sa kalig-on ug hugot nga pagtuo diha ni Ginoo Jesukristo.

Isip usa ka Apostol, mosaksi ko kang Jesukristo. Usa ako ka siguradong saksi sa Iyang kabalaan. Gusto nakong masayud kamo nga Siya naggiya ug nagdumala sa Simbahan sa paagi nga mopanalangin kanatong tanan. Mopamatuod ko kaninyo nga Siya buhi. ■

Aron sa pagtan-aw sa tibuok nga debosyonal, adto sa devotionals.ChurchofJesusChrist.org.

MUBO NGA MGA SULAT

1. Kini nga mga kapanguhaan makita sa history.ChurchofJesusChrist.org.
2. Tan-awa sa Orson F. Whitney, *Life of Heber C. Kimball* (1945), 327.
3. Tan-awa sa Russell M. Nelson, “Samtang Dungan Kita nga Magpadayon sa Unahan,” *Liahona*, Abr. 2018, 7.
4. Tan-awa sa *Mga Santos: Ang Istorya sa Simbahan ni Jesukristo sa Ulahing mga Adlaw, Vol. 1, Ang Sumbanan sa Kamatuoran: 1815–1846* (2018), 442–444; saints.ChurchofJesusChrist.org.

Paghulagway sa mga Pioneer didto sa India

Ni Taunalyn Rutherford

Adjunct nga propesor, Religious Education,
Brigham Young University

Ang pakig-himamat sa pioneer nga mga miyembro sa Simbahan sa India nakapasab sa akong paghulagway sa mga pioneer.

“Sa matag higayon nga maghunahuna ko mahitungod sa mga pioneer,” sama sa kanta sa Primary, “Maghunahuna ko sa maisug nga mga babaye ug mga lalaki.”¹ Ang mga istorya sa mga pioneer nga Santos sa Ulahing mga Adlaw kinsa matinud-anong mibuhat og mga butang nga wala pa mabuhat sa uban kanunay midasig kanako. Isip usa ka batan-ong inahan, ang mga istorya sa pioneer nga mga babaye mipahinumdom kanako sa akong mga panalangin sa ulahing mga adlaw. Mahimo kong manganak sa usa ka ospital kay sa usa ka kariton!

Ang kahulugan sa pioneer mao ang “usa ka tawo kinsa mag-una aron sa pag-andam o pagbukas og agianan aron mosunod ang uban”² naghulagway sa mga pioneer nga Santos sa Ulahing mga Adlaw diha sa mga agianan sa karomata ug kariton nga nagpundok ngadto sa Zion. Apan kini naghulagway usab sa moderno nga mga pioneer ug sa matinud-anong mga desisyon nga gibuhhat nila sa tibuk kalibutan.

Niadtung ang akong lima ka anak na-enroll na sa eskwelahan, misugod ko sa graduate studies sa relihiyosong kasaysayan. Mipili ko



Usa ka misyon ang naestablisar sa Bangalore niadtong 1993, ug usa ka templo ang tukuron sa dili madugay dinhi.

sa pagsiksik sa Ang Simbahan ni Jesukirsto sa mga Santos sa Ulahing mga Adlaw sa India isip hilisgutan alang sa akong PhD dissertation. Ang akong pagsiksik sa India nakapausab sa akong paghulagway sa mga pioneer.

Mga Haligi sa Simbahan

Sa mga tuig nga milabay, isip usa ka batan-ong estudyante sa kolehiyo niadtong 1986, mibiyahe ko sa Habagatang Asya uban sa Brigham Young University Young Ambassadors. Usa kadto ka makapausab sa kinabuhi nga kasinatian nga naglakip sa paggahin og usa ka adlaw sa Calcutta (karon gitawag og Kolkata) uban ni Mother Teresa. Samang makapahinam usab ang pakighimamat sa mga Santos sa Ulahing mga Adlaw kinsa mao ang mga modernong pioneer sa India ug Sri Lanka.

Usa niini nga mga miyembro mao si Raj Kumar, kinsa nakakaplag sa Simbahan sa dihang mitambong siya og usa ka pasundayag sa BYU Young Ambassadors niadtong 1982. Niadtong nahimamat namo siya, bag-ohay lang siyang miuli gikan sa iyang misyon didto sa Fresno, California, USA. Gisul-ob gihapon niya ang iyang name tag isip misyonaryo ug



Niadtong 1986, akong nahimamat si Raj Kumar human sa iyang misyon. Nagsul-ob gihapon sa iyang misyonaryo nga name tag, siya mipaam-bit sa ebanghelyo ngadto ni bisan kinsa nga maminaw.



Ang mga igsoong Suvarna ug Sarala Katuka mipasakop sa Simbahan niadtong 1984 ug sa wala madugay miserbisyo og mga misyon.

mipadayon sa pagtudlo ni bisan kinsa nga maminaw sa Delhi. Si Raj mao ang usa sa mga 600 ka mga miyembro sa India niadtong panahona, apan alang kanako sama siya sa usa ka nag-inusarang Santos sa Ulahing mga Adlaw sa gatusan ka minilyon nga mga tawo.

Nadasig ko sa ehemplo ni Raj Kumar samtang mipili ko sa pagserbisyo og usa ka misyon. Si Raj usab matinud-anong mihimo og mga butang nga wala pa mabuhat sa uban alang sa pipila sa unang lumad nga Indian nga mga misyonaryo sa pagserbisyo sa nasud. Si Suvarna Katuka ug ang iyang mga isig ka misyonaryo nakadawat og pagbansay sa misyonaryo sa Chennai. Ang ilang presidente sa misyon, nga nahimutang sa Singapore, mi-assign ni Raj sa paghatag kanila og dugang nga pagbansay sa Delhi.

Nahinumdom si Suvarna Katuka kon sa unsang paagi nausab ang ilang misyonaryo nga buhat tungod sa ehemplo ug pagbansay ni Raj Kumar. Napulihan nila ang ilang mga pagbati sa kahadlok sa mas dakong pagtuo ug kaisug. Mipasabut si Suvarna, “Mao siguro kadto ang pagsugod sa akong tinuod nga pagkakabig. Mibati ko sa Espiritu Santo, ug mao kadto nga nakahukom ko nga motabang sa pagtukod sa gingharian dinhi sa India.”³

Nagpasakop si Suvarna sa Simbahan didto sa Rajahmundry. Siya, kaban ang lima ka mga igsoong lalaki ug usa ka igsoong babaye, nabun-yagan niadtong 1984. Sa adlaw sa iyang bunyag, si Suvarna gi-orden nga usa ka pari ug gi-set apart isip ang ikaduhang magtatambag sa kapangulohan sa branch. Gisaaran usab siya sa usa ka panalangin nga



Sila Elder Kandavalli, Sharma, Katuka, ug Raju.



Ang pamilya ni Elsie ug Edwin Dharmaraju sa adlaw nga sila gibunyagan.

Ang mapahinun-
ngurong pagser-
bisyo sa daghang
mga miyembro
sa Simbahan sa
India tinud-anay
nga mihimo kanila
nga mga haligi sa
Simbahan.

kon magpabilin siyang matitud-anon, mahimo siyang usa ka “haligi sa Simbahan sa India.”

Ang igsoong babaye ni Suvarna, si Sarala, miserbisyo usab og usa ka misyon. Sa wala pa siya mobiya, siya mipaila sa ebanghelyo ngadto sa iyang higala nga si Swarupa. Sa dihang mibalik si Suvarna gikan sa iyang misyon, napanalangin siya pinaagi sa misyonaryo nga buhat sa iyang igsoong babaye ug giminyoan si Swarupa. Ang kadtong gamay nga branch sa Rajahmundry nahimong usa ka stake na karon. Daghang mga returned missionary gikan sa Rajahmundry nahimong mga lider sa Simbahan sa tibuok India.

Nahimamat nako ang mga anak ni Suvarna ug Swarupa Katuka samtang nagtudlo sa BYU niadtong 2014. Si Josh Katuka bag-ohay lang nakahuman sa pagserbisyo og misyon sa Bangalore, India, ug ang iyang igsoong babaye, si Timnah, bag-o lang nakadawat sa iyang tawag sa samang misyon. Sa dihang nangutana ko nila ni Timnah ug Josh kon nakaila ba sila ni Raj Kumar, miingon sila, “Oo, siya ang among tiyo!” Giminyoon ni Raj Kumar si Sarala.

Mapasalamaton ko sa mga Katuka sa pagpaila-ila nako ngadto sa pipila ka mga pioneer samtang mitabang sila nako sa pagbiyahe sa India. Daghan kanila makasubay sa ilang pioneer nga gigikanan balik ngadto sa gugma ug ehemplo sa pamilyang Katuka. Sa usa ka

higayon, si Suvarna ug Swarupa adunay oportunidad nga molalin ngadto sa Canada. Apan wala sila mipadayon niini tungod kay mibati sila nga ang Ginoo nagkinahanglan kanila nga magpabilin sa India ug motukod sa gingharian sa Dios didto. Ang ilang mapahinun-
ngurong pagserbisyo tinud-anay nga mihimo nila nga mga haligi sa Simbahan.

Pioneer nga mga Miyembro sa Bengaluru ug Hyderabad

Atol sa katapusang katunga sa ika-20 nga siglo, ang Simbahan naestablisar sa nagkalain-laing mga siyudad sa India pinaagi sa pioneer nga mga miyembro.⁴ Ang matag istorya nag-saksi kon sa unsang paagi ang Ginoo nag-dala og mga tawo ngadto sa gipahiuli nga ebanghelyo.

Si Michael Anthoney, usa ka pioneer nga miyembro sa Bangalore (karon Bengaluru), milagrusong nakonektar sa usa ka miyembro sa Simbahan niadtong 1970. Sa dihang si Delwin Pond, usa ka bishop sa Utah, miadto sa usa ka chiropractor tungod sa sakit sa likod, nakakita siya og artikulo sa magasin sa opisina sa chiropractor alang sa usa ka dili pangnegosyo nga organisasyon nga nag-sponsor og mga estudyante sa India. Mibati siya og usa ka kusog nga pagdasig nga mosuporta sa usa sa mga estudyante niini. Kini misangpot sa



Gipaila ni Delwin Pond (tunga) si Michael Anthony ngadto sa Simbahan niadtong 1981.



Hyderabad, usa ka syudad nga may sobra 8 million ka tawo ug lugar sa una nga stake sa India.

10 ka tuig sa wala mailhi nga komunikasyon nga natapos sa pagkontak sa mga Pond kang Michael ug sa pagpaambit sa ebanghelyo kaniya. Si Michael nabunyagan niadtong 1981 ug miserbisyo og misyon sa Siyudad sa Salt Lake niadtong 1982. Miuli siya og sayo tungod kay ang iyang inahan grabe nga nasakit, mao nga siya mialagad sa katapusang tulo ka bulan sa iyang misyon sa Bangalore, diin gitudloan niya ang pipila sa iyang mga higala ug ubang mga tawo nga nahimong mga miyembro sa unang branch didto.⁵ Karon adunay mga plano na sa pagtukod og templo sa Bengaluru.

Si Elsie ug Edwin Dharmaraju mipasakop sa Simbahan sa Samoa ug gitawag ni Presidente Spencer W. Kimball sa pagbalik sa ilang panimalay sa Hyderabad isip mga misyonaryo ngadto sa ilang pamilya. Niadtong 1978, 22 ka mga sakop sa pamilya sa Elsie ug ni Edwin nabunyagan, ug gikan niini nga sinugdanan ang unang stake sa nasud naorganisar sa Hyderabad niadtong 2012.⁶

Ang mga miyembro karon sa Stake sa Hyderabad naghulagway sa ilang mga kaugalingon isip mga pioneer sa ulahing mga adlaw. Ang ilang mga pagsaulog sa stake sa Adlaw sa Pioneer naghinumdom sa panaw sa nahaunang mga pioneer ingon man usab sa mga panaw sa modernong pioneer. Ang ilang mga pagsaulog naglakip sa eskwala nga pagsayaw, paghinumdom nga mga pag-hike, ug gani mga pagsakay sa kariton.

Sa ilang 2014 nga pagsaulog sa Adlaw sa Pioneer, mibutang sila og usa ka laray sa mga bloke nga yelo sa luyo sa simbahan ug midapit sa mga miyembro sa pagtangtang sa ilang mga sapatos ug sa paglakaw latas sa yelo, nga naghunahuna mahitungod kon sa unsang paagi ang nahaunang mga pioneer milatas sa mikaging nga mga suba. Sa pagtapos sa ilang pagsaulog, ang mga miyembro sa stake sa Hyderabad giawhag sa paghinumdom sa diwa sa nahaunang mga pioneer ug nga “silang tanan mga pioneer alang sa ilang mga pamilya.”⁷

Naminaw usab sila ni John Santosh Murala, kaniadto nagserbisyo sa kapangulohan sa misyon, nga naghigut kon sa unsang paagi ang iyang tiya nga si Elsie ug tiyo nga si Edwin Dharmaraju miadto sa Hyderabad sa pagtudlo sa ilang pamilya sa ebanghelyo. Si John mao ang kinamanghuran sa 22 ka pioneer nga mga miyembro nga nabunyagan niadtong 1978.

Sa dihang mibisita ko sa Hyderabad niadtong 2014, si John Murala misugilon kanako sa iyang istorya ug daghan sa kasaysayan sa Simbahan nga makugihon niyang gipundok. Mipaila usab siya kanako sa



Si Annapurna ug John Murala, kinsa pioneer nga mga miyembro sa Hyderabad, gipakita dinhi nga mitabang uban sa subling pag-akto sa usa ka panaw sa kariton ug sa adlaw nga sila nabugkos didto sa Hong Kong Temple.



Ang mga miyembro sa stake sa Hyderabad, nagsaulog sa Adlaw sa Pioneer pinaagi sa kanta, sayaw, ug gani sa mga pagsakay sa kariton.



Ang stake center sa Hyderabad India Stake, gi-organisar niadtong 2012 ni Presidente Dallin H. Oaks.

Ang mga miyembro sa Simbahan sa India naghulagway sa ilang mga kaugalingon isip mga pioneer sa ilang mga pamilya samtang nagpadayon sila sa pagsunod sa ebanghelyo.

iyang asawa, si Annapurna, kinsa misugilon kanako sa usa sa labing gamhanang mga istoriya sa pioneer sa Ulahing mga adlaw nga akong sukad nadungog.

Si Annapurna nag-edad og 12 anyos niadtong 1991 sa dihang ang iyang igsoon nga lalaki nga si Murthy natudloan sa ebanghelyo pinaagi sa duha ka mga misyonaryo sa Hyderabad. Ang mga ginikanan ni Annapurna wala mitugot kaniya sa pagpaminaw sa mga misyonaryo o sa pagtambong sa simbahan. Hinoon, si Murthy mihatag kaniya og usa ka Basahon ni Mormon ug usa ka padayong suplay sa literatura sa Simbahan aron basahon niya. Sulod sa pito ka tuig, si Annapurna nagtuon sa ebanghelyo sa iyang kaugalingon ug nakaangkon og lig-on nga pagpamatuod sa kamatuoran niini. Nangandoy siya nga mabunyagan, magserbisyo og misyon, ug maminyo sa templo apan walay pagtugot gikan sa iyang mga ginikanan.

Nag-atubang si Annapurna og lisud nga desisyon sa iyang kinabuhi sa dihang gipailaila siya ngadto ni John Murala. Si John nagpabiling lig-on sa iyang pagpamatuod sukad sa iyang pagpabunyag niadtong 1978 ug nangita og usa ka miyembro sa Simbahan nga minyoan. Human sa usa ka mubo kaayo nga miting diin si Annapurna mipaambit sa iyang

pagpamatuod sa ebanghelyo, nakombinser si John nga iya nang nahimamat ang iyang umabot nga asawa. Nasayud si Annapurna nga kon minyoan niya si John, mahimo siyang mabunyagan ug usa ka adlaw mabugkos sa templo. Apan, sa samang higayon, ang mga ginikanan ni Annapurna nagplano sa pagpakigsabut og usa ka kaminyoon alang kaniya.

Si Annapurna mihimo sa lisud nga desisyon nga mobiya sa panimalay ug makigminyo ni John. Mibati siya nga kini lang ang bugtong nga paagi nga siya mahisakop sa Simbahan. Miingon siya nga siya “nagmagul-anon gayud” nga mobiya sa iyang mga ginikanan. Apan bisan gani karon siya mipamatuod, “Alang sa kaluwasan sa tanan, . . . alang sa akong kaluwatan ug alang sa akong mga ginikanan ug sa ilang mga katigulangan, sa paghimo sa ilang buhat sa templo, kinahanglan nakong himoon kadto nga lakang.”⁸

Mapasalamaton si John ug Annapurna nga ang iyang mga ginikanan midawat na karon sa ilang kaminyoon. Daghang mga miyembro sa India ang mihimo og mga sakripisyo, sama sa nahaunang mga pioneer, aron mahimong mga miyembro sa Simbahan. Apan kini nga mga Santos mipadayon sa unahan uban sa hugot nga pagtuo tungod kay sila naghulagway sa



Artist rendering (hubad sa usa ka artist) sa Templo sa Bengaluru India. Kini nga site maglakip og usa ka meetinghouse, usa ka distribution center, mga opisina sa Simbahan, ug balay para sa mga parokyano sa templo.

ilang mga kaugalingon isip mga pioneer ug sumpay alang sa ilang mga pamilya sa duha ka habig sa tabil. Akong gimahal ang daghang mga istorya sa pagtuo, sakripisyo, ug kaisug nga akong nadungog gikan sa mga miyembro nga matinud-anong mihimo og mga butang nga wala pa mabuhat sa uban diha sa bag-ong mga utlanan sa ebanghelyo. Naghunahuna gihapon ko mahitungod sa mga pioneer nga mibira sa mga kariton ug milabang sa mikaging nga mga suba, apan akong mahulagway na karon ang modernong mga pioneer didto sa India ug sa tibuok kalibutan.

Sa katapusan, ang tanan nga matinud-anong mga pagpili nga wala pa mabuhat sa uban gibuhat sa mga indibidwal nga nagsunod sa mga tunob sa Manluluwas nga si Jesukristo. Diha sa Bag-ong Tugon, si Kristo gitawag og

“mag-uugda sa [atong] kaluwasan” (tan-awa sa Mga Hebreohanon 2:10). Si Jesukristo miandam sa agianan alang kanato nga makabalik sa atong langitnong panimalay. Ang tinuod nga mga pioneer mosunod ug nagtudlo kanato ngadto kang Kristo, kinsa mao ang nangulo niining kahi-bulongan nga buhat ug katingalahan sa ulahing mga adlaw. ■

MUBO NGA MGA SULAT

1. “Whenever I Think about Pioneers,” *Children’s Songbook*, 222–23.
2. *Oxford English Dictionary* (1971), “Pioneer.” Tan-awa usab sa Thomas S. Monson, “Gigiyahan sa Espiritwal nga mga Pioneer,” *Liahona*, Ago. 2006, 3.
3. Suvarna Katuka, interbyu sa giasoy nga kasaysayan pinaagi ni Taunalyn Rutherford, Mayo 2014, Delhi, India.
4. Daghan sa mga istorya sa mga pioneer nga gikan sa India makita sa Church History nga seksyon sa Gospel Library ubos sa “Global Histories.”
5. Tan-awa sa “A History of the Church in India,” comp. Jerry C. Garlock (unpublished, 1995), 49–50.
6. Tan-awa sa “I Will Establish a Church by Your Hand,” history.ChurchofJesusChrist.org.
7. Tan-awa sa “Hyderabad Stake Pioneer Day Activity,” lds.org.in/hyderabad-stake-pioneer-day-activity.
8. Annapurna Guru Murala, interbyu sa giasoy nga kasaysayan pinaagi ni Taunalyn Rutherford, Hyderabad, India, Mayo 7, 2014. Tan-awa usab sa Rochelle Welty ug Jan Pinborough, “Ang Dios Adunay Iyang Kaugalingong mga Plano alang Kanako,” *Liahona*, Abr. 2003, 30–32.



Ni Travis Ewell

Pipila ka tuig ang milabay, ako nagsunod og usa ka panag-istoryahanay diha sa social media tali sa duha nako ka mga kanhi kompanyon sa misyon. Kining mga tawhana akong gihigugma ug gitahud.

Nanaghisgut sila sa ilang mga pangutana mahitungod sa Simbahan ug sa doktrina niini. Sa wala madugay naklaro nga silang duha mibiya sa Simbahan. Nakapahikurat kini ug nakahasol nako. Wala na gayud ko nakadungog og pipila ka mga butang nga ilang gihisgutan. Mibati ko og panginahanglan nga akong masayran kon kining mga butanga aduna bay gibug-aton. Busa nagsugod nako sa pagpangita niadtong mga argumento niadtong kinsa adunay mga kabalaka mahitungod sa Simbahan.

Pipila sa mga butang nga akong gibasa sulod sa duha ka tuig nakapahimo nako sa pagpangutana mahitungod sa Simbahan. Ang uban nga makasinati niini mobati og kaguol. Sila nagsubo tungod sa pagkawala sa ilang hugot nga pagtuo. Nasuko ko. Akong gibati nga ang Simbahan milingla kanako. Dili ko sigurado unsa ang tinuod o kinsa akong masaligan.

Naglisud na ko sa pag-adto sa simbahan. Mihangyo ko nga magpa-release sa akong calling. Ang akong relasyon uban sa akong asawa, si Cheri, ug sa akong pamilya gisakit. Nagpadayon ko sa pagsimba, apan kini pakitang tawo lang ug sa pagpaningkamot nga magkauban ang akong pamilya. Ang kinabuhi samok. Dili nako mabati ang Espiritu ug mikwestyon ko kon mibati ba gayud kaha ko sa Espiritu Santo.

Sa dihang ang akong kamagulangang anak, si Kayson, mibiya sa iyang misyon, nagpakita ko og kamagulangang imbis kamaya unta sa okasyon. Human sa duha ka tuig, kadaghanan sa akong pamilya nasayud unsay akong giagian. Sa dihang miadto silang tanan sa templo uban ni Kayson sa unang higayon, wala ko didto.

Niining tanan, mibati ko nga nag-inusara.

Ang Suporta Nagpalibut Kanako

Usa ka adlaw ang akong mga igsoon nagkapundok aron istoryahon ko mahitungod sa unsay akong naagian. Wala gayud ko nakahinumdom sa unsay ilang gisulti,

Sa Dihang Gibati Nako nga Nalingla mahitungod sa Simbahan

Nganong mibiya ko. Ug nganong mibalik ko.



apan nasayud ko nga gihimo kini tungod sa paghigugma. Samtang kami nag-istorya, nagsugod ko sa pagkaamgo kon unsay nawala nako. Nakapadasig kini alang sa kausaban. Ako unta kadto ang nag-orden kang Kayson sa pagka-elder. Ako unta kadto ang naghatud niya ngadto sa templo. Ako unta kadto ang naghatag kaniya og panalangin sa amahan sa wala pa siya mobiya. Kadtong labing importanting mga panghitabo sa iyang kinabuhi gituyo nga maanaa ko, dili ang laing tawo. Nakahinumdom ko nga nakapangutana ko sa akong kaugalingon, “Unsay akong gibuhat?”

Wala madugay, usa ka buotan nga higala nadasig sa pagpaila-ila nako ngadto sa usa ka sakop sa iyang kapangulohan sa stake. Kining buotan nga tawo naminaw og maayo sa akong istorya ug ingon og nasayud na unsay akong isulti sa wala pa nako masulti. Nag-istorya kami sulod sa taas nga oras. Ang akong istorya, akong mga pangutana, ang katarungan nga ako nabantang susama kaayo sa unsay gipaambit sa uban ngadto kaniya. Misugod ko sa pagkaamgo nga adunay makatarunganon nga

mga tubag alang sa daghan sa akong mga kabalaka ug nga kadaghanan sa akong mga pangutana, samtang sinsero, gitisok gayud sa mga tawo nga dunay tumong sa pagguba sa hugot nga pagtuo.

Ang tanan ba nakong mga pangutana ug mga kabalaka nasulbad ba dayon? Wala, siyempre wala. Apan ang akong kasingkasing igo nga nalukmay aron mahibalo og usa ka talagsaong kamatuoran: ang mga pangutana maayo, apan ang ubang pangutana mas importante kay sa uban.¹ Ang pagkawala ba sa akong pamilya ug sa kahimtang atubangan sa Dios angay lang sa pipila ka wala matubag nga mga pangutana? Sa dihang gitutukan nako ang unang mga pangutana nga labing importante ug giuna sa pagpahimutang ang Dios diha sa akong kasingkasing, nagsugod ko sa pagkakita sa mga tubag nga naghatag og kasigurohan nako nga nahibalik nako sa husto nga dalan.

Ang akong presidente sa stake ug ang bishop mitabang usab kanako. Dako kaayo sila nga tabang ngari kanako ug makapadasig atol sa mga lisud nga panahon. Wala gayud sila moundang. Sila ug ang akong pamilya sa duha ka habig


sa tabil mao ang nahimong instrumento sa pagtabang kanako. Nasayud ko nga ang Langitnong Amahan nakaila ug nahigugma kanato. Siya mobutang sa mga tawo diha sa atong mga dalan kon kita nagkinahanglan nila. Gikinahanglan lang nga kita andam sa pagdawat sa ilang tabang.

Unsay Buhaton Kon Ikaw man Kini

Nasayud ko nga aduna pay uban diha kinsa susama ang kaagi. Mahimong ikaw o imong kaila.

Nasayud ko nga ang Manluluwas mitukod sa Iyang Simbahan pinaagi sa awtoridad aron mahatag ang mga ordinansa ug mga pakigsaad nga atong gikinahanglan aron makabalik ngadto Kaniya. Si Satanas nagmakunayon sa pagtrabaho aron maulawan ang Simbahan sa Ginoo gamit ang bisan unsa nga paagi nga posible. Ang pagpalakaw og mga pangutana ug pagmugna og mga pagduda sayon ra. Ang pagkahulog ngadto sa iyang mga laang mahitabo ngadto ni bisan kinsa. Ang pagsalig sa impormasyon ug mga tubag nga gihatag sa uban mahimong mas sayon kaayo kay sa pagdiskobre sa kamatuoran sa atong kaugalingon “pinaagi sa pagtuon ug *usab* pinaagi sa hugot nga pagtuo” (Doktrina ug mga Pakigsaad 88:118). Apan sa katapusan, kana ang gikinahanglan sa Dios.

Kon kamo nanlimbasug sa mga pangutana o pagduha-duha



Sa dihang gitutukan nako og una ang mga pangutana nga labing importante ug gihatag ang akong kasingkasing balik sa mga kamot sa Dios, nagsugod ko sa pagkaplag sa mga tubag nga misiguro kanako nga nahibalik ko sa husto nga dalan.

mahitungod sa Simbahan o sa inyong hugot nga pagtuo, dili ninyo makit-an ang kamatuoran pinaagi sa pagbasa og mga blog o sa pagpaminaw og mga podcast gikan niadtong wala mouyon sa Simbahan o mibiya niini. Apan kamo tingali usab dili matagbaw sa mabaw nga mga tubag, ug lagmit dili kamo ganahan og mga sugyot nga “dugay-dugayon ang pagtubag.”

Nakat-unan nako nga dili kita makasalig sa kahibalo sa uban, apan hinoon kita kinahanglan modangop ngadto sa Dios kinsa mao ang tinubdan sa tanang kahayag ug kamatuoran (tan-awa sa Doktrina ug mga Pakigsaad 93:26). Kita kinahanglan gayud nga magtuon niini diha sa atong mga hunahuna, apan kita kinahanglan gayud usab mangutana sa Dios kon ang atong gihunahuna matarung ba (tan-awa sa Doktrina ug mga Pakigsaad 9:8). Kinahanglang makat-on kita sa atong kaugalingon, sama sa gibuhat ni Joseph Smith (tan-awa sa Joseph Smith—Kasaysayan 1:20) ug magmapailubon sa atong pagpangita (tan-awa sa Alma 32:41). Apan ang pagkat-on pinaagi sa hugot nga pagtuo nagpasabut nga kinahanglan natong pamatud-an ang kamatuoran pinaagi sa pagsunod niini (tan-awa sa Juan 7:17; 1 Taga-Tesalonica 5:21).

Sa dihang nagtuon ko sa mga butang nga mialkontra sa Simbahan, akong gibati nga tinuod diha ako sa gabon sa kangitngit (tan-awa sa



WALA MATUBAG NGA MGA PANGUTANA BATOK SA MGA KASIGURADUHAN SA DOKTRINA

“Makalahutay ra ko uban sa pipila ka tawhanong mga sayop, gani taliwala sa mga propeta sa Dios—gilauman na kana kay kita mga mortal. Makalahutay ra ko sa gipatuo sa siyensya nga mosukwahi sa Basahon ni Mormon; moabut ang panahon nga makorihian ra kana. Ug makalahutay ra ko sa daw mga lahi nga panghitabo sa kasaysayan; ginagmay ra kana itandi sa kamatuoran. Apan dili ko makalahutay kon wala ang mga kamatuoran sa doktrina ug mga ordinansa nga gipahiuli ni Joseph Smith, dili

ko makalahutay kon wala ang pagkapari sa Dios aron panalanginan ang akong pamilya, ug dili ko makalahutay kon dili masayud nga ang akong asawa ug ang akong mga anak nabugkos ngari nako alang sa kahangturan. Kana ang pagpili nga atong giatubang—pipila ka wala matubag nga mga pangutana kon itandi sa daghang kamatuoran sa doktrina ug gahum sa Dios.”

Si Elder Tad R. Callister nagserbisyo sa Kapangulohan sa Seventy sa dihang siya mihatag niini nga pakigpulong, “Unsa Ang Blueprint sa Simbahan ni Kristo?” (Church Educational System nga debosyonal alang sa mga young adult, Ene. 12, 2014), broadcasts.ChurchofJesusChrist.org.



1 Nephi 8:23–24; 12:17). Kon ako mogunit sa pulong sa Dios ug mohimo sa unang lakang ngadto Kaniya, mao ra kana ang tanang gikinahanglan Niya aron mapadala ang Iyang Espiritu sa pagtandog sa akong kasingkasing.

Igo Ba ang Paglaum?

Pipila ka semana human mibiya si Kayson sa iyang misyon, ang akong presidente sa stake mibisita kanako. Ako siyang gisultihan kabahin sa unsay nahitabo atol niadtong mga semana human ang akong mga igsoong lalaki nakig-istorya kanako. Miingon ko nga gusto ko nga makakuha og bag-o nga rekomend sa templo. Nangutana siya kon matubag ba nako sa tukma nga paagi ang mga pangutana sa templo. Mitugan ko, “President, dili pa nako masulti nga Ako nasayud nga ang Simbahan tinuod, nanghinaut gyud ko sa tibuok kong kasingkasing nga mao kini. Ug akong isunod ang akong kinabuhi pinasikad niana nga paglaum. Igo na ba kana?”

Mihunong siya sa makadiyot dayon miingon, “Travis, sa kanunay igo na gayud kana.”

Adunay pipila ka butang nga naghulat pa gihapon ko nga makasabut, apan pipila ka mga butang nahimong tin-aw kaayo ngari kanako. Nasayud ko nga ang Langitnong Amahan nahigugma kanako. Nasayud ko nga kita lagmit maglatagaw ug nanglimbasug sulod sa usa ka panahon. Apan ako nasayud nga pinaagi ni Kristo, sa Iyang Pag-ula, ug ang paglaum nga nahatag niini, kini posible ang pagbalik ngadto sa dalan padulong ngadto Kaniya. ■

Ang tagsulat nagpuyo sa Utah, USA.

MUBO NGA SULAT

1. Tan-awa sa Lawrence E. Corbridge, “Stand Forever,” (Brigham Young University devotional, Ene. 22, 2019), speeches.byu.edu.

MGA IDEYA SA PAGTABANG SA USA KA TAWO NGA INYONG GIHIGUGMA

Sama nako, daghang mga tawo kinsa adunay mga pangutana o pagduha-duha nga mobati nga sila wala mahisakop sa simbahan. Apan dili kita makahimo sa pagbaliwala kanila o sa uban. Ang Manluluwas misugo sa Iyang mga katawhan nga “magpadayon sa pag-alagad” kani-la tungod kay kita dili gayud masayud kon kanus-a sila mobalik ngadto Kaniya ug mamaayo (tan-awa sa 3 Nephi 18:22–32).

Ania ang lima ka paagi nga makapadayon kita sa pagpangalagad niadtong kinsa nakigbisog sa pagduha-duha aron nga sila mobati nga giabi-abi, bisan o dili sila mopili sa pagbalik.

1. **Padayon sa paghigugma.** Sa tibuok nakong pakigbisog, akong gibati nga nag-inusara. Siyempre, ang Langitnong Amahan wala mobiya kanako, ug ang akong pamilya o mga lider sa Simbahan. Ang pagbati sa Iyang gugma pinaagi kanila nakatabang kanako nga ako makabalik.
2. **Padayon sa pagtabang.** Ang paghigugma sa uban kinahanglang dili mag-agad sa ilang mga gituohan, pag-apil sa simbahan, o gani sa unsay ilang gibati mahitungod kanato. Si Jesus mihangyo kanato sa pagtabang sa mas labaw pa kay sa niadtong anaa na sa atong pundok (tan-awa sa Mateo 5:46–47).
3. **Padayon sa paglaum.** Kita magpuasa, kita mag-ampo, kita motan-aw ug magpailubon sa paghulat. “Dios mihimo og paagi sa pagluwas sa matag usa sa Iyang mga anak” (Henry B. Eyring, “Sa Akong mga Apo,” *Liahona*, Nob. 2013, 71).
4. **Tahura ang ilang kabubut-on.** Pagbaton og paglaum apan tahura ang ilang desisyon. Dili kinahanglan nga atong ipakita kanila o makiglantugi sa doktrina diha kanila. Sama sa nawala nga anak, daghan kanato nagkinahanglan og panghitabo sa kinabuhi nga mopalukmay una sa atong mga kasingkasing.
5. **Tagda sila inubanan sa dignidad, dili sa ingon nga sila dautan.** Likayi ang mga pamahayag nga mahukmanon, mahinawayon, o mopakaulaw. Ang mga resonable nga mga tawo mahimong makabaton og pagtuo nga lahi sa atoa, ug kita kinahanglan mohatag kanila sa samang pagtahud nga atong gilauman nga ilang mahatag kanato.

Morag dili pa nako masulti nga ako nasayud nga ang Simbahan tinuod, apan ako naglaum nga tinood kini ug magpakabuhi ko sumala niana nga paglaum.

Kamo Mohigugma, Siya Moluwas

Kami nag-ampo nga ang kasingkasing sa among mga anak mausab. Dayon miabut ang dili komportable (ug makapalingkawas) nga pagkaamgo.

Ni Krista Rogers Mortensen

Ang akong bana ug ako mipadako sa among mga anak diha sa ebanghelyo. Aduna kami pagtuon sa kasulatan sa pamilya matag buntag, pag-ampo sa pamilya, ug sinemana nga family home evening. Mitambong kami sa simbahan, magdungan sa pagpangaon, ug moadto og mga bakasyon uban sa pamilya. Regular nga mitambong ang mga bata sa templo aron sa pagpahigayon og mga pagbunyag alang sa mga patay, migradwar sila gikan sa seminary, ug ang duha nila miserbisyo og mga misyon.

Ug dayon isip mga hamtong, nagsugod sila sa pagsusi og mga dalan ug mga ideya nga lahi gikan sa mga butang nga among gitudlo kanila. Tagsa-tagsa, ang among mga anak mihunong sa pag-apil sa simbahan hangtud nga usa na lang sa among lima ka anak ang mipili pa gihapon sa pagtambong. Among gihilakan ang among mga anak ug naghunahuna kon napakyas ba kami isip mga ginikanan o kon aduna bay butang nga unta among nahimo sa lahi nga paagi.

Sulod sa taas nga panahon, nangamuyo kami sa Ginoo sa pag-usab sa ilang mga

kasingkasing, ug sa katapusan ang Ginoo mitubag sa among mga pag-ampo. Apan dili sa paagi nga among gilauman.

Imbis nga yanong pag-usab sa kasingkasing sa among mga anak, mipakita Siya kanamo nga kami kinahanglan magsugod pinaagi sa pag-usab sa among kaugalingong mga kasingkasing. Samtang ang mga ginikanan adunay importanting tahas sa pagtudlo sa ilang mga anak, Siya mipahinumdom kanamo nga si Jesukristo mao ang ilang Manluluwas ug Maghuhukom.

Sa akong determinasyon sa pagluwas sa akong mga anak, migahin ko og daghang oras sa pag-ampo, pagbasa sa mga kasulatan, ug moadto sa templo, naghunahuna nga kon akong buhaton ang tanang matarung nga mga butang, mahimo kong angayan sa pagpanginlabot sa Dios—nga daw ang akong mga lihoc makapahimo sa Dios nga mopatigbabaw sa ilang kabubut-on ug mopugos kanila sa pagtuo sama sa akong gituohan.

Ang akong bana ug ako gusto gayud kaayo nga luwason sila, apan ang among bersyon sa pagluwas mas naingon og paglektyur, pagpangasaba, o pagpakita og pagsupak sa ilang mga



pagpili, nga sa katapusan misangput sa panag-bingkil. Kami nakaamgo nga sa among paglaum sa pagdala og balik sa among mga anak, sa pagkatinuod amo silang giabug palayo. Magkadako ang ilang pagbati sa among mga paghukom ug pagkadismaya, mas maglikay sila kanamo.

Ang akong mga pag-ampo nausab sa usa ka pangamuyo alang sa kausaban sa akong kaugalingong kasingkasing. Nakaamgo ko nga ang akong mga rason sa akong kagustuhan nga mausab ang akong mga anak naggikan sa sayop nga dapit. Nag-ampo ko alang sa dugang nga gugma. Nag-ampo usab ko sa pagbuntog sa akong gibati nga kaulaw nga ang akong pamilya dili perpekto tan-awon sama sa gipakita sa akong mga higala diha sa social media sa mga litrato sa kaminyoon diha sa templo sa ilang mga anak o mga bunyag sa ilang mga apo.

Samtang ako miduol sa Manluluwas alang sa pagkaayo, ang akong kasingkasing misugod sa pagkalukmay ngadto sa akong mga anak. Nakaamgo ko nga ang paghigugma kanila sama sa Iyang paghigugma kanila nagpasabut sa paghimo og mga kausaban. Ngadto Kaniya, ang gugma dili usa ka pamaagi—kini mao ang kadasig nga nakapahimo sa Iyang gibuhat. Siya miingon nga Siya wala mihimo “og bisan unsa gawas kon kini alang sa kaayohan sa kalibutan; kay siya nahigugma sa kalibutan” (2 Nephi 26:24).

Ang pagsalig diha sa abilidad sa Manluluwas sa pagkaayo sa Iyang buhat (tan-awa sa 2 Nephi 27:20) nagtugot kanako nga matutukan ang paghigugma sa akong mga anak ug itugyan ang pagluwas ngadto sa Ginoo. Wala kini magpasabut nga undangon ang pagpaningkamot sa pagtabang kanila, apan kon ang paghigugma nila maoy hinungdan sa akong pakig-inter-aksyon kanila, nakapausab kini sa *paagi* sa akong inter-aksyon.

Nagsugod ko nga makita sila sa lahi nga paagi. Gisugdan nako nga tutukan ang ilang mga kalig-on ug ang ilang mga talento ug nagsugod ko sa pagkakita unsa ka mahigugmaon, kamadagayaon, kalantip ug kamaayong tawo nila.

Ang akong bana ug ako mas naminaw og dugang ug minus ang pagtabi. Nangutana mi mahitungod sa ilang kinabuhi ug sa ilang mga interes. Imbis mohukom, among gipakita ang kakuryuso. Among gipulihan ang pagpanaway ug kasagmuyo sa pagpahayag sa gugma, ug ang among mga anak mibati nga kadto tinuod.

Ang among panimalay nahimong usa ka dapit diin sila mahimo nga mobati sa gugma ug

Unsay Nakatabang Nako

pag-ampo

usa ka pangamuyo alang sa akong kasingkasing sa pag-usab



panglantaw

nagtan-aw sa akong mga anak sa usa ka lahi nga kahayag

gugma

dili lang magtabi—paminaw



pagsalig

ang akong mga paningkamot naa sa pakig-uban sa Dios

pagdawat. Mihunong sila sa pagtago sa mga butang gikan namo ug misugod sa pagkamatinuoron ug mitug-an mahitungod sa unsay mga panghitabo sa ilang kinabuhi. Nagkasuod kami.

Ang among pamilya anaa pa gihapon sa pagpalambo, apan ang among mga anak malingaw nga moadto sa among panimalay ug mogahin og panahon uban kanamo. Luwas ra ilang pamati diha sa among presensya, ug pinaagi sa among gugma nanghinanut ko nga sila makabati sa gugma sa Dios alang kanila. Wala ko kahibalo kon niining tibuok kinabuhi nga sila mobalik ngadto sa mga butang sila natudloan sa bata pa, apan ako nasayud nga sila anaa sa mga kamot sa Manluluwas. ■

Ang tagsulat nagpuyo sa Utah, USA.

Gipadaplin Nila ang Ilang mga Pagsulay

Ni Natalie Jones, Utah, USA

Nianang adlaw, si Kendra, Brent, ug si Tyson tinuod nga mga ehemplo sa Kristohanong pagpangalagad.

Kitang tanan makasinati og kalam-
pusan ug kapakyasan sa kina-
buhi, apan ang 2013 mao ang usa
ka lisud gayud nga tuig sa among
pamilya. Nakasinati kami og dag-
hang wala damha ug mahalon nga
mga pag-ayo sa balay ug sakyanan.
Ang akong bana, si Ryan, nawad-
an sa iyang trabaho, ug ang among
kinamanghuran nga anak nga lalaki
natawo nga may mga komplikasyon
ug gikinahanglang mogahin og pipila
ka semana sa neonatal intensive care
unit. Nanlimbasug pud ko sa depres-
yon human sa pagpanganak. Kini
nga mga sirkumstansya, inubanan sa
pagkaginikanaan sa upat ka gagmayng
mga bata, nakaingon sa among
pinansyal ug emosyonal nga kalisud.

Si Ryan nakakita og bag-ong traba-
ho, apan siya mitrabaho og taas nga
mga oras ug layo sa panimalay sulod
sa pipila ka semana sa usa ka higa-
yon. Ang among singko anyos nga

anak nga lalaki, si Wesley, misugod
sa pagbaton og kabalaka mahitungod
sa iyang amahan nga wala kanunay.
Kanunay siyang makamata sa gabii
gikan sa mangil-ad nga mga damgo.

Ang among kaparyentihan misu-
porta kanako kon kanus-a sila maka-
himo, apan kasagaran gibati gihapon
nako nga gikapoy ug nag-inusara.
Nasayud ko nga ang Langitnong
Amahan nahigugma ug nakaila sa
akong pamilya, apan mibati ko nga
daw kami nangalumos.

Usa ka hapon, samtang si Ryan tua
sa laing lugar alang sa trabaho, akong
gidala ang akong mga anak sa panima-
lay gikan sa eskwelahan ug nag-ampo
gayud alang sa panabang. Dayon
nianang gabhiona, ang akong silingan
nga si Kendra nanuktok sa among
pultahan. Nasayud siya mahitungod sa
among sitwasyon ug nangutana kon
kumusta na ko. Wala koy intensyon sa
pagreklamo ngadto kaniya, ug siya ang

katapusang tawo nga akong pangayo-
an unta og tabang. Ang iyang bana, si
Brent, nakigbatok sa kanser sulod sa
milabayng upat ka tuig.

Giingnan nako si Kendra nga maa-
yo ra ko, apan sinsero siyang nangu-
tana pag-usab. Naghilak, gisultian
nako siya mahitungod sa akong mga
panglimbasog. Sa dihang gisultian
nako siya mahitungod sa kabalaka ug
sa mga mangil-ad nga mga damgo ni
Wesley, nangutana siya kon ganahan
ba ko nga hatagan ni Brent og pana-
langin si Wesley.

Wala madugay, si Kendra, Brent,
ug ang ilang kinamagulangang
anak nga lalaki, si Tyson, miabut sa
among pultahan nga nagsul-ob og
mga sinina nga pangsimba. Luya si
Brent. Sigurado ko nga migamit kini
sa iyang tibuok kusog aron makaan-
hi sa among balay. Iyang gihatagan
og panalangin si Wesley, ug si Tyson
mihatag kanako og panalangin.

Nianang adlaw, si Kendra, Brent,
ug si Tyson tinuod nga mga ehem-
plo sa Kristohanong pagpangalagad.
Gipadaplin nila ang ilang kaugali-
ngong mga pagsulay aron sa sinse-
rong pagtanyag kanamo sa gugma
ug kalooy. Mibati ako nga napanala-
nginan nga ang Langitnong Amahan
mitubag sa akong pag-ampo niini
nga malumong paagi. Namatay si
Brent paglabay sa duha ka semana.

Nianang adlaw sa among panima-
lay, si Brent nagbarug isip usa ka saksi
sa Dios pinaagi sa matarung nga pag-
gamit sa pagkapari (tan-awa sa Mosiah
18:9). Alang kanako, sagrado kini nga
ang iyang pagpangalagad sa among
pamilya mao ang usa sa iyang katapu-
san nga mga buhat dinhi sa yuta. ■



Ang Maisug nga Airman

Ni Wayne L. Bell, South Dakota, USA

Walay nangahas motubag sa drill instruktur, apan makapatingala, usa ka batan-ong lalaki ang mipataas sa iyang kamot.

Daghang katuigan ang milabay, miapil ko sa Air Force sa Estados Unidos aron sa pagserbisyo sa akong nasud. Wala madugay anaa na ako sa usa ka boot camp sa Texas, USA. Hinay nga milabay ang mga semana samtang milahutay ko sa daghang mga butang nga kasagaran masinati sa usa ka tawo diha sa boot camp.

Usa ka adlaw mitambong ko og dako nga miting sa sobra sa 200 ka airmen, ang tanan anaa sa pagbansay sama kanako. Ang miting gisugdan uban sa usa sa among mga drill instruktur—kinsa kanunay misinggit og saba ug bastos nga mga butang—nga nagsinggit, “Aduna bay bisan kinsa nga supak sa pamaagi nga ako midumala sa kini nga pagbansay?”

Siyempre, walay nangahas motubag, apan makapatingala, usa ka batan-ong lalaki ang mipataas sa iyang kamot.

“Airman, baru!” misinggit ang instruktur. “Unsa man ang butang nga supak ka?”

Kaming tanan naminaw pagayo samtang ang batan-ong lalaki mideklarar sa dako og tingog, “Supak ako sa imong paggamit sa ngalan sa akong Manluluwas sa pagpasipala. Nakapasakit kini sa akong kalag. Mohangyo ko nimo nga mohunong.”

Hingpit nga nahilom ang lawak. Mitutok ang instruktur kaniya ug dayon nangutana kaniya kon unsa nga relihiyon siya nahisakop. Mapasigarbuhong miingon ang maisug nga airman, “Miyembro ako sa Ang Simbahan ni Jesukristo sa mga Santos sa Ulahing mga Adlaw!”

Gipasalamatan sa instruktur ang airman alang sa iyang kaisug sa pagsulti, ug nagpadayon ang miting. Kini nga kasinatian adunay dakong epekto ngari kanako. Kanunay kong naghunahuna nga gusto kong makabaton sa samang kaisug niadto nga airman.

ang kasinatian didto sa boot camp uban sa maisug nga airman. Ang akong asawa ug ako nakigkita sa mga misyonaryo, ug sa wala madugay nabunyagan kami.

Pipila ka bulan ang milabay, gipabisitahan nako sa mga misyonaryo ang akong manghud nga lalaki.



Human sa boot camp ug sa medikal nga pagbansay, gi-assign ko sa usa ka air force base sa Colorado, USA. Usa ka adlaw, nakadawat ko og sulat gikan sa akong kinamagulangan nga igsoong lalaki nga naka-estasyon sa Pilipinas. Miapil siya sa air force mga usa ka tuig sa wala pa ko miapil. Misulti siya kanako nga siya nahimong usa ka miyembro sa Simbahan, ug gusto niya nga makigkita ko sa mga misyonaryo. Diha-diha dayon nahinumduman nako

Siya ug ang iyang asawa nabunyagan usab. Ang akong mga igsoon nga lalaki ug ako karon adunay dagko nga mga pamilya nga naay mga apo. Kaming tanan nahigugma sa Ginoo ug sa Iyang Simbahan.

Wala ako masayud sa ngalan sa maisug nga airman. Wala na ako makakita kaniya pag-usab, apan hangtud sa hangtud akong mapasalamaton alang sa iyang kaisug sa pagbarug sa unsay iyang gituohan. ■

Naghulat sa Saad

Ni Juana Moreno de Ruiz, Sonora, Mexico

Ang akong anak nga babaye midistansya sa Simbahan, apan nakahibalo ko nga mapanalanginan siya sa mga butang nga natudlo kaniya mahitungod sa ebanghelyo.

Tulo ka bulan sa wala pa ako mag-21 anyos, nabun-yagan ko uban sa akong igsoong babaye, sa akong inahan, ug sa akong otso anyos nga pag-umangkon nga lalaki. Sa mga katuigan, hugot kami nga mihupot sa ebanghelyo bisan sa daghan namo nga mga hagit.

Sa dihang ang akong bana ug ako naminyo, determinado kami nga magpabilin nga aktibo sa Simbahan. Sa dihang nakaanak na, ang akong bana ug ako nanglimbasug nga mamahimong maayo nga mga ginikanan ug sa pagtudlo sa ebanghelyo diha sa among panimalay.

Usa ka adlaw mitambong ko og komperensya uban sa among usa ka tuig nga anak nga babaye. Sa komperensya, ang usa ka Area Seventy namulong mahitungod sa responsibilidad sa mga ginikanan sa pagtudlo sa ebanghelyo ngadto sa ilang mga anak. Dayon mihimo siya og usa ka saad nga nagbilin og dakong impluwensya ngari kanako. Siya miingon: “Kon, human sa tanan nga inyong mahimo sa pagtudlo sa ebanghelyo, usa sa inyong mga anak mobiya sa Simbahan, sila gihapon mapanalanginan tungod sa panumduman sa mga butang nga ilang nasinati sa panimalay.”

Ang mga pulong sa niana nga Area Seventy mipuno kanako sa paglaum tungod kay aduna koy mga pag-umangkon nga mibiya sa Simbahan. Mga tuig ang milabay ang akong anak nga babaye, siya gihapon kadtong nagedad og usa ka tuig nga akong gikugos atol niana nga komperensya, mibiya sa Simbahan sa dihang 17 anyos na

siya. Nakahimamat siya og usa ka tawo nga wala makagamut diha sa ebanghelyo, ug naminyo sila. Wala na siya misimba pagkahuman niana.

Sakit kadto alang kanako. Balik-balik kong nangutana sa akong kaugalingon kon unsa ang nabuhat namo nga sayop. Ang iyang amahan ug ako kanunayng naningkamot sa pagsunod sa mga sugo ug moserbisyo sa Simbahan. Gihigugma namo ang among mga anak ug gusto

ang labing maayo alang nila. Human sa pag-agas sa mga luha ug mga pangutana, nakaingon mi nga ang mga bata motubo, mogamit sa ilang kabubut-on ug dili kanunayng motuo sa mga butang nga natudlo kanila sa panimalay.

Subo lang, ang kamin-yoon sa akong anak nabungkag, ug dili lang gihapon siya gustong mobalik sa Simbahan. Ang ako lang mahimo mao lang ang paghinumdom sa saad nga siya mahinumdom ug mapanalanginan tungod sa mga butang nga natudlo kaniya sa panimalay.

Nagpadayon ko sa pag-ampo alang sa akong

anak nga babaye. Gimahal nako siya sa tibuok nakong kasingkasing, ug masakitan ko nga makita siya nga midistansya sa Simbahan. Apan nasayud ko nga, bisan pa sa akong pagkadili hingpit, ang butang nga akong gitudlo niya husto ug tinuod. Nasayud ko nga ang Langitnong Amahan makiangayon ug mahigugmaon ug nga Siya maminaw sa atong mga pag-ampo. Walay pagduha-duha sa akong kasingkasing, nasayud ko nga kon buhaton nako ang akong bahin, Siya motubag kanila sa higayon nga Iyang makita nga husto. ■



“Kinsa ang Nakadasmag sa Akong Anak?”

Ni Sandra Beatty, Ontario, Canada

Akong napanan-awan ang akong kaugalingon nga gisinggitan ang tawo kinsa nakadasmag sa akong anak, apan gikaatubang nako dayon ang driver.

Bag-o lang nakong gihatud ang akong anak nga babaye sa balay sa usa ka higala sa dihang nadawat nako ang tawag gikan sa akong bana, si Jonathan. Siya misulti kanako nga ang among 11 anyos nga anak, si Aiden, nabangga sa sakyanan samtang siya ug si Jonathan milabang sa karsada.

Ang drayber miliko sa wala diha sa atubangan ni Jonathan ug wala makakita ni Aiden nga nagbisikleta. Gibangaan sa driver ang dung sa bisikleta ni Aiden. Nalagput siya, nga naggunit pa gihapon sa bisikleta, ug naigo ang iyang ulo sa kilid sa awto sa dihang nitugpa siya. Dayon mitugpa siya sa karsada nga ang iyang bisikleta midat-og kaniya. Salamat nalang, nga nagsul-ob siya og helmet. Ang drayber ug pipila sa ubang mga tawo mihunong aron sa pagtabang samtang si Jonathan mitawag og ambulansya.

Ang akong hunahuna ug mga pagbati sa kalit lang nagkaguliyang. Gipakusgan nako og padagan padulong sa interseksyon diin nahitabo ang aksidente, nanghinaut nga maabtan pa ang ambulansya aron makauban nako si Aiden.

Ang hunahuna nga kasab-an og maayo ang driver misantop sa akong hunahuna. “Unsa man ang gihunahuna sa driver?” Naghunahuna ko. “Hubog ba sila? Naggamit ba sila sa ilang telepono?” Nasuko kaayo ko ug nasubrahan sa kabalaka. Wala koy ideya kon unsa ka grabe ang pagkaangol ni Aiden.

Sa dihang miabut ko sa nahitabonan, nakabiya na ang ambulansya. Ang

duha na lang ka sakyanan sa pulis ug usa ka sakyanan giparking daplin sa karsada ang nahabilin diha sa nahitabonan. Usa ka babaye nga mabalak-on nagbarug tupad sa sakyanan.

Ako siyang giduol ug gipangutana, “Nakakita ba ka si kinsa ang nakabangga sa akong anak?”

Hinay siya nga misulti, “Nakakita ko.”

Akong napanglantawan nga singgitan ang nagdanghag nga tawo kinsa nagbanga sa akong anak, apan sa dihang naatubang na nako ang driver, ang pagkanegatibo nahanaw. Nakahilak nalang ko ug migakos niya. Nangayo siya og pasaylo, ug misulti ko niya nga OK ra ang tanan. Akong nahibaloan nga mao gyud to ang sako nga mga gipamulong ni Aiden ngadto niya sa wala pa miabut ang pulis. Sa katapusan, si Aiden nakalahutay ra sa pipila ka mga pangos ug bun-og.

Mapasalamaton ko nga sa niana nga mahinungdanong takna, ang atong mahigugmaon nga Langitnong Amahan mipanalangin nako og kalig-on sa pagpasaylo kay sa kasilag, bisan kon wala ko mangayo niana ngadto kaniya. Nasayud ko nga Siya nagpakabana kanato ug sa kanunay motanyag kanato sa Iyang tabang. ■





Alma 23–29

HUNYO 29–HULYO 5

Human sa ilang pagkakabig, ang matinud-anon nga mga Lamanite gusto og usa ka bag-ong ngalan sa pag-ila sa ilang mga kaugalingon gikan sa mga Lamanite ug sa pagsimbolo sa ilang pagkakabig ngadto ni Jesukristo. Sila mitawag sa ilang kaugalingon nga mga Anti-Nephi-Lehi (tan-awa sa Alma 23:16–17). Mailhan nato ang atong kaugalingon karon pinaagi sa pagdala sa ngalan ni Jesukristo ngari kanato.

PANAGHISGUTAN

Sa unsang paagi nga ang pagdala diha kaninyo sa ngalan ni Kristo sa inyong inadlaw-adlaw nga mga hunahuna ug mga lihok modasig kaninyo nga mahimong mas maayo Niya nga disipulo?

Unsa Ang Importansya sa usa ka Ngalan?

Usa ka Simbolo sa Atong Pagkakabig



Atol sa bunyag nakig-saad kita sa Dios sa pagdala ngari kanato sa ngalan ni Kristo. Kon kita moambit sa sakrament, atong gibag-o kana nga mga pakigsaad. Unsay atong gisaad nga hinumduman ug buhaton samtang kita modala ngari kanato sa Iyang ngalan? (Tan-awa sa Mosiah 18:8–9; Doktrina ug mga Pakigsaad 20:77.)

Usa ka Saksi ni Kristo



Ang mga apostoles gitawag isip “talagsaon nga mga saksi sa ngalan ni Kristo sa tibuok nga kalibutan” (Doktrina ug mga Pakigsaad 107:23). Kita mamahimo usab nga mga saksi ni Kristo. Sa unsang paagi nga makighiusa ka sa propeta ug sa mga apostoles ug mamahimong usa ka saksi sa ngalan ni Kristo ngadto sa mga tawo sa imong palibut?

Usa ka Tinubdan sa Gahum



Bag-uhay lang, si Presidente Russel M. Nelson naghangyo kanato sa pagtawag sa Simbahan sa hustong ngalan niini: Ang Simbahan ni Jesukristo sa mga Santos sa Ulahing mga Adlaw. Misaad siya nga ang gahum mobu-bu diha sa mga Santos kon kita mobuhat sa ingon (tan-awa sa “Ang Sakto nga Ngalan sa Simbahan,” *Liahona*, Nob. 2018, 89). Unsa ang pipila ka mga butang nga inyong mahimo aron mas magamit ang husto nga ngalan sa Simbahan ug makatabang sa uban nga mobuhat sa ingon?





Alma 30–31

HULYO 6–12

Unsaon Nato sa Pagbatok sa Sayop nga mga Pagtulun-an?

Si Korihor usa ka anti-kristo kinsa misangyaw “batok sa mga panagna nga gikasulti pinaagi sa mga propeta, mahitungod sa pag-anhi ni Kristo” (Alma 30:6). Misangyaw siya og ubang mga bakak ug naglingla “sa mga kasingkasing sa daghan” (Alma 30:18).

Bisan tuod nahitabo kini sobra sa 2,000 na ka tuig ang milabay, daghang mga tawo karon ang nagsangyaw sa susama nga mga butang. Unsay atong mabuhat aron sa paglig-on sa atong mga kaugalingon batok sa sayop nga mga pagtulun-an sa atong panahon?

PANAGHISGUTAN

Kinsa ang nagtudlo og mga bakak karon? Unsa nga mga mensahe ang ilang gipasabot? Unsa ang gihatag sa Dios kanato aron matabangan kita sa pagbatok sa mga bakak ug makat-on sa kamatuoran?

▶ Makaangkon Kita og Atong Kaugalingon nga Pagpamatuod

Si Korihor mitudlo sa mga tawo “nga kinahanglan walay Kristo” ug “walay pag-ula”, ug milimud siya sa pagkaanay Dios (tan-awa sa Alma 30:12, 17, 28).

Unsaon nato sa pagkahibalo nga ang Dios ug si Jesukristo buhi? Unsa nga mga kasulatan ug personal nga mga kasinatian ang nakapalig-on sa inyong pagpamatuod mahitungod Kanila?


▶ Makasalig Kita sa Pagpadayag

Milimud si Korihor sa espiritu sa pagpanagna ug pagpadayag. Misulay siya sa pagpatuo sa mga tawo nga “walay tawo nga nasayud sa bisan unsa nga moabut” ug “kamo dili masayud sa mga butang nga kamo dili makakita” (Alma 30:13, 15).

Makalantaw kita ngadto sa mga propeta ug sa mga apostoles sa pagdawat sa pulong sa Dios alang sa atong panahon. Sa unsang paagi nga ang pagsunod sa propeta makapanalipod kanimo batok sa sayop nga mga pagtulun-an?

▶ Atong Hinumduman Nga ang Kamatuoran mao Ang Kamatuoran

Misulti si Korihor sa mga tawo nga walay paagi nga sila mahimo nga masayud kon unsa ang tinuod (tan-awa sa Alma 30:24), apan si Presidente Russell M. Nelson mitudlo: “Ang pipila ka butang mga tinuod gayud. . . . Ang kamatuoran nakabase sa mga balaod nga gies-tablisar sa Dios. . . . Ang mahangturong mga balaod naglihok sa ug makaapekto sa atong matag kinabuhi, kon motuo kita niini o dili” (“The Love and Laws of God” [Brigham Young University devotional, Sept. 17, 2019], speeches.byu.edu). Unsaon nato sa pagdiskobre sa mga kamatuoran sa Dios, ug sa unsang paagi kini makapanalangan sa atong kinabuhi?





Alma 32–35

HULYO 13–19




Human gikompara ni Alma ang pulong sa Dios ngadto sa usa ka binhi (tan-awa sa Alma 32:28–43), ang mga tawo nangutana kaniya kon unsaon sa pagtanom sa binhi. Gigamit ni Alma ang istorya ni Moises ug sa bitin nga tumbaga gikan sa Numeros kapitulo 21 isip usa ka ehemplo sa paglihok inubanan sa hugot nga pagtuo (tan-awa sa Alma 33:19–23).

PANAGHISGUTAN

Ang mga Israelihanon kinahanglan motan-aw lang aron maayo. Unsa ang pipila ka mga baruganan sa ebanghelyo nga ingon og sama sa kasayon sa “pagtan-aw”? Unsa nga mga batasan o mga kinaiya ang usahay makapugong kanato sa pagsunod sa yano nga mga baruganan sa ebanghelyo?

Sa unsang paagi kamo makatan-aw ngadto sa Manluluwas diha sa mga butang nga inyong masinati sa matag adlaw?

Nganong Gipaambit ni Alma ang Istorya ni Moises ug sa Bitin nga Tumbaga?



Usa ka Simbolo ni Kristo

Ang usa ka *simbolo* usa ka butang nga nagrepresentar o naghulagway sa usa ka butang o tawo. Sa dihang ang mga Israelihanon napaakan sa makahilo nga mga bitin, giisa ni Moises ang bitin nga tumbaga, nga nahimong usa ka simbolo ni Kristo. Ang tanan kinsa milihok inubanan sa hugot nga pagtuo ug mitan-aw niini naayo, sama sa tanan nga molihok sa ilang hugot nga pagtuo diha ni Jesukristo mahimong mamaayo sa espirituhanong paagi.

Ang Uban Nagpatig-a sa Ilang mga Kasingkasing

Sama ka yano sa pagtan-aw, pipila sa mga katawhan nagpatig-a sa ilang mga kasingkasing ug midumili, ug sila namatay isip resulta sa pinaakan. Nganong wala sila motan-aw? (tan-awa sa Alma 33:20). Unsa ang gitudlo niini kanato mahitungod sa hugot nga pagtuo ug sa pagkawalay pagtuo?

Mamaayo Ka Ba?

Kon mamaayo kamo pinaagi sa pagbuhat og yanong butang sama sa pagtan-aw, dili ba ninyo buhaton kini? Nangutana si Alma niini ug nagdapit kanato sa pagtan-aw sa Manluluwas pinaagi sa pagtuo diha kaniya (tan-awa sa Alma 33:21–22).



Alma 36–38

HULYO 20–26

Sa Unsang Paagi ang Paghinulsol Makapabaling sa Kasub-anan ngadto sa Kalipay?

Si Alma mipakigbahin sa iyang kasinatian sa pagkakabig uban sa iyang anak nga si Helaman. Si Alma misulti kaniya kon sa unsang paagi siya “gisakit uban sa walay katapusan nga kahamol” tungod sa “tanang [niyang] mga sala ug kadautan” (Alma 36:12–13). Unsa ang imong bation kon makasinati ka og kahamol sa tanlag gumikan sa sala?

Natawo sa Dios

Human sa tulo ka adlaw nga kasakit sa kahiladman, si Alma adunay usa ka hunahuna nga nakapagaan sa kasakit nga gibati niya (tan-awa sa Alma 36:19). Siya mipamatu-od nga siya “natawo sa Dios” (Alma 36:23). Unsa nga hunahuna ang midala kaniya nga matawo sa Dios? (Tan-awa sa bersikulo 18.)

Kalipay human sa Dakong Kasubo

Si Alma nakasinati og dako nga kasubo tungod sa iyang mga sala, apan kon siya mohinumdom ug motawag ni Jesukristo, ang iyang kasubo mapulihan og maanindot ug talagsaon nga kalipay sa pagpasaylo (tan-awa sa Alma 36:20).


Salig sa Dios

Pinaagi sa paghinumdom sa Pag-ula ni Jesukristo, si Alma nakat-on sa pagsalig sa Dios ug nasayud siya nga ituboy sa kata-pusan nga adlaw (tan-awa sa Alma 36:3). Sa unsang paagi ang paghinumdom ug pagsalig sa Pag-ula sa Manluluwas naka-hatag kanimo og hingpit nga kalipay?

PANAGHISGUTAN

Unsay imong mabu-hat aron magpadayon nga mosalig sa Ginoo ug mohinumdom sa Iyang maulaon nga sakripisyo?

Sa unsang paagi nga makadala ka og mas daghang kalag ngadto sa paghinulsol nga unta sila makasinati usab og talag-saon ug mahangturon nga kalipay?



Nakasinati Ko og Pagkaibog diha sa Sama og Sekso—

Moabi-abi ba kaha Nako og Balik Ang mga Miyembro sa Simbahan?

Ni Bouke "Bob" S. Ecoma Verstege

Pahinumdom gikan sa tagsulat: akong ipaambit ang akong istorya isip usa ka pagpadayag sa akong pasalamat alang sa mga lider ug mga miyembro sa Simbahan kinsa miabi-abi nako uban sa bukas nga mga bukton, nga nakatabang kanako nga mobalik sa pagkaaktibo, ug nagserbisyo uban nako isip isig ka mga disipulo ni Kristo.

Niadtong Hulyo 27, 2013, human sa taas nga pakigbisog sa sakit nga Alzheimer, ang akong kauban sa kinabuhi sulod sa 25 ka tuig mitaliwan. Si Jay Eldredge usa ka inila sa tibuok kalibutan nga cardiologist. Miserbisyo kami og mga misyon alang sa Ang Simbahan ni Jesukristo sa mga Santos sa Ulahing mga Adlaw sa dihang mga batan-on pa kami apan mipalayo sa among kaugalingon sa Simbahan tungod sa pagkaibog sa sama og sekso.

Ang kamatayon ni Jay, bisan og wala damha, ang makapaguol kaayo. Gibati ko og kasagmuyo ug pagkasalaag ug nag-inusara.

Samtang nagdrayb pauli sa balay human sa tulumanon sa lubong, nabati nako ang impluwensya sa Espiritu nga milukop kanako nga hilabihan ka kusog nga kinahanglan ko nga molugar sa daplin sa karsada. Nasayud ko nga ang Dios namulong ngari kanako, nagtawag kanako sa pagbalik ngadto Kaniya, apan nagdumili ko. "Wala ba nimo nakita nga nag-antus ko?" Kusog nakong gisulti. "Wala koy nawong nga mobalik sa simbahan karon dayon."

Apan kon unsa ka dako ang akong pagsupak, mas miimpluwensya ang Espiritu ngari kanako, nagdapit kanako sa pagbalik sa simbahan.





Madawat Pa Kaha Ko?

Nabalaka ko pag-ayo kabahin sa pag-balik sa simbahan. Wala ako nakatambong og miting sa sakrament sulod sa 25 ka tuig. Modawat pa kaha sila nako? Ako ba silang dawaton? Unsa kahay isulti sa bishop? Gibati ko og kahadlok ug wala mahimutang ug gra-be gihapon ang pagbangutan.

Apan ang akong pagpamatuod sa ebanghelyo wala gayud magduhaduha niadtong mga tuiga. Si Jay ug ako ganahan sa Simbahan ug sa makagiya nga mga baruganan niini—sama sa, gugmang putli, kalooy ug pagpasaylo. Nasayud ko nga si Kristo mao ang akong Manluluwas ug nga ang Iyang Simbahan mao Ang Simbahan ni Jesukristo sa mga Santos sa Ulahing mga Adlaw. Nasayud ako niana sukad pa sa akong pagkaka-big ug pagbunyag sa edad nga 14. Dili nako kana ikalimud karon.

Sa katapusan, human nakapundo sa gikinahanglan nga kaisug, mitawag ko sa Linwood Ward sa New Jersey, USA, aron susihon kon unsang orasa magsugod ang miting sa sakramento.

Dihang nagsingabut na ang Domingo, ang kaaway nagbutang og daghang mga babag sa akong dalan nga sayon ra unta ko nga mapugngan sa pagtambong. Mapasalamaton kaayo ko nga ang Espiritu Santo mipadayon.

Gikulbaan ko sa akong pagsulod sa gambalay, apan ang pangbukas nga himno sa miting sa sakramento mipasalig kanako nga nahiuli nako sa panimalay. Ang himno nga “Mga Santos Dali Na” (*Mga Himno*, nu. 23) nagdapit og sobra ka kusog sa Espiritu nga ang mga luha miagas diha sa akong mga aping. Nasayud ko nga nianang tungora ang Langitnong Amahan nakabantay nako ug sa lawom nga kasubanan nga akong gibati.

Kana nga himno mura og nahimong dili opisyal nga awit apan nagpaila sa Simbahan, apan kini nahimo nakong personal nga awit usab.

“Dali,” ang himno nagdapit kanako. “Bisan mag-antus niining panaw, Grasya matag adlaw.”



HINGPIT NGA MILAMBIGIT SA MGA MIYEMBRO

“Usa ka tawo kinsa nagsunod sa mga pakigsaad ug sa mga sumbanan ug mga pagtulun-an sa ebanghelyo ni Jesukristo

—bisan og sila nagsagubang og pagkaibog sa sama og sekso—tinuod gayud nga walay katarungan nga sila dili hingpit nga mosalmot [o] mahimong miyembro nga hingpit nga makiglambigit sa Simbahan ug maghupot og mga calling ug mamulong ug mosulod sa templo ug moserbisyo didto. Ug ang tanang ubang mga oportunidad ug mga panalangin nga mahimong moabut gikan sa pagkamiyembro sa Simbahan nga mahimong maanaa kanila.”

Si Elder D. Todd Christofferson sa Korum sa Napulog Duha ka mga Apostoles, “LGBT People Who Live God’s Laws Can Fully Participate in the Church” (video), ChurchofJesusChrist.org/topics/gay.

Ang akong panaw *malisud*. Apan ang grasya *nag* -uban kanako sumala sa gisaad.

Si Bishop Darren Bird ug ang tanan sa kongregasyon maayo kaayo ug maabi-abihon. Sila midawat nako nga ilang igsoong lalaki diha ni Kristo.

Makig-uli sa Dios, pinaagi kang Kristo

Ang mga pulong sa “Mga Santos Dali Na” adunay mas dakong kahulugan kanako, samtang ako mibati nga ang Langitnong Amahan naggiya kanako kon unsaon nako sa pagpadayon.

*Dapit giandam atong makit-an,
Sa layong kasadpan,
Walay moduol nga kahadlok;
Santos mabulahan.*

Ako miadto sa kasadpan ug nakapalit og balay sa Fountain Hills, Arizona, USA, diin akong nahimamat si Bishop Jerry Olson. Sa dihang ako mihangyo nga makigkita niya ug gilamano ang iyang kamot, ang Espiritu nakaaghat nako nga kini nga tawo makatabang nako nga mabalik ngadto sa hingpit nga pagkaaktibo diha sa Simbahan.

Samtang akong gisugdan ang pagpakigkita sa bishop ug nagsugod sa pagpakig-uli sa Langitnong Amahan, nakasaksi ko og

daghang espirituhanon nga mga milagro. Mitug-an ako sa tanan sa bishop, diin siya mapasalamaton. Miingon siya nga natabangan siya nga mas makasabut kon diin ug hain na ako karong dapita sa akong pakigrelasyon uban sa Dios. Mahigugmaon usab siya nga mipahibalo nako nga mao pa kini ang unang higayon nga siya nakaangkon og oportunidad sa pagpangalagad ngadto sa tawo nga dunay kaibog sa sama og sekso, ug mihangyo siya sa akong pagpailob ug pagpasaylo kon siya nakasulti ug nakabuhat og butang nga ikasilo kanako sa tibuok proseso.

Nagpasalamat ko alang sa iyang kamatinuoron ug miingon, “Nan, kini mao usab ang akong unang higayon. Magdungan kita sa pagkat-on.”

Sa ingon nagsugod ang usa ka maanindot nga lakat sa panaghigala!

Sa wala madugay nakabaton ko og plano nga lihokon kon unsaon nga mahimo na usab nga miyembro. Akong gidawat ang mahigugmaon ug mainampoon nga tambag uban sa mapasalamaton nga kasingkasing ug misugod sa proseso.

Kalinaw diha sa Templo

Sa kaulahian, samtang misunod ko niana nga tambag ug naningkamot og maayo nga mas maduol ngadto kang Kristo, nadawat nako ang pagpahiuli sa akong pagkapari ug ang mga panalangin sa templo ug midawat sa tawag sa pagserbisyo sa korum sa mga elder. Diha sa balaan nga templo, samtang nakigsulti ko sa Langitnong Amahan, Siya mipakita kanako kon unsa Niya kapinangga ang tanan Niyang mga anak. Mibati ko og kalinaw ug usa ka lawom nga tinguha sa pagpahi-muot Kaniya.

Mga bulan ang milabay, ang usa ka bag-ong bishop natawag, kang kinsa nakaugmad usab ako og mahigugmaon nga panaghigalaay. Si Bishop Larry Radford nasayud sa akong kahimtang ug mipasalamat sa akong pagserbisyo diha sakorum sa mga elder, diin miingon siya



nga miserbisyo ko diha sa gugma ug debosyon dili lamang alang sa korum— ug labaw sa tanan—alang sa Dios. Ang iyang mabination nga mga pulong ug mga pag-awhag nakatabang kanako nga mobati nga ang Ginoo ug ang akong isig ka Santos nalipay uban sa akong pagserbisyo.

Karon matinud-anon kaayo ko nga nagserbisyo isip ang klerk sa ward.

Pagsabut Kon si Kinsa Ako

Ang pagbaton og kaibog sa sama og sekso ug mahimong usa ka aktibo nga miyembro sa Simbahan dili kanunayng sayon. Apan samtang ako mobutang sa tanan nakong pagtuo ug pagsalig sa Dios, ako mobati Kaniya nga nagpalig-on kanako. Ang mga kritiko sa walay duda moingon nga ako wala nagmatinuoron kon si kinsa ko o nga ako nakapasagmuyo sa komunidad sa LGBT+.

Nakasabut ko sa ilang kahimangod, ug klaro nga wala nako ang tanang tubag. Makasulti lang ko sa akong kaugalingong kasinatian. Ug kana nga kasinatian mitudlo kanako niini: ako anak nga lalaki sa Langitnong Amahan, usa ka anak sa Dios. Mao kana ang nag-inusara ug bugtong timaan nga mahinungdanon ngari nako. Agig sangputanan, maningkamot ko nga dili itugot ang kalibutanon nga mga timaan nga mohulagway nako. Nahadlok ko nga malimitahan niana ang akong potensyal ug mahangturon nga pag-uswag.

Si Satanas alisto kaayo. Nasayud siya nga pinaagi sa paggamit og mga timaan, makahimo siya sa pagbahin kanato isip komunidad ug isip simbahan.

Uban niana nga panglantaw, ang pagpili nga akong gihimo wala gibase sa akong pagkaibog sa managsama og sekso apan kon unsaon nga mahimong tinuod nga disipulo ni Jesukristo *uban sa* pagkaibog sa samang sekso. Sama sa giingon ni Nephi:

“O Ginoo, ako misalig kanimo, ug ako mosalig kanimo sa kahangturan. Ako dili mobutang sa akong pagsalig diha sa gahum sa tawo. . . .

“ . . . Oo, ako nasayud nga ang Dios mohatag nga dili higpit ngadto kaniya nga mangayo. Oo, ang akong Dios mohatag kanako, kon ang akong gipangayo dili sayop; busa ipataas ko ang akong tingog ngadto kaniya; oo, mangamuyo ako nganha kanimo, akong Dios, ang lig-on nga sukaranan sa akong pagkamatarung. Tan-awa, ang akong tingog sa kahangturan modangat nganha kanimo, akong lig-on nga sukaranan ug akong walay katapusan nga Dios” (2 Nephi 4:34–35).

Gugma sa Akong Isig ka mga Santos

Sa tibuok nakong pagbalik, gibati nako ang mahigugmaong mga pakig-uban sa akong mga lider ug mga isig ka Santos, lakip ang aktibo ug dili kaayo aktibo nga mga LGBT+ nga miyembro. Nakakaplag ko og dapit diin mouswag ako. Akong nakaplagan taliwala kanila ang hiyas ni Kristo nga kanunay nakong giuban sa akong hugot nga pagtuo, kaluoy, kapuangod, pagsabut, ug labaw sa tanan, gugma.

Samtang nanlimbasug ko subay sa dalan uban sa akong Manluluwas, nabati nako ang kahupay ug kalinaw samtang midangop ako ngadto

Kaniya, nasayod nga naglakaw ko subay sa dalan nga wala nag-inusara. Pipila ka mga bishop ang diha sa akong kiliran. Ang mga sakop sa akong korum. Ang mga sister sa ward. Diha pa gani usa ka batan-ong lalaki sa ward nga mihangyo kanako kon mahimo ba nga ako ang mo-orden kaniya nga usa ka priest. Kining matang sa imbitasyon nakatandog kaayo nako. Iya akong nakita nga usa ka lalaki kinsa naghupot sa pagkapari sa Dios ug kinsa makapakita sa pagkapari diha sa pagserbisyo sa uban.

Kini nga mga oportunidad sa pagserbisyo ug pagsimba uban sa akong isig ka Santos nakapabayaw nako ug—inubanan sa daghang mga panalangin nga akong nadawat gikan sa Ginoo—nakatabang nako nga masinati ang gugma, pagsabut, ug pagdawat nga akong gikinahanglan.

“Ang Manluluwas miingon, “Dili ko kamo pagabiyaan nga daw mga ilo: Ako mobalik ra kaninyo” (Juan 14:18). Kadto nga mga pulong matuod. Nagkinahanglan ko og paghupay, ug Siya miabut kanako, sa mas buhong kay sa akong mahunahuna. ■



ANG TOLDA SA EBANGHELYO

“Ang tolda sa ebanghelyo tinuod gayud nga may igong gidak-on alang sa tanan nga adunay usa ka tinguha sa pagsunod sa Ginoo. Kon adunay tawo nga mosulti o mobati og sukwahi niana, maghunahuna ko ni Bob Verstege ug manghinaut nga sila makahimamat niya ug makaserbisyo uban kaniya. Si Brother Verstege usa ka buhi nga ehemplo sa unsa ang mahimo sa Pag-ula ni Jesukristo kon mabutang diha sa buhat. Isip usa ka bishop, ako nabayaw, natudloan, ug naawhag pinaagi niining mapainubsanong tawo sa matag adlaw.”

Si Bishop Larry Radford, sa Fountain Hills Ward, Scottsdale Arizona North Stake

Mga Young Adult

Niini nga Seksyon

46 **Nganong ang Langitnong Amahan Gusto nga Maka-angkon Ko og Edukasyon**
Ni Gloria Cornelio

50 **Usa ka Butang mahitun-ogod sa Umaabut nga Mahimo Nakong Makontrolar**
Ni Laura Campaner

Sa Digital Lamang

Unsa ang Gikinahanglan aron Madawat ang Atong Matarung nga mga Tinguha
Ni Marc Deo Dela Cruz

Ang Unsaon, Ngano, Kanus-a, ug Asa sa Pagtigum og Kwarta

5 ka mga Kasiguroan niining usa ka Walay Kasiguroan nga Kalibutan
Ni Meg Yost

Pangitaa kini nga mga artikulo ug daghan pa:

- Diha sa Liahona.ChurchofJesusChrist.org
- Diha sa **Sinemana nga YA** (ubos sa mga Young Adult nga seksyon sa Gospel Library)

Pag-atubang sa Walay Kasiguroan nga Umaabut inubanan sa Hugot nga Pagtuo

Usa ko ka tigplano. Gusto kong masayud unsay mapaabut gikan sa matag adlaw, aron ako makaandam alang niini. Apan **unsaon nako pagpangandam alang sa umaabut** kon kini hilabihan ka layo ug dili sigurado?

Ang kinabuhi halapad kaayo. Adunay hilabihan ka daghang butang niini! Daghan kaayo ang mahimong mahitabo! Adunay daghan kaayo nga mahimo nakong buhaton! **Usahay ang mga posibilidad maghingapin.**

Adunay daghan nga mga butang nga akong gusto: kapikas, usa ka maa-yong trabaho, makapuyo gawas sa nasud, makatag-iya og usa ka iring, makasulat og usa ka nobela, makat-on og Russian . . . Apan nasayud usab ako nga mausab ang mga tinguha ug tumong. Ang mga prayoridad mabalhin.

Usa ka prayoridad nga kinahanglang dili gayud mabalhin mao ang **atong pasalig ngadto sa Dios ug sa Iyang plano**. Gamit sa Iyang panglantaw, **kita mahimong makamaniobra sa usa ka umaabut** nga puno sa mga pangutana tungod kay motabang Siya kanato sa pagpangita og mga tubag, usa ka lakang matag higayon. Kinahanglan lang gayud kita nga mohimo sa labing maayo nga pagpili kutob sa atong mahimo sa matag lakang.

Niini nga seksyon, ang mga young adult nagpaambit sa ilang mga personal nga mga kasinatian kon giunsa nila pagplano ang ilang kaugmaon uban sa tabang sa Langitnong Amahan ug **sa unsang paagi sila nagpadayon sa unahan inubanan sa hugot nga pagtuo** kon nag-atubang og daghan kaayong kawalay kasiguroan.

Kon kabahin na sa umaabut, adunay daghan kaayong mga pangutana, apan nagpasabut lang kana nga **adunay daghan kaayong potensyal**. Kita usab adunay potensyal—balaang potensyal nga mahimong sama sa atong Langitnong Amahan ug sa Iyang Anak, si Jesukristo.

Ug kana makapahimo sa atong kaugmaon nga mahimayaon.

Meg Yost

Ipaambit ang Imong Istorya

Aduna ka bay kasinatian nga ikapaambit? O gusto ka ba nga makakita og mga artikulo mahitungod sa pipila ka mga hilisgutan? Kon mao, gusto kaming makadungog gikan kanimo! Mahimo nimong isumiter ang imong artikulo o ang imong feedback diha sa Liahona.ChurchofJesusChrist.org.



Nganong ang Langitnong Amahan **Gusto nga Makaangkon Ko og Edukasyon**

Ni Gloria Cornelio

Bisan unsa ang inyong malarung nga mga tinguha, ang Langitnong Amahan mohatag og paagi alang kaninyo sa pagkab-ot niini.

Sukad sa gamay pa ko, gusto gayud kong mohimo sa akong Langitnong Amahan ug sa akong pamilya karon ug sa umaabut nga mapasigarbuhon. Gusto ko nga makaangkon sa tanang edukasyon kutob sa akong mahimo aron sa pagpalambo sa akong kaugalingon ug sa akong kinabuhi.

Sa akong nasud, sa Peru, mahal kaayo ang kalidad nga edukasyon ug, sa ubang dapit, wala gayud. Ang akong pamilya wala usab sa tanang mga kapanguhaan aron sa pagsuporta sa akong edukasyon. Apan ang akong mga ginikanan mitudlo kanako nga ang pagpaningkamot og maayo, pagkamakugihon, ug pagpangamuyo sa Langitnong Amahan alang sa pag-abag makatabang sa atong matarung nga mga tinguha nga mahimong matuman. Ug nagplano ko nga maningkamot og maayo.

Sa elementarya ug high school, nagkugi ko sa akong pag-eskwela aron mapalambo ang akong kaugalingon matag tuig. Human sa high school, nakasulod ko sa labing nindot nga unibersidad sa Peru ug nakadawat og maayong scholarship. Samtang anaa didto, nakigtrabaho ko og pipila ka mga organisasyon, lakip ang usa ka internship sa usa ka tibuok kalibutan nga organisasyon, ug adunay mga oportunidad sa pagpangulo sa daghan nga lain-laing matang sa mga proyekto.

Atol niana nga internship, akong gibati nga kini usa ka maayo kaayo nga oportunidad nga makabaton og edukasyon sa Iningles. Mao nga mihukom ko nga mobalhin ngadto sa Brigham Young University-Idaho. Gibati nako nga bug-at kini, apan nasayud ko nga ang Langitnong Amahan motabang kanako sa pagkab-ut niini nga tumong—kinahanglan lang ko mosalig Niya ug mobuhat sa akong bahin.





Ako mao ang unang internasyonal nga estudyante nga nakadawat og bachelor's degree pinaagi sa BYU-Pathway Worldwide.

Usa ka Kausaban sa mga Plano

Andam na ko nga moadto sa BYU-Idaho, apan atol sa proseso sa pag-aplay, mibati ko og kusog nga pag-aghat nga kinahanglan kong moserbisyo og misyon sa dili pa ko mobalhin didto. Busa misunod ko sa kabubut-on sa Langitnong Amahan ug gitawag nga moserbisyo sa Trujillo, Peru. Sa dihang miuli ko, nagplano ko nga mobalik sa unibersidad sa Peru tungod kay gibati nako nga paspas kong makakuha og degree didto. Apan, akong nahibaloan nga ang akong mga scholarship didto gibakwi tungod kay nabiyaaan nako ang akong pag-eskwela og sobra sa usa ka tuig aron moserbisyo sa akong misyon.

Nahugno ko ug nahisalaag. Wala ko kahibalo unsa ang buhaton. Wala ko kahibalo nganong mibati ko nga gi-aghat sa pagserbisyo og misyon kon kini nagpasabut nga mawala ang akong oportunidad nga makaangkon og degree sa kolehiyo.

Apan usa ka adlaw, nahinumduman nako ang akong presidente sa misyon nga nagsulti kanamo mahitungod sa BYU-Pathway Worldwide. Midapit siya kanamo sa pagpalambo sa among Iningles ug sa pagpadayon niini nga oportunidad dihang mibalik na kami sa panimalay—ug ako kining gibuhat!

Ang akong Panaw sa BYU-Pathway Worldwide

Nasayud ko nga ang pagsulti sa akong presidente sa misyon kanako kabahin sa BYU-Pathway dili sulagma lang. Sa dihang nagsugod ko sa programa sa Pathway, nagkinahanglan kini nga mobiyahe ko og hapit tulo ka oras matag semana aron makigkita sa akong grupo. Daghan ang akong gisakripisyo, apan nasayud ko nga ang pag-angkon og edukasyon importante kanako ug ngadto sa Ginoo. Ug kadto nga mga sakripisyo miresulta sa daghang mga panalangin.

Ang BYU-Pathway Worldwide mao ang tukma nga oportunidad nga akong gipangita. Kini naghatag kanako og access sa edukasyon sa usa ka barato nga kantidad, mitugot kanako nga makatrabaho, ug nakatabang nako nga makakuha og edukasyon sa Iningles. Ug gumikan niining tanan, nakakaplag ko og talagsaong mga higala kinsa miawhag nako nga magmaisugon ug magpadayon sa pagpaningkamot sa pagkab-ot sa akong mga tumong. Gibati nako nga mas lig-on sa espirituhanong paagi ug nahimong mas maayo nga disipulo ni Jesukristo.

Sa katapusan, ako mao ang unang internasyonal nga estudyante nga nakadawat og bachelor's degree pinaagi sa BYU-Pathway Worldwide. Ang edukasyon mibukas og talagsaong mga oportunidad alang kanako. Welfare ug self-reliance specialist na ako karon alang sa South America Northwest Area sa Simbahan, ug usa usab ako ka boluntaryo nga misyonaryo alang sa BYU-Pathway sa Peru. Nakita nako ang dako kaayo nga potensyal sa matag estudyante, ug giawhag nako sila sa pagpadayon sa unahan sama nga giawhag ko sa akong mga higala sa eskwelahan. Gumikan niini nga panaw, nakaamgo ko nga ang Langitnong Amahan kanunay naguban kanako sa tibuok nga kasinatian.

Ang Langitnong Amahan Gusto nga Molampus Kita

Ang akong panaw nakapalig-on sa akong pagpamatuod sa edukasyon. Ug nagplano gihapon ko nga magpadayon sa paglambo ug pagkat-on sa matag adlaw kutob sa akong mahimo. Anaa kita sa kalibutan aron mouswag, aron masulayan, aron molambo, aron sa pagpakita sa atong pagkamasulundon, ug sa pagsalig sa Manluluwas aron mahimong takus sa pagbalik ngadto sa atong Langitnong Amahan. Ngadto sa Dios, “tanang nga mga butang . . . mga espirituhanon”—lakip ang edukasyon (tan-awa sa Doktrina ug mga Pakigsaad 29:34). Ang atong tanan nga kasinatian ug ang kahibalo nga atong maangkon dinhi sa yuta makatabang kanato nga mahimong mas mahisama sa atong Manluluwas ug moandam kanato sa paghimo og mas maayong mga desisyon, aron mas maayong makaserbisyo dinhi sa kalibutan, ug aron mas mahimong maayo nga mga himan diha sa Iyang mga kamot.

Ang edukasyon naghatag og paagi aron makaangkon og kahibalo ug dayon sa pagbuhat, sa pagbarug sa kamatuoran ug katarung, ug sa pagpuyo og kinabuhi nga gusto sa atong Langitnong Amahan alang kanato—usa ka kinabuhi nga puno sa kalipay.

Nasayud ko nga ang atong Langitnong Amahan mopanalangin sa atong mga paningkamot, ilabi na kon ang tinguha sa atong kasingkasing mao ang mouswag ug moserbisyo Kaniya ug sa Iyang mga anak. Nasayud ko nga kon Siya mohatag sa Iyang mga anak og direksyon, “siya moandam og paagi alang kanila nga sila unta makatuman sa butang diin siya misugo kanila” (1 Nephi 3:7). Gusto Niya nga kita molampus!

Ang matag usa kanato kinahanglang mopahimulos sa matag oportunidad sa edukasyon ug pag-uswag nga gibutang sa Ginoo sa atong agianan, kon kini pinaagi man sa BYU-Pathway o uban pang oportunidad sa edukasyon. Nahigugma Siya kanato ug mogiya kanato kanunay. Gusto niya nga makat-on kita sa tanan kutob sa atong mahimo dinhi sa yuta. Ug nasayud ko nga makasinati kita og dagkong mga milagro samtang malipayon kita nga maningkamot ug magkugi ug mosalig sa Iyang giya. Nasayud ko nga nakasinati ko og dagkong mga milagro. ■



Si Gloria Cornelio gikan sa Lima, Peru. Madasigon siya mahitungod sa paghimo sa imposible nga posible, sa pagserbisyo sa uban ug sa pagpalambo og mga kinabuhi, sa pagtudlo, ug sa kanunay nga magkat-on kutob sa iyang mahimo, ilabi na mahitungod sa ubang kultura.

Aron mahibalo pa og dugang mahitungod sa BYU-Pathway Worldwide, adto sa byupathway.org.



EDUKASYON ALANG SA MAS MAAYONG KAUGMAON

Mga young adult nagpaambit kon sa unsang paagi nga ang pag-angkon og edukasyon mao ang yawe aron mobati nga mas malaumon mahitungod sa umaabut:

“Natawo ug nagdako ko sa Honduras—usa ka nasud nga puno sa mga oportunidad apan mahagiton ang paagi sa panginabuhì. Nagtubo ko nga naminaw sa mga istorya mahitungod kon sa unsang paagi ang akong mga katigulangan kanunay nangita og mga oportunidad aron matabangan ang sunod nga henerasyon nga mas mahimong maayo.

“Salamat sa mga sakripisyo sa akong mga ginikanan, ang akong igsoong lalaki ug ako nakaangkon sa posibleng labing maayong edukasyon. Nakat-unan nako nga ang edukasyon dili limitado sa usa ka degree sa kolehiyo. Ang edukasyon konektado ngadto sa langit.

“Kon kita mangandam, dili kita mahadlok. Ang edukasyon usa ka sugo gikan sa Langitnong Amahan, ug Siya mihatag kanato sa saad nga sanglit kita maghupot sa Iyang mga sugo kita mouswag sa yuta (tan-awa sa 2 Nephi 1:20). Ang edukasyon nakatabang kanako sa paghimo, pagtubo, ug pag-andam nga mahimong lig-on nga sumpay sa akong mga henerasyon, ug kini nagtugot kanako sa pagtabang sa uban nga mobuhat sa ingon.”

—Sara M. Barlow, Tegucigalpa, Honduras

“Ang edukasyon nakatabang kanako sa pag-ila ug pag-sabut sa akong tahas ug nahimutangan diha sa tawhanong pamilya, ug kana naghatag kanako og dakong kalipay.”

—Keriatu Kurene, Canterbury, New Zealand

“Ang edukasyon nakapahimo nako nga mobati nga sa akong umaabut nga trabaho, mahimo akong kahayag niini nga kalibutan ug mosangyaw sa ebanghelyo.”

—Claudio Acuña Thomas, Antofagasta, Chile

Usa ka Butang mahitungod sa Umaabut nga *Mahimo* Nakong Makontrolar

Ni Laura Campaner

Kadtong gamay nga tingog sa akong hunahuna malisud na gayud nga ibaliwala. Ania ako 28 anyos na, wala pa gihapon maminyo ug dili kaayo sigurado kon unsay gusto nakong buhaton sa propesyonal nga pagpanarbaho bisan tuod og duna koy maayong panarbaho isip usa ka labor ug delivery nga nars. Mibati ko nga daw matag aspeto sa akong kinabuhi wala milambo sa paagi nga gusto nako. Nagduha-duha ko sa mga pagpili sa kinabuhi ug wala masayud kon unsa nga dalan ang subayon. Mibati ko nga nahisalaag gayud.

Usa ka adlaw sa dihang mibati ko nga nawad-an og kadasig, usa ka higala kinsa wala na nako maistorya taud-taud na mitawag kanako. Sa dihang nangutana siya kon kumusta na ko, gipasabut nako kadtong tanan nga mga pagbati nga akong gipanglimbasugan. Naminaw siya ug dayon miingon, “OK, apan kumusta man ka sa espirituhonong paagi?”

“Ah oo, maayo kaayo,” mitubag ko diha-diha dayon. “Wala gayud ako sukad mibati nga mas duol sa Dios sa akong kinabuhi.”

Mitubag siya, “Nan dili nimo kinahanglan mabalaka mahitungod sa laing mga butang.”

Pagsalig sa Hingpit nga Plano sa Dios

Sukad sa pag-istoryahanay, nakaamgo ko og duha ka mga butang. Una, nakaamgo ko nga mapasalamaton kaayo ko nga adunay lig-on nga pagpamatuod sa gipahiuli nga ebanghelyo ug makahimo sa pagsunod sa mga sugo ug mobati nga konektado sa langit.

Ang mahimong makabarug sa kinaugalingong paningkamot sa espirituhonong paagi importante kaayo alang kanako, ug nagkat-on pa gihapon ko unsaon sa pagdawat og pagpadayag sa akong kinabuhi. Ang pag-ampo ug pagtuon sa mga kasulatan matag buntag mao ang duha ka yanong mga butang nga gibati nako nga nakahimo sa labing dakong kalainan sa akong abilidad sa pagdawat og personal nga pagpadayag. Gibati usab nako nga mas konektado sa langit kon maningkamot ko nga magmabination, mopuyo og himsog nga kinabuhi aron ang Espiritu mahimong kanunay nako nga kompanyon, mosunod sa mga sugo, ug sinsero nga maghinulsol.



Ikaduha, nakaamgo ko nga ang akong tubag sa pangutana sa akong higala dili gayud husto—nagtuo ko nga “hingpit” ko sa espirituhanon nga paagi, apan kinahanglan ko nga magbaton og dugang nga pagtuo, mohunong sa pagkabalaka kaayo, ug mosalig sa Dios aron sa pag-atiman sa mga butang nga dili nako makontrolar.

Bisan kon ang pipila ka aspeto sa akong kinabuhi wala maglambo sa paagi nga gusto nako, nasayud ko nga ang importanting butang mao ang paglihok inubanan sa hugot nga pagtuo ug sa pagpakita sa Dios nga mogamit ko sa akong kabubut-on aron sa paghimo og maayong mga pagpili. Nakat-unan nako nga kon ang kinabuhi dili mahitabo sa paagi nga akong gilauman, kini mao nga aron ako makakat-on ug molambo sa mga paagi nga ako dili unta makahimo.

Wala gayud ako naghunahuna nga sa akong ika-29 nga tuig nga akong makaplagan ang akong kaugalingon nga adunay mga pagduha-duha mahitungod sa akong pagpanarbaho ug sa sunod nga ang-ang sa akong kinabuhi. Gihapon, bisan pa sa kining tanan nga wala mahibaloi, ako adunay hingpit nga pagsalig nga ang Dios adunay hingpit nga plano alang kanako. Nasayud siya kon unsa gayud ang nanghitabo ug unsay akong kinahanglan, ug Siya kanunay moatiman kanako (tan-awa sa Mateo 6:28–34). Sama sa gitudlo ni Elder L. Todd Budge sa Seventy, “Lisud man kini masabut, ilabi na sa mga panahon sa atong mga kinabuhi kon ang mga unos kusog ug ang mga kadagatan baluron, mahupay kita nga masayud nga ang Dios sa Iyang walay kinutuban nga kaayo kanunayng nagpadpad kanato ngadto sa

panimalay.” (“Makanunayon ug Lig-on nga Pagsalig,” *Liahona*, Nob. 2019, 48).

Mas Mosalig; Dili Kaayo Mabalaka

Sa ubang mga adlaw ang kinabuhi bation nga lisud gayud kaayo, apan kon hunahunaon gayud nako kini, nasayud ko nga ako dili kinahanglan mabalaka. Hinay-hinay, nakaamgo ko nga kinahanglan nako nga mas mosalig sa Dios ug dili mabalaka kaayo mahitungod sa mga butang nga dili nako makontrolar. Ang usa ka butang nga mahimo nakong makontrolar mahitungod sa umaabut mao ang pagsalig sa Dios ug sa pagpaningkamot nga mas maduol ngadto Kaniya matag adlaw.

Kon mobati ko nga nahisalaag, adunay igong kahayag kanunay alang kanako aron sa pagpadayon sa unahan ngadto sa mga wala mahibaloi nga sirkumstansya sa kinabuhi. Ug hangtud nga ako magbaton og hugot nga pagtuo ug maghupot sa akong mga pakigsaad, hangtud nga ako mahinumdom sa akong tinuod nga pagkatawo isip anak nga babaye sa Langitnong mga Ginikanan ug mosulay sa makadaghan, ang mga butang mahitabo sa panahon ug sa paagi nga kini angay, ug mao kana ang importante gayud. ■



Si Laura Campaner nagdako sa habagatan sa France sa usa ka Katsila nga pamilya. Nagtrabaho siya isip usa ka midwife ug kanunay nangita og bag-ong mga panimpalad. Ganahan siya nga kuyog sa ubang mga tawo ug madani sa lain-laing mga kultura.

“Sa mga panahon sa atong mga kinabuhi kon ang mga unos kusog, . . . mahupay kita nga masayud nga ang Dios sa Iyang walay kinutuban nga kaayo kanunayng nagpadpad kanato ngadto sa panimalay.”

—Elder L. Todd Budge sa Seventy



Labaw sa tanan, ganahan kong magluto.

Mohimo ako og mga pastry, mga cupcake, gagmay nga mga cookie, karne ug kan-on nga mga putahe—bisan unsa, gayud! Ganahan usab ko nga motudlo og mga klase. Ganahan ko matag higayon nga dapiton ko sa pagtudlo og klase sa Young Women.

Mianhi ko sa AKK [Alang sa Kalig-on sa mga Kabatan-onan] nga komperensya tungod kay ako adunay usa ka pangutana nga gusto nakong matubag. Ako adunay usa ka scholarship sa pag-eskwela sa kolehiyo, apan gibati nako nga kinahanglan ko moserbisyo og misyon. Kon magmisyon ko, mawala ang akong scholarship. Apan kon magpabilin ko ug mahimong usa ka magtutudlo, makatrabaho ko ug makabayad sa akong pag-eskwela sa samang higayon. Atol sa AKK, usa ka sister ang naghigot mahitungod sa iyang patriyarkal nga panalangin. Nangandam ko sa pagdawat sa akong patriyarkal nga panalangin karon, ug naglaum ko nga kon madawat na nako kini, ako mas mahibalo kon unsay giplano sa Langitnong Amahan alang kanako. Ganahan ko sa mga programa sa kabatan-onan ug sa AKK tungod kay kini makapalig-on sa kabatan-onan. Tungod kay ang kamatuoran mao nga, nagkinahanglan kitang tanan og kalinaw.

Sa makadiyut human ako mabunyagi, ako mohunong sa pagsimba, dayon mobalik sa makadiyot, dayon mohunong pag-usab. Apan ang mga miyembro sa ward mibisita kanako ug midapit kanako sa pagbalik. Misulti sila kanako nga ang Simbahan ug ang mga miyembro gimingaw ug nagkinahanglan kanako. Mihukom ko nga mobalik, ug nahimo na ko nga aktibo sukad niadto. Nakaamgo ko kon unsa ka dako nako nga gikinahanglan ang Simbahan. Mahimo akong mag-ampo sa Langitnong Amahan ug mobati og maayo, ug makabati ko sa Espiritu. Ug busa ania ako!

Adriana T. (layo sa wala), 17 anyos,
Dominican Republic

NIINI NGA SEKSYON



54 Ang Akong Bag-ong, Karaan nga Pamilya

Ni Leonardo Conceição

56 Ang Pagpili sa Higpit ug Pig-ot Diha sa Lapad nga Dalan

Ni Elder Takashi Wada

60 Home Evening Object Lesson: Maayong Paggamit sa Inyong Panahon

Ni Natasha Andersen

62 Atong Luna

64 Ang Katapusang Pulong: Pagpamatuod ug Pagkakabig

Ni Elder David A. Bednar

65 Mga Tawo gikan sa Basahon ni Mormon: Amulek ug Alma

Ang Akong Bag-ong, Karaan nga Pamilya

Kon imo kining tugutan, walay butang nga dili mausab sa ebanghelyo.

Ni Leonardo Conceição

Ang mga misyonaryo naghupot og usa ka litrato. “Unsay imong nakita?” nangutana sila.

“Usa ka malipayon nga pamilya,” mitubag ko.

“Ang tanan ba nga pamilya malipayon?”

Milingo-lingo ko sa akong ulo. “Nakita ninyo ang akong pamilya,” mipasabut ko.

Nag-edad ko og 16 anyos nga nagpu-
yo sa Brazil, diin ako nagpuyo sa tibuok
nakong kinabuhi. Ang mga misyonaryo
nagtudlo kanako sa pipila ka semana, apan
walay usa sa akong pamilya ang gustong
maminaw. Nianang panahona, ang mga
misionaryo kasagaran makita ang akong
pamilya nga mag-away ug maglalis. Ang
akong pamilya ug sa mapahiyumon
nga pamilya diha sa litrato walay komon.

Usa sa mga elder miingon,
“Nan, basin ang bag-o nimong
pamilya dili ingon niini. Apan mahimo
ka nga magsugod og imong pamilya sa
umaabot nga lahi.”

Dihang nahuman na ang among
panag-istorya, mihangyo sila pag-usab
nako sa pag-ampo mahitungod sa
unsay among gitun-an. Sama sa naandan,
wala gayud ko mosaad sa pagbuhat sa
ingon. Nahimuot ko sa akong gibati

sa dihang mibisita ang mga misyonaryo,
ug ang ebanghelyo dunay kahulugan
nako. Apan nahadlok ko sa tubag nga
lagmit akong madawat. Kon ang ebanghelyo
tinuod, kinahanglan ko nga mohimo og
daghang kausaban.

Usa ka Bag-ong Pagpili

Sa pagbiya sa mga elder, dili ko
maka-pugong nga maghunahuna mahitungod
sa malipayon nga mga pamilya. Ang amoa
layo ra kaayo. Ang akong papa wala diha
sa akong kinabuhi. Ang akong relasyon sa
akong mama dili nindot. Si lola ang nag-
atiman kanamo, apan walay usa kanamo
nga nagtinil og batasan sama sa usa ka
pamilya sa paagi nga gitudlo sa mga

misionaryo. Walay usa namo ang mipada-
yag og gugma sa usag usa o gani migahin
og dakong panahon nga magkauban.

Sa tibuok nakong kinabuhi misaad ko
nga mamahimo kong usa ka maayong
amahan ugma damlag. Mahimo kong
ginikanan nga wala gayud nako maang-
kon. Apan samtang ang mga misyonaryo
nagtudlo kanako, misugod ko sa pagka-
amgo nga nagbuhat ko sa samang butang
nga gibuhat sa akong mga ginikanan
sa akong edad. Nagdugay ko sa gawas,
gibuhat unsay akong gusto, ug nagpaka-
buhi nga sama sa usa ka rebelde. Bisan
wala gituyo, akong gisubli ang samang
istorya.

Oras na para mangutana sa Dios.



Ang ebanghelyo nagpakita kanato kon unsaon sa pagpalambo sa atong mga pamilya, dili igsapayan unsay kahimtang sa atong pamilya.



Sa dihang sa katapusan nag-ampo ko, nadawat nako ang tubag nga dugay na nakong gilauman. Ang Simbahan tinuod! Karon oras na para mohimo og pagpili.

Usa ka Bag-ong Ako

Ang akong lola kinahanglan mohatag og pagtugot sa dili pa ko mabunyagan. Supak siya niini, apan namugos ko.

“Lola, hain nga Leonardo nga imong gusto?” Nangutana ko. “Ang usa kinsa mag-inom ug manigarilyo ug gabii na kaa-yong mouli sa balay? O gusto ba nimo kon si kinsa ako karon? Kini nga mga kausaban tungod sa ebanghelyo.”

Sa katapusan miuyon si lola, ug ako nabunyagan ug nakumpirmahan. Gikan nianang higayuna, usa ka butang nga makapainteresado ang nahitabo sa akong pamilya—usa ka butang nga wala nako hingpit nga maamguhi hangtud sa pipila ka mga tuig ang milabay.

Usa ka Bag-ong Pamilya

Sa wala pa ko mobiya alang sa akong misyon ngadto sa habagatang Brazil, si

Lola mitambong og komperensya sa stake uban nako. Pagkahuman nagpahigayon kami og usa ka gamay nga panagtigum sa pagpamatuod uban sa pamilya ug mga higala. Sa akong katingala, si Lola gustong mosulti.

“Sukad nga si Leonardo mipasakop sa inyong simbahan, ang akong pamilya nagsugod nga mahimong *tinuod* nga pamilya,” miingon siya. Siya milista dayon sa mga paagi nga ang among tibuk pamilya nagkasuod: Kami karon magkauban na. Gisugdan namo ang pag-ingon og “Gimahal ko kamo” sa usag usa, nga wala mahimo sukad. Ang pag-away og panaglalalis nahunong. Tinuod nga panaghigalaay milambo diha kanamong tanan. Aduna na kami mas daghang makaon og napanalanginan sa kaabunda sa ubang mga bahin.

Nakamatikud usab ako niining mga kausaban, apan wala ko nakaamgo nga ang panahon masumpay ngadto sa dihang gibunyagan ko.

“Dili man ko sakop sa inyong simbahan,” miingon siya, “apan ako usa ka higala sa inyong simbahan. Ug ako nasayud

nga ang among pamilya napanalanginan tungod sa pagpili ni Leonardo.”

Usa ka Bag-ong Pagsabut

Hapit dili ako makatuo niini! Ug bisan pa niana, si Lola misulti sa unsang paagi ang among pamilya nagkasuod, sa kalit nahinumdom ako sa mga litrato nga gipakita kanako sa mga misyonaryo kaniadto. Sa una, nagtuo ko nga ang bugtong paagi nga makabaton og usa ka malipayon nga pamilya mao ang akong pamilya sa umaabut.

Apan sayop ako. Ang akong kasamtangan nga pamilya malipayon! Kami nakakat-on sa paghigugma sa usag usa.

Tingali walay usa sa akong mga sakop sa pamilya ang moapil sa Simbahan niining kinabuha. Apan bisan kon sila dili, ako nasayud nga ang Dios mipanalangin na kanamo sa daghan kaayong paagi. Ang ebanghelyo ni Jesukristo nagpakita kanato kon unsaon sa pagpalambo ang atong mga pamilya, dili igsapayan unsay hitsura sa atong sitwasyon sa pamilya. ■

Ang tagsulat nagpuyo karon sa Utah, USA.

Ang pagpili sa
Higpit ug Pig-ot
diha sa **Lapad nga Dalan**



*Dihay duha ka dalan sa akong atubangan, ug nasayud ko nga
usa lang ang dalan aron masayran asa niini nga subayon.*




**Ni Elder
Takashi Wada**
Sa Seventy

Nagtubo ko sa Nagano, Japan, uban sa akong mga ginikanan. Ang relihiyon kabahin na sa tanan nga gimbuhaton sa akong pamilya. Ang akong amahan miluhod sa atubangan sa Buddhist nga altar matag buntag ug gabii. Wala nako hunahunaa ang Buddhismo isip usa ka relihiyon—usa kini ka pamaagi sa among pagpakabuhi. Mas sayon ra unta para nako sa pagpabilin nga Buddhist sa tibuok nakong kinabuhi, apan ang Dios nagmatuod kanako sa makadaghan nga ang sayon o popular nga dalan dili kanunay nga mao ang labing maayong dalan.

Libro o Balaan nga Basahon?

Isip usa ka tin-edyer, nanlimbasug ko og maayo sa akong pagkatawo. Naghunahuna ko nganong naa ko dinhi sa yuta ug kinsa ako angay nga mahimo. Sa dihang mga 13 anyos ko, ang prinsipal sa eskwelahan mihatag sa matag estudyante og kopya sa Bag-ong Tugon sa English ug Japanese nga mag-abay. “Dili kini alang sa relihiyosong mga katuyoan,” miingon siya. “Kini usa ka maayo kaayo nga hubad, busa gamita kini sa pagtuon og Iningles.” Dihang giablihan ko kini hinoon, naghatag kini og mga pakisayran sa kasulatan kon kamo mobati og kaguol, nagkinahanglan og mga tubag sa inyong mga pangutana, o nanglimbasug. Makasabut ko sa tanan niadto nga mga sitwasyon!

Nakabasa ko mahitungod ni Jesukristo. “Umari kanako, kamong tanan nga nabudlay ug nabug-atan, ug papahulayon ko kamo” (Mateo 11:28). “Magpas-an sa [inyong] krus, ug sumunod kanako” (Mateo 16:24). Ang mga pulong nakapadasig kanako bisan og ako dili hingpit nga nakasabut niini. Naghunahuna ko kon kinsa si Jesukristo ug unsay gipasabut sa pag-angkon Kaniya isip ang Manluluwas. Naghunahuna ko kon ako lang ba nga usa ang gibati og ingon nga koneksyon sa unsay angayng mahimong libro lamang.




Modagan o Mopabilin ug Maminaw?

Pipila ka tuig ang milabay nakahimamat ko og mga misyonaryo sa unang higayon. Ang akong mga ginikanan mipasidaan kanako mahitungod sa batan-ong mga Kristiyano kinsa naglibut sa pagsangyaw. Samtang naglakaw ko pauli, ang usa ka taas nga Amerikanong misyonaryo nga mipahiyom mipahunong nako. Wala ko kahibalo unsa ang buhaton. Nahadlok ko nga makig-istorya siya kabahin sa iyang simbahan. Kon gibuhat pa niya, tingali midagan nako sa laing dalan! Ang iya rang gipangutana kon asa ang post office. Gisultihan nako siya ug dayong pauli sa panimalay.

Dihang mibiya ko, aduna koy gibati. *Kon makita nako pag-usab, ang mga misyonaryo naghunahuna ko, makig-istorya ko kanila.*

Wala madugay human niana, gikahinagbo nako ang lahi nga paresan sa mga misyonaryo. Nakalitan ko nga ang Dios maminaw ug motubag sa pag-ampo sa usa ka bata nga sama nako, hangtud nga akong nabasa ang mahitungod ni Joseph Smith. Nakabasa ko diha sa Bag-ong Tugon nga mag-ampo kanunay, apan ang Dios nagpakita sa usa ka tawo? Ang pamati niini radikal ug husto. Imbis nga modagan, gitakda nako ang sabut aron sila magtudlo nako.





Mangatarungan o Diskubrihon ang Kamatuoran?

Usa ka bulan sa pakigtigum uban sa mga misyonaryo, ilaha akong gidapit sa pagpabunyag. Dili ko gusto nga balibaran sila, apan ako nagduha-duha sa pagbiya sa mga tradisyon sa akong mga ginikanan ug sa tanan nga naglibut kanako. Adunay duha ka dalan sa akong atubangan, ug nasayud ko nga adunay usa lamang ka paagi aron masayud asa niini—nga kinahanglan kong mag-ampo sama ni Joseph Smith. Nangutana ko sa Langitnong Amahan, sa pangalan ni Jesukristo, kon ang mga butang nga gitudlo sa mga misyonaryo kanako tinuod ba.

Sinugdanan kadto sa akong kausaban. Sukad niadto, nasayud ko mismo nga ang gipahiuli nga ebanghelyo tinuod. Walay tawo nga makakuha niana nga kahibalo gikan kanako. Nasayud ko kon hain nga dalan ang subayon, ug walay makapausab niana.

Daghan ko og mga pangutana sa dihang bata pa ko. Akong nakat-unan nga ako anak sa Dios, Siya nahigugma kanako, Siya adunay plano alang kanako, ug Siya gusto nga motubag sa akong mga pag-ampo. Kini nga kahibalo nakapausab sa akong tibuk panglantaw sa kinabuhi. Akong nakat-unan nga kinsa ako ug unsay akong gibuhath mahinungdanon.


Makighiusa o Mopalahi?

Sa wala pa ko nakat-on nga ako anak sa Dios, gusto ko nga masagol sa tanan. Nahadlok ko nga malahi. Apan human nga nakat-on ko nga ako anak sa Dios, nakaamgo ko nga makabarug ko, nga pwede akong molahi.

Ang pag-ampo ug pag-amgo nga ako anak sa Dios nakahatag kanako

og kaisug sa pagpasabut sa akong mga pagbati ngadto sa akong mga ginikanan, apan wala kaayo sila nakasabut. Nagtuo sila nga masinupakon ra kaayo ko ug dili pa hingkod sa paghimo og desisyon sa pagpabunyag. Sila naulaw nga ang ilang anak nga lalaki nagsunod niining katingad-an nga relihiyon kay sa ilang mga

tradisyon. Nasayud ko kon si kinsa ako ug unsay akong gusto, apan gusto usab ko nga mopasidungog sa akong mga ginikanan ug nanghinaut nga sila mopasidungog sa akong relihiyon.



Motahud sa Akong mga Ginikanan o Ibaliwala ang Pagpakabana Nila?

Akong gipasabut ang akong sitwasyon ngadto sa mga sister nga mga misyonaryo. Sila dunay ideya—mahimo sila nga moanhi ug makig-istorya sa akong mga ginikanan aron moarang-arang ang ilang gibati mahitungod niining relihiyon. Giingnan nako sila nga nabalaka ko nga ang akong mga ginikanan dili gusto nga makig-istorya nila. Dayon usa sa mga sister misugyot nga magdungan mi sa pagpuasa.


Sa dihang wala ko mikaon sa pamahaw, naguol ang akong mama. “Nganong dili ka mokaon?” nangutana siya. Akong gipasabut nga nagpuasa ko, ug kana nakapabalaka pa kaniya og dugang.

“Una miadto ka niining wala mailhi nga relihiyon, ug karon dili ka mokaon. Nabalaka ko. Nakalitan ko! Akong tawagon kadtong mga misyonaryo.”

Gitawag *gayud* niya ang mga sister, ug sa unsang paa-giha sila naimbitar ngadto sa among panimalay alang sa panihapon!

Nakaangkon kami og talagsaon nga panahon. Ang mga misyonaryo mitudlo sa akong mga ginikanan sa himno nga “Ako Anak sa Dios” (*Mga Himno*, nu. 189), ug kini among gikanta. Ang akong amahan ganahan niana. Human sa panihapon uban sa mga sister, walay usa sa akong mga ginikanan nga nabalaka mahitungod sa pag-adto nako sa simbahan. Ug akong gibati nga nakahimo ko sa pagtahud kanila pinaagi sa pagsunod sa ebanghelyo tungod kay kini naglangkob sa tanang butang nga sila mitudlo kanako. Naghunahuna ko kon ako mohigugma kanila sa igong gidugayon, ug motratar kanila sa igo nga pagtratar, sa katapusan sila mosabut. Mikabat og 35 ka tuig human sa akong bunyag, apan ang akong inahan nabunyagan ug misulod sa templo pipila ka tuig lang ang milabay!

Ang pagkasayud nga ako anak sa Dios nakaimpluwensya sa daghang mga desisyon sa akong kinabuhi. Nasayud usab ako nga kon kita mosunod sa Espiritu ug buhaton unsay gisugo sa Langitnong Amahan kanato, bisan kon malisud kini, Siya mopanalangin kanato. Kana sa kanunay mao ang labing maayo nga pagpili. ■



MAAYONG PAGGAMIT SA INYONG PANAHAON

*Kon inyong unahon ang Ginoo,
adunay lawak alang sa uban.*

Ni Natasha Andersen

Mga Magasin sa Simbahan

MGA MATERİYAL

- Usa ka sihag nga garapon
- Balas, graba, bugas, o gagmay nga mga bato
- Mas dagko nga mga bato (mga sama og gidak-on sa bola sa golf, o mga 5 cm tadlas)

PAGPANGANDAM: Sukda daan ang inyong mga materyales pinaagi sa pagbutang og una sa mas dagko nga mga bato sa garapon. Dungagi og igo lang nga balas (o graba, bugas, o gagmay nga mga bato) aron sa pagpuno sa garapon hangtud sa ibabaw. Mahimo ninyong uyogon ang garapon samtang magdugang kamo og balas aron mopuno kini sa mas daghang walay sulod nga espasyo. Karon ibutang ang mga bato ug balas ngadto sa managlahi nga mga sudlanan sa dili pa ninyo itudlo kini nga leksyon.

Pila ka lain-laing mga kalihokan ang nagkinahanglan sa inyong pagtagad matag adlaw? Kitang tanan adunay samang 24 ka oras nga igahin, apan ang paagi nga kita mopili sa paggamit niana nga panahon mao ang makahimo sa dakong kalainan!

Si Presidente Dallin H. Oaks, Unang Magtatambag sa Unang Kapangulohan, miingon: “Ang gidaghanon sa maayong mga butang nga atong mahimo misobra kaayo sa panahon nga magamit sa pagbuhat niini. Pipila sa mga

butang mas maayo kay sa maayo, ug kini mao ang mga butang nga nagkinahanglan nga unang hatagan og pagtagad sa atong kinabuhi. . . . Kinahanglan atong ipalabay ang ubang maayo nga mga butang aron sa pagpili sa uban nga mas maayo o labing maayo.”¹

Niini nga kalihokan, inyong ipakita unsay mahitabo kon himoon nato nga unang prayoridad ang buhat sa Ginoo.

1. PAGPUNO SA PANAHAON

Adunay daghang maayo nga mga kalihokan nga matinguha gamit ang atong panahon. Hangyog ang inyong pamilya sa pagpaambit sa pipila ka mga butang nga gigahinan nila sa ilang panahon sa pagbuhat matag adlaw.

Ipasabut nga ang garapon nagrepresentar sa panahon. Ang mga bato ug balas nagrepresentar sa lain-laing mga butang nga atong mahimo sa atong panahon: ang mas dagko nga mga bato nagrepresentar sa mga butang nga gisugo sa Ginoo nga unahon nato, sama sa pagtuon sa kasulatan, pagserbisyo, buhat sa templo ug family history, ug pagtambong sa simbahan, samtang ang



balas nagsimbolo sa ubang maayo nga mga kalihokan, sama sa paghimo og homework ug paggahin og panahon uban sa mga higala.

2. DILI HAN-AY ANG PAGHATAG OG PRAYORIDAD

Ibu-bu og una ang tanan nga balas sulod sa garapon, dayon ibutang ang dagko nga mga bato sa ibabaw. Kon inyong ibutang ang balas og una, wala nay igong espasyo alang sa tanang mas dagko nga mga bato—sama lang sa unsang paagi gihatagan nato og prayoridad ang ubang mga kalihokan kay sa mga butang nga gisugo sa Langit-nong Amahan nga buhaton nato, basin og wala na kitay igong panahon alang sa labing importante nga mga butang.

3. PAGESABUT SA IMPORTANSYA SA USA KA BULUHATON


Si Jesukristo misugo, “Ayaw pangita sa mga butang niini nga kalibutan apan paninguha kamo sa pagtukod og una sa gingharian sa Dios, ug sa pagpatunhay sa iyang pagkamatung,” (Ang Hubad ni Joseph Smith, Mateo 6:38 [sa ang Giya ngadto sa mga Kasulatan]). Hisguti kon unsaon ninyo paghan-ay sa inyong panahon pinaagi sa pagtinguha og *una* sa gingharian sa Dios.

Iyabo ang inyong garapon ug pagsugod og balik uban sa samang mga butang. Basin gusto motabang ang mga manghud. Ipabutang nila og una ang dagko nga mga bato ngadto sa garapon. Samtang inyong idugang ang balas pagkahuman, tan-awa kon sa unsang paagi kini mopuno sa sobra nga espasyo palibut sa dagko nga mga bato hangtud nga ang tanang balas masulod.

Pangutan-a ang inyong pamilya kon unsa ang ilang hunahuna sa gipasabut niini nga saad gikan ni Presidente Russell M. Nelson: “Santang kamo kanunay nga mohatag sa Ginoo og dako nga bahin sa inyong panahon, Siya mopilo-pilo sa nahibilin.”²

PAG-UNA SA GINOO

Kon magtinguha kita sa pagbuhat og *una* sa kabubuton sa Dios, tabangan kita Niya nga makabaton og igong panahon alang sa ubang gikinahanglan ug makapabayaw nga mga butang. Busa kon naglisud kamo sa pagpangita og igong panahon sa paghuman sa homework, pagpalambo sa inyong mga talento, o pagkuha sa katulog nga inyong gikinahanglan, pangutana sa Ginoo kon unsay inyong mahimo aron sa paghan-ay sa inyong panahon sumala sa iyang plano. Mag-uban sa paghimo og mga tumong isip usa ka pamilya sa pag-una sa buhat sa Ginoo—ug sa inyong relasyon uban Kaniya—matag adlaw. ■



MUBO NGA MGA SULAT

1. Dallin H. Oaks, “Maayo, Mas Maayo, Labing Maayo,” *Liahona*, Nob. 2007, 104, 107.
2. Russell M. Nelson, “Barug isip Tinuod nga mga Milenyal,” *Liahona*, Okt. 2016, 51.



USA KA MAKANUNAYON NGA PAG-AGHAT

USA KA ADLAW samtang naghimo sa misyonaryo nga buhat sa abugon nga kadalanan sa Kenya, ang akong kompanyon ug ako nakig-istorya sa usa ka babaye. Gidawat niya ang pamplet nga among gihatag niya apan misulti kanamo nga dili na pabalikon.

Paglabay sa pipila ka adlaw nakaplagan namo ang among kaugalingon diha nianang sama nga dalan, ug kami adunay usa ka pag-aghat sa pag-pangumusta kaniya pag-usab. Nangutana ko sa akong kaugalingon, “Nganong mobalik man kami nga misulti man siya kanamo nga dili na mobalik?” Apan misunod kami sa pag-aghat.

Natingala siya pag-abut namo didto apan miingon nga nalipay siya nga nakakita kanamo. Misugod kami sa pagtudlo og usa ka leksyon, apan wala madugay nahimo kining usa ka argumento. Ako ug ang akong kompanyon mitapos sa leksyon sa usa ka pag-ampo ug mibiya, nagka-uyon diha-diha dayon nga dili na mobalik. Apan sa sunod adlaw, aduna na *usab* kami kusog nga pag-aghat nga mobalik. Dili ko gusto nga mobalik, apan

ang akong kompanyon miingon nga kinahanglan kami maminaw sa Espiritu. Busa akong gisalikway ang akong mapasigarbuhong mga pagbati, ug kami mibalik. Pag-abut namo didto, nakalitan ko. Ang babaye ingon og lahi nga tawo. Ang iyang panagway nausab, ug andam siya nga maminaw sa unsay among isulti. Sa sunod namong pagbisita, nangutana siya kanamo kon kanus-a siya pwedeng mabunyagan.

Upat ka semana ang milabay, nabunyagan siya nga miyembro sa Ang Simbahan ni Jesukristo sa mga Santos sa Ulahing mga Adlaw. Human sa iyang kumpirmasyon, mihangup siya kanamo ug misulti kanamo nga mapasalamaton kaayo siya nga mibalik kami. Nakat-unan nako nga kita kinahanglang kanunay nga maminaw ug mobuhat sa mga pag-aghat. Giandam gayud sa Langitnong Amahan ang Iyang mga anak sa pag-dawat sa ebanghelyo, ug Siya mogamit kanatong tanan sa pagpangita kanila pinaagi sa Espiritu Santo. ■

Leaha M., KwaZulu-Natal, South Africa

UNSAON NAKO NGA MAS MAKASUNOD SA ESPIRITUHANONG MGA PAG-AGHAT?

1. **Pag-ampo alang sa giya.** Ang Ginoo mogiya kaninyo pinaagi sa Espiritu Santo (tan-awa sa Alma 37: 37).
2. **Pagmapainubsanon.** Ang kaaghub modapit sa Espiritu (tan-awa sa Moroni 8:26).
3. **Ayaw pagduha-duha.** Ang kinaiyanhon nga tawo motintal kaninyo sa pagsalikway o pagbaliwala sa mga pag-aghat (tan-awa sa Mosiah 3:19). Ayaw pagduha-duha kon moabut ang usa ka maayo nga hunahuna!
4. **Molihok diha-diha dayon.** Pagpasalig nga kanunay moresponde *diha-diha dayon* sa mga pag-aghat gikan sa Espiritu (tan-awa sa Thomas S. Monson, “The Spirit Giveth Life,” *Ensign*, Mayo 1985, 68–70).

ANG RASON SA MGA LAGDA

MAHINAMON KONG MOADTO sa komperensya sa kabatan-onan, apan dayon akong nahibaloan nga adunay daghan kaayong mga lagda—sama pananglit, walay mga cell phone ug dili mogawas nga mag-inusara. Ingon og ang mga hamtong kanunayng nagbantay kanamo. Apan nalingaw kaayo ko, nakahimo og daghang mga higala, nagtrabaho sa usa ka proyekto sa pagserbisyo, ug nagkat-on mahitungod sa ebanghelyo.

Atol sa miting sa pagpamatuod sa katapusang adlaw sa komperensya sa kabatan-onan, usa sa mga lider naghigot mahitungod kon unsa kadako ang iyang gugma kanamo, ang kabatan-onan sa stake.

Kon nahigugma ka namo, nganong aduna kami daghan kaayong mga restriksyon dinhi? Naghunahuna ko. Nianang sama nga higayon, ingon og makabasa siya sa akong hunahuna, mitubag siya sa akong pangutana.

Ang mga lider nagpahimutang og mga lagda, miingon siya, dili sa paghasol kanato apan alang sa atong kahilwasan. Sa dihang giingon niya kana, natandog ako sa Espiritu. Nasabtan nako nga ang Langitnong Amahan naghatag kanato og mga sugo alang sa samang rason. Dili kini sa paghasol kanato; kini makatabang kanato nga makabalik nga luwas ngadto Kaniya (tan-awa sa Doktrina ug mga Pakigsaad 82:2–9).

Ang Espiritu Santo mitandog kanako ug mitabang kanako nga masayud nga kini tinuod. ■

Serge P., Île-de-France, France



KANUS-A AKO MAKAPASAKOP SA SIMBAHAN?

NIADTONG MGA SINGKO anyos pa ko, ang akong amahan nawad-an og pagtuo ug nakahukom nga mobiya sa Simbahan. Lisud kaayo kadto, ilabi na sa dihang nag-otso anyos ko. Mahinamon kaayo ko nga mabunyagan, apan dayon miingon ang akong amahan nga dili. Gusto niya nga maghulat ko hangtud nga mas hingkod na ko aron masayud gayud ko nga gusto ko nga mopasalig. Ug sa ingon nagtan-aw ko samtang ang akong mga higala nabunyagan.

Nakahinumdom ko nga naglibug—kon ang Simbahan tinuod, nganong gipugngan man ko sa pagpabunyag? Isip usa ka tin-edyer, lisud kaayo kadto nga makita nga ang tanang mga batan-on moadto sa templo tungod kay gusto kaayo nakong moadto. Lisud ang dili makahimo sa pag-apil, apan kanunay akong nasayud nga makuha nako ang akong kahigayunan!

Niadtong Mayo 2019, sa katapusan ako nabunyagan sa edad nga 16. Nahinumdoman nako ang daghang mga kasinatian nga aduna ko sa pagbati sa hingpit nga kalipay sa ebanghelyo ug sa pagbaton og pagpamatuod. Usa kadto ka espesyal kaayo nga kasinatian, ug latas sa tanang kalisud nga akong naagian hangtud nianang adlaw, nasayud ko sa tibuok nakong kasingkasing nga ang ebanghelyo tinuod ug kanunay gayud. ■

Trinity C., Colorado, USA



Pagpamatuod ug Pagkakabig

Ni Elder David A. Bednar

Sa Korum sa Napulog Duha ka mga Apostoles

U sa ka importanteng leksyon bahin sa koneksyon sa pagpamatuod ug pagkakabig makita diha sa misyonaryo nga mga paningkamot sa mga anak ni Mosiah.

“Kutob sa nadala ngadto sa kahibalo sa kamatuoran, pinaagi sa pagsangyaw ni Ammon ug sa iyang mga kaigsoonan, sumala sa espiritu sa pagpadayag ug sa pagpanagna, ug sa gahum sa Dios nga nagbuhat og mga milagro diha kanila—oo, . . . ingon nga ang Ginoo buhi, kutob sa mga Lamanite nga mituo sa ilang pagsangyaw, ug nakabig ngadto sa Ginoo, wala gayud mobiya.

“Kay sila nahimo nga usa ka matarung nga mga katawhan; sila mihunong sa paggamit sa mga hinagiban sa ilang pagsukol, nga sila wala na makig-away batok sa Dios. . . .

“Karon, mao kini sila kinsa nakabig ngadto sa Ginoo” (Alma 23:6–8).

“Duha ka dagkong mga elemento ang gihulagway niining mga bersikulo: (1) *ang kahibalo sa kamatuoran*, nga mahubad isip pagpamatuod, ug (2) *nakabig ngadto sa Ginoo*, nga akong nasabtan nga pagkakabig ngadto sa Manluluwas ug sa Iyang ebanghelyo. Sa ingon, ang gamhanang kombinasyon sa pagpamatuod ug pagkakabig ngadto sa Ginoo nakahimo og kalig-on ug kamakanunayon ug nakahatag og espiritwal nga proteksyon.

Ang pagpamatuod espiritwal nga kahibalo sa kamatuoran nga naangkon pinaagi sa gahum sa Espiritu Santo. Ang padayon nga pagkakabig kanunay nga debosyon sa gipadayag nga kamatuoran nga atong nadawat—may kasingkasing nga andam ug alang sa matarung nga mga rason. Ang pagkasayud nga ang ebanghelyo tinuod mao ang kahulugan sa pagpamatuod. Ang padayon nga magmatinuoron sa ebanghelyo mao ang kahulugan sa pagkakabig. Kinahanglan kitang masayud nga ang ebanghelyo tinuod ug magmatinuoron sa ebanghelyo.

Ang pagpadaplin sa gihambin nga “mga hinagiban sa pagsukol” sama sa kahakog, garbo, ug kamasinupakon nagkinahanglan og labaw pa kay sa motuo ug masayud. Ang kombiksyon, pagpaubos, paghinulsol, ug pagnunot mag-una sa pagsalikway sa atong mga hinagiban sa pagsukol. Kamo ug ako nagtinir ba gihapon og mga hinagiban sa pagsukol nga nagpalayo nato nga makabig ngadto sa Ginoo? Kon mao, nan kinahanglan kitang maghinulsol karon.

Ako mosaad nga sa atong pagkasayud sa kamatuoran ug makabig ngadto sa Ginoo, magpabilin kitang lig-on ug makanunayon ug dili mobiya. ■

Gikan sa usa ka pakigpulong sa Oktubre 2012 nga kinatibuk-ang komperensya.

Amulek ug Alma



Sila
**gamhanan nga
misyonaryo**
nga mga kompanyon
kinsa mitudlo sa
ebanghelyo ngadto sa
daghang mga tawo.



Ang Dios
mihatag kanila
og gahum
aron sila
dili mapatay
o mabilanggo.



Si Amulek
nakabig human
ang usa ka anghel
misulti kaniya sa
**pagdawat sa
usa ka propeta**
(Alma) diha sa
iyang balay.



Si Alma
mitandi sa
**hugot nga
pagtuo sa
pulong sa Dios**
ngadto sa pagtanom
og usa ka binhi nga
motubo samtang
amumahon
nato kini.



Si Alma
nakabig human
ang usa ka anghel
misulti kaniya sa
**paghunong
sa paglaglag**
sa Simbahan sa Dios.

NABALAKA MAHITUNGOD SA UMAABUT?

Nag-atubang sa walay kasiguroan, ang mga young adult nagpaambit kon unsay ilang gihimo sa pagsalig sa Dios ug sa pag-andam alang sa umaabut.

44



KABATAN-ONAN

**ANG AKONG PAMILYA DILI MALIPAYON—
HANGTUD AKO MIPASAKOP SA SIMBAHAN**

54

OBJECT LESSON
[LEKSYON NGA MOGAMIT OG BUTANG]


MGA BATO UG MGA PRAYORIDAD

60

MGA GINIKANAN

TABANGI ANG MGA BATA NGA MAKASABUT NGA ANG ATONG MGA LAWAS KAY MGA TEMPLO

H4




ANG SIMBAHAN NI
JESUKRISTO
SA MGA SANTOS
SA ULAHING MGA ADLAW

4 02167 22853 0



CEBUANO

Higala



Si **ALMA**
nahimong usa ka
bantugan nga
misionaryo!
Mga Pahina H20-H23



Ni Presidente
Dallin H. Oaks

Unang Magtatambag sa
Unang Kapangulohan

Pagsunod sa mga Pioneer



Makausa naglakaw ako subay sa mga dalan diin ang unang mga pioneer sa Simbahan naglakaw padulong sa Walog sa Salt Lake. Mibati ko og kama-painubsanon nga nagsubay sa gilakwan sa mga pioneer. Apan dili kini sama ka importante sa paglakaw diin sila naglakaw kon dili mao ang pagsunod sama sa ilang pagpakabuhi.

Ang mga pioneer mipadayon sa unahan inubanan sa hugot nga pagtuo ngadto sa usa ka bag-o nga relihiyon, sa usa ka bag-ong yuta, ug usa ka bag-ong paagi sa paghimo sa mga butang. Misalig sila sa Dios.

Nagkinahanglan usab kita og **hugot nga pagtuo**.

Misunod sila sa unsay gipabuhat sa ilang mga lider ngadto nila. Kita kinahanglan usab nga **magmasulundon**.

Migamit sila sa ilang mga talento ug nagtinabangay sa pagtukod sa Zion. Kinahanglan usab kita nga **magkahiusa**.

Walay si bisan kinsa nga ilang gibiyaan. Ilang gisiguro ang pag-apil niadtong kinsa nagkalisud diha sa dalan. Kinahanglan usab kita nga **mopaapil**.

Mapasidunggan nato ang mga pioneer pinaagi sa pagsunod sa ilang mga ehemplo. ●

Gikuha gikan sa "Pagsunod sa mga Pioneer," Ensign, Nob. 1997, 72-74.

Mahimo Ko nga usa ka Pioneer

Si bisan kinsa nga mangulo sa agianan aron sa pagtabang nga makapahimo sa kinabuhi nga mas maayo alang sa ilang pamilya usa ka pioneer. Pangitaa ang inyong dalan subay sa maze. Ang pag-agi niining mga dalan, makapahimo nimo nga usa ka pioneer kon . . .

Sugod

Kon ako makakat-on og usa ka bag-ong butang.

Kon motabang ko sa pagsugod og usa ka maayo nga tradisyon.

Kon makabuhat ko og butang aron sa pagtukod sa akong mahangturong pamilya.

Kon magtudlo ko sa akong pamilya kabahin sa ebanghelyo.

Mahuman

Ang Pagpili ni Lila

Si Lila gusto nga mopili sa matarung.



Ni Carolina Marín

(Gibase sa usa ka tinuod nga istorya)

“*Ang Ginoo Naghatag Kanako og Templo*” (Songbook sa mga Bata, 73).

“Panahon na sa kasulatan!” Miingon si Lila.

Ganahan si Lila nga magbasa ngadto sa iyang manghud nga babaye, si Anika, ug sa iyang puya nga manghud nga lalaki, si Svetan. Sa dili madugay si Lila mabunyagan na! Aron maandam, gusto siya nga magbasa sa mga kasulatan sa kada adlaw.

Gipakli ni Lila ang storybook nga kasulatan sa unang pahina. Si Anika ug Svetan nagpunsisok paduol aron sila makakita sa mga litrato.

“Paminaw og maayo tungod kay mangutana ko ninyo inig kahuman,” miingon si Lila. Dayon gisugdan niya sa pagbasa ang unang kapitulo.

“Sa wala pa kita matawo, kita nabuhi na sa langit,” mibasa si Lila. “Kita wala pay mga lawas. Kita mga espiritu.”

Si Lila, Anika ug Svetan mitan-aw sa litrato sa mga tawo nga nagsul-ob og puti.

“Andam na alang sa inyong una nga pangutana?” Si Lila miatubang ni Anika. “Diin kamo gikan sa wala pa kamo matawo?”

Mipagapak si Anika. “Sa Langit!”

“Sakto kana,” miingon si Lila. “Ug diin gikan si Svetan?”

“Siya gikan usab sa langit,” miingon si Anika. Mikatawa si Svetan ug mibutang sa iyang kumo sa iyang baba. Nangatawa sila si Lila ug Anika. Si Svetan ang pinakacute nga nag-edad og usa ka tuig didto sa Argentina!

“Ang among tibuok pamilya nagagikan sa langit,” miingon si Lila. “Si Jesus usab. Siya mianhi aron sa pagtabang kanato aron kita makapuyo pag-usab uban sa Langitnong Amahan.” Si Lila mitudlo sa litrato ni Jesus diha sa pahina.

Human niya og basa, si Lila nagsige og hunahuna mahitungod sa unsa gayud kahay sama nga makauban sa pagpuyo si Jesus didto sa langit. Gusto siya nga mahisama Kaniya. Gusto siya nga kanunayng mopili sa matarung!

Sa pagkasunod nga adlaw sa eskwelahan, midaguok ang tiyan ni Lila samtang naghulat siya diha sa linya alang sa pamahaw. Hapit matagamtaman niya ang lami sa mga empanada samtang gibutang kini ni Señora Ruiz ngadto sa iyang plato. Lami kaayo ang kahumot niini!



Dayon giipisan ni Señora Ruiz ang tasa sa gatas. *Uh oh*, naghunahuna si Lila. Ang gatas mas brown tan-awon kay sa kasagaran. Usahay ang iyang eskwelahan magdu-gang og kape o tsa ngadto sa mga ilimnon.

“Aduna bay kape o tsa ang gatas karon?” Nangutana si Lila.

Giwara-wara ni Señora Ruiz iyang kamot. “Dyutay nga kape,” miingon siya. “Nga gani dili nimo matilawan.”

Naghunahuna si Lila sa makadiyot. Nahinumdom siya kon sa unsa niya ka gusto nga mahisama kang Jesus ug mopili sa matarung. Nasayud siya nga ang pag-inom og kape usa ka butang nga giingon sa mga propeta nga dili buhaton.

“Dili lang, salamat. Dili ko maggatas karon,” miingon si Lila. Mipahiyom siya ni Señora Ruiz. Dayon milingkod siya aron mokaon.

Nianang gabhiona, mitabang si Lila kang Papi sa paghugas sa mga plato diha sa kusina. Naghunahuna gihapon siya mahitungod sa istorya sa kasulatan. Naghu-nahuna usab siya mahitungod sa gatas.

“Papi?”

“Unsa man?” Miingon si Papi.

“Nganong gusto man sa Langitnong Amahan nga makabaton kita og mga lawas?”

Naghunahuna si Papi samtang nagwaswas og laing plato. “Nan, gihatagan kita Niya og mga lawas aron kita mamahimong sama Kaniya,” miingon siya. “Ang imong lawas mao ang panimalay alang sa imong espiritu. Mao kana ang atong pasabut kon moingon kita nga ang atong mga lawas nga templo.”

Mitando si Lila. Mikanta siya og usa ka awit mahitungod niana diha sa Primary usahay! “Mao nga ang Langitnong Amahan gusto nga atong ampingan ang atong mga lawas?”

“Mao gayud,” miingon si Papi.

“Karong adlaw sa eskwelahan, nagbutang sila og mga kape diha sa gatas,” miingon si Lila. “Wala ko moinom niini, bisan pa man. Nangingkamot ko sa pag-amping sa akong templo.”

“Mapasigarbuhon ko nimo,” miingon si Papi. Iyang gipahiran ang iyang mga kamot sa tualya ug gigakos si Lila.

Gigakos og hugot ni Lila si Papi. Nalipay siya sa pag-atiman sa lawas nga gihatag sa Langitnong Amahan kaniya. ●

Ang tagsulat nagpuyo sa Corrientes, Argentina.

Ang pamilya niining istorya nagpuyo sa Argentina. Basaha ang sunod nga artikulo aron makat-on mahitungod niini nga nasud.

Kumusta gikan sa Argentina!



Hi!
**Kami si Margo
ug Paolo.**

**Kuyugi
mi samtang
bisitahon
nato ang
Argentina!**




Ang mga *Empa-
nada* ilado nga
pagkaon sa
Argentina. Pas-
try kini nga puno
sa karneng baka,
mais, o prutas.
Yum!

Ang **Argentina** usa ka
nasud sa South America. Kini
labaw pa sa 2,000 ka milya
(3,219 km) sa gitawon. Sa
amihanan, init kaayo atol
sa ting-init. Sa habagatan,
adunay mikaging nga mga
glacier sa tibuok tuig!

Daghang makapaikag nga mga hayop ang
nagpuyo sa Argentina—mga jaguar, mga
condor, ug mga penguin!



Ang mga cowboy gitawag og
gauchos sa Argentina. Namuhi
sila og mga baka ug mga kabayo.



Daghang mga tawo ang mamalit og pagkaon sa merka-do. Kining bata nga lalaki nagtabang sa iyang amahan sa pagdala og usa ka *sandía* o pakwan.



Himamata ang pipila sa among mga higala gikan sa Argentina!



Sa dihang gipresentar ni Presidente Russell M. Nelson ang bag-ong programa sa mga tumong alang sa kabataan ug kabatan-onan, mihimo ko og mga tumong nga modagan, mahimong maayong higala, ug himoong mas maayo ang akong mga pag-ampo. Mipamatuod ko sa sakrament miting nga nasayud ko nga kon buhaton nako kini nga programa, ang Langitnong Amahan motabang kanako.

**Gonzalo L., 7 anyos,
Buenos Aires, Argentina**



Kon mobasa kita sa mga kasu-latan, makakat-on kita mahitu-ngod ni Jesukristo ug sa unsang paagi nahigugma Siya kanato. Nakatabang kana nako nga mahimong malipayon. Nasayud ko nga gimahal ko Niya.

**Emma L., 5 anyos,
Buenos Aires, Argentina**

**Taga-Argentina ka ba?
Sulati kami! Ganahan kaming
makadungog gikan kanimo.**

**Salamat
sa pagsuhid sa
Argentina uban namo.
Magkita-kita ta sa
sunod higayon!**

Ang Ushuaia mao ang usa sa labing duol nga mga dakbayan ngadto sa South Pole sa kalibutan! Dunay tulo ka mga ward niana nga dakbayan.



Kining bata nga babaye mibisita sa Córdoba Argentina Temple sa adlaw nga kini gipahinungod. Sa dili madugay ang Argentina aduna nay tulo ka mga templo!





Ang Gamay nga Karomata sa Pan

Ni Gayle Kinney-Cornelius

(Gibase sa usa ka tinuod nga istorya)

“Kon kamo anaa sa pag-alagad sa inyong mga isigkatawo kamo anaa lamang sa pag-alagad sa inyong Dios” (Mosiah 2:17).

Mibuka si Sammy sa iyang mga mata ug nanghuy-ab. Makasimhot siya og usa ka butang nga lamian.

Mmmm, si Papa naghimo og pan!

Naghunahuna ni Sammy.

Si Papa magluto og pan alang sa pamilya matag Sabado. Ganahan si Sammy motan-aw niya nga mokuha sa kagumkom nga tabonon nga mga tinapay gikan sa hudno. Kanunay ihatag ni Papa kang Sammy ang unang hiwa.

Apan dili Sabado karon, hunahuna ni Sammy. Nganong nagluto man si Papa?

Mibangon si Sammy ug miadto sa kusina. Nangutana siya ni Papa unsay nahitabo.

“Nakahinumdom ka unsa ang gihangyo sa atong bishop kanato sa pagbuhat?”

Nangutana si Papa.

Mitando ni Sammy.

“Mihangyo siya kanato sa pagtabang sa mga tawo. Ug gitabangan nako si Sister Martin nga dad-on ang iyang bag sa taas, nakahinumdom ka?”

“Maayo ang imong gibuhat,” miingon si Papa.

“Nag-ampo ko mahitungod kon unsaon nako nga

makatabang. Naka-ideya ko nga magluto og pan aron ipakigbahin.”

Mitan-aw si Sammy sa bintana sa hudno. Giihap niya ang mga piraso sa pan.

“Usa . . . duha . . . tulo . . . upat. “Kinsay imong tagaan sa pan?”

“Usa kana ka butang nga nagkinahanglan ko sa imong tabang,” miingon si Papa. “Adunay usa ka tinapay alang kang Sister Martin. Ug duha ka tinapay alang sa pamilya Miller. Kinsa man ang tagaan sa ikaupat nga tinapay?”

Naghunahuna si Sammy mahitungod niini.

“Unsa kaha kon si Mr. Lee?” Nangutana si Sammy. Nagpuyo si Mr. Lee sa ilang apartment building. Dili kaayo siya mogawas. Kasagaran motan-aw lang siya sa mga tawo gikan sa iyang bintana.

“Nindot kana nga ideya!” miingon si Papa.

Human naluto ang tinapay, mitabang si Sammy ni Papa sa pagputos sa pan. Dayon iyang gikuha iyang karomata. Gibutang nila ang mga tinapay sa sulod.

“Andam na gayud ang karomata sa pan nga modagan!” Miingon si Sammy.

Gitabangan ni Papa si Sammy sa pagguroy sa karomata. Nindot ug init ang gibati sa kasingkasing ni Sammy, sama sa pan nga ilang ipakigbahin! ●

Ang tagsulat nagpuyo sa Vermont, USA.



Managlahi apan Manag-uban

Ni Bethany Bartholomew
(Gibase sa usa ka tinuod nga istorya)



“Sa pagpasimba kanila sa bisan unsa nga paagi, asa, o unsa ang ilang buot simbahan” (Mga Artikulo sa Hugot nga Pagtuo 1:11).

Si Ellie ug ang iyang pamilya padulong nga mobisita sa ilang mga ig-agaw kinsa nagpuyo sa layo. Naghinam-hinam kaayo si Ellie! Wala na niya igkita ang iyang mga ig-agaw sa dugay nga panahon.

Sa wala pa ang pagbiyahe, ang mga ginikanan ni Ellie miingon nga gusto sila nga makig-istorya kabahin sa usa ka butang.

“Kon kami magkapundok uban sa pamilya, kami kanunayng molitok og mga pag-ampo atol sa pagpangalon. Ug usahay maghisgut mi mahitungod sa simbahan, dili ba?” Nangutana si Papa.

“Bitaw!” Miingon si Ellie.

“Aw, mahimong dunay diyutang kalahian kining biyahia,” miingon si Mama. “Ang imong iyaan ug uyoan wala na magsimba. Ug dili sila ganahan kon ang mga tawo maghisgut nila mahitungod niini.”

Nagmug-ot si Ellie. “Nganong dili man?”

“Wala ta makahibalo sa tanang rason,” miingon si Papa. “Apan pinangga kaayo ta nila. Nagtuo ko nga dili nila gustong makiglantugi nato o mopasakit sa atong mga pagbati. Busa nihangyo sila nato nga dili hisgutan ang mga butang kalabut sa simbahan diha nila.”

Mitando si Ellie.

“Makabasa gihapon ta sa atong mga kasulatan ug makaampo samtang anaa ta didto. Apan ato kining buhaton sa tago,” miingon si mama.



“Unya kon mangaon ta?” Nangutana ang igsoong babaye ni Ellie.

“Hulat lang ug atoa nang makita,” miingon si Mama. “Kon dili sila mag-ampo sa dili pa ta mangaon, ang kada usa nato mahimong molitok og pag-ampo diha sa atong kasingkasing.”

“OK,” miingon si Ellie. “Makahimo ko ana!”

Sa pagkasunod nga adlaw, ang pamilya ni Ellie misakay sa sakyanan. Nagbiyahe sila hangtud sa lawom nang gabii. Sa dihang miabut na gyud sila sa balay sa ilang mga ig-agaw, ang iyaan ug uyoan ni Ellie mitabang nila sa pagpagawas sa ilang mga bag diha sa sakyanan. Dayon ang tanan nangatulog na.

Pagkasunod buntag, si Ellie militok og pag-ampo sa wala pa moadto sa kusina aron sa pamahaw. Medyo

gibati siya og kakulba mahitungod sa pagpa-kigkita sa iyang pamilya. Apan ang iyang iyaan mitupad dayon niya uban sa iyang mainiton nga pahiyom.

“Ang uban namo moadto sa salon sa inyong ig-agaw inig ka taud-taud. Ganahan ka moadto?” nangutana siya ni Ellie.

“Usa ka tupihan sa buhok?” Nangutana si Ellie.

“Oo! Ikaw ug ang imong igsoong babaye mahimong magpagwapa sa buhok kon ganahan ka.”

Mipahiyom si Ellie ug mitando. Murag makalingaw na!

Human sa pamahaw, misakay sila og bus padulong sa salon. Si Ellie ganahan nga magtan-aw sa iyang ig-agaw nga nagtrabaho. Ang iyang mga tudlo magbalik-balik samtang siya misudlay ug misapid sa buhok. Pagkahuman sa tanang buhok, nag-fashion show kunohay sila diha sa atubangan sa espiho ug nangatawa sa bag-o nilang mga hitsura.

Pagkasunod adlaw, miulan og maayo. Mao nga ang tanan nakahukom nga magpuyo sa sulod ug magdula og mga board game. Si Ellie ug usa sa iyang mga ig-agaw magkauban kontra sa duha sa mga mas magulang nga mga lalaki. Nagsungogay sila sa usag usa samtang gipalumba ang ilang mga pisa libut sa board.

“Daug mi!” Misinggit si Ellie sa dihang iyang gibalhin ang iyang pisa ngadto sa katapusan sa board. Nag-apir silang tanan—bisan ang mas magulang nga mga ig-agaw, kinsa nagpakaaron ingnon nga gisaput nga napildi.

Human lang sa pipila ka adlaw, panahon na nga mamauli sa panimalay. Si Ellie misaka sa luyo sa sakyanan sa iyang pamilya, nadungog niya ang pagpanamilit sa iyang pamilya.

“Mingawon mi ninyo!”

“Balik unya pohon!”

“Gimahal kaayo mo namo!”

Mipahiyom si Ellie ug miwara-wara samtang miabante palayo ang ilang sakyanan. Nalingaw kaayo siya. Bisan kon mituo sila diha sa lahi nga mga butang, nahimo gihapon silang malipayon nga pamilya. ●


Ang tagsulat nagpuyo sa Georgia, USA.

Guntinga ug ipapilit, i-staple, o sumpaya kini nga mga pahina aron makahimo og libro!



ANG AKONG NAGKADAKO NGA HUGOT NGA PAGTUO


_____ Ngalan:



Diha sa Basahon ni Mormon, si Alma miingon nga ang hugot nga pagtuo sama sa usa ka binhi.



Motabang ko nga molambo ang akong hugot nga pagtuo diha ni Jesukristo pinaagi sa pag-ampo ug sa pagkamabination ngadto sa uban.




Samtang ang usa ka kahoy motubo, kini makahatag kanato og tam-is nga bunga.

2



Akong matisok ang akong kaugalingon nga binhi sa hugot nga pagtuo pinaagi sa pagpaminaw sa unsay gitudlo sa mga propeta ug mga kasulatan.

3



Ang usa ka binhi nagkinahanglan og tubig ug kahayag aron kini motubo.

6



Samtang molambo ang akong hugot nga pagtuo, makahatag kini og matam-is nga bunga sa akong kinabuhi.

7



Ipadayon nako sa pagtabang sa akong hugot nga pagtuo nga molambo. Ang Langitnong Amahan ug si Jesukristo nahigugma kanako!



**Ni Sister
Cristina B. Franco**
Ikaduhang Magtatambag
sa Kinatibuk-ang
Kapanguloan sa
Primary

Ang Sekreto nga Sagol



Ang Langitnong Amahan gusto nga moserbisyo kita sa uban. Ang akong magtutudlo sa Primary mao ang usa ka talagsaong ehemplo sa pagserbisyo. Sa dihang motambong kami sa Primary, si Sister Antonietti kanunay magdala og chocolate cake. Di gyud ko ganahan og chocolate cake! Ang tanan ganahan niini. Apan wala gayud ko mikaon niini.

Usa ka adlaw, nangutana siya nako, “Nganong dili man ka motilaw og gamay? Kini nga cake gihimo uban sa usa ka espesyal nga sagol.”

Miuyon ko sa pagtilaw niini. Ug tag-ana unsa? Giganahan ko niini!

Daghang katuigan ang milabay ang akong inahan misulti kanako unsa ang sekreto nga sagol ni Sister

Antonietti. “Si Sister Antonietti walay daghang kwarta,” miingon ang akong inahan. “Matag semana mopili siya tali sa pagbayad alang sa usa ka biyahe sa bus padulong sa Primary o sa pagpalit og mga sagol sa paghimo sa chocolate cake alang sa imong klase. Kanunay siya nga mipili sa chocolate cake. Busa imbis mosakay sa bus, molakaw siya og sobra sa duha ka milya [3 km], padulong ug pabalik, bisan unsa pa ang panahon.”

Ang sekreto nga sagol ni Sister Antonietti mao ang gugma nga aduna siya alang sa uban! ●

*Gikuha gikan sa “Ang Kalipay sa Dili Hinakog nga Pagserbisyo,”
Liahona, Nob. 2018, 55–57.*





Makasunod ako ni Jesukristo sa gagmay ug yano nga mga paagi.

(Tan-awa sa Alma 37:6.)

Ang Surprisa nga Tawag sa Misyon



Ni Lucy Stevenson

Mga Magasin sa Simbahan
(Gibase sa usa ka tinuod nga istorya)

Mipahiyom si Edwin Dharmaraju samtang siya migawas gikan sa airport ug ngadto sa kahayag sa adlaw. Makakita siya sa mga punoan sa palmera nga naglina sa kadalanan ug makasimhot sa mga lamas gikan sa duol nga merkada. Siya ug ang iyang asawa, si Elsie, nabalik na sa India! Nagpuyo sila kaniadto sa Samoa, apan karon nauli na usab sila.

Si Edwin ug Elsie wala lang mianhi aron mobisita. Gitawag sila sa pagserbisyo isip mga misyonaryo sa Ang Simbahan ni Jesukristo sa mga Santos sa Ulahing mga Adlaw. Mibati og gamayng kakulba si Martin. Apan nasayud siya nga ang Langitnong Amahan motabang kanila. Daghan na kaayo og natabang ang Langitnong Amahan kanila.

Si Edwin ug Elsie natawo didto sa India. Apan unang nakadungog si Edwin kabahin sa Simbahan samtang nag-eskwela sa Estados Unidos. Misimba siya didto og kausa. Mibasa gani siya sa Basahon ni Mormon. Apan sa dihang mipauli siya sa India, nakalimot siya sa Simbahan.

Pipila ka tuig ang milabay, si Edwin ug Elsie mibati nga kinahanglan nilang mobalhin ngadto sa Samoa. Si Edwin usa ka bug scientist, ug mikuha siya og trabaho sa isla nga naghimo og pagsiksik. Didto nahimamat nila ni Edwin ug Elsie ang mga misyonaryo. Sa dihang mibasa si Edwin pag-usab sa Basahon ni Mormon, mibati



siya og usa ka butang nga espesyal. Mibasa usab si Elsie sa Basahon ni Mormon. Mipili sila nga magpabunyag, uban sa ilang mga anak.

Human mipasakop sa Simbahan, ang labing gusto ni Edwin mao nga ang iyang pamilya didto sa India makakat-on sa ebanghelyo. Ang problema kay walay mga misyonaryo sa India nga magtudlo kanila! Misulat sila si Edwin ug Elsie ngadto sa punoang buhatan sa Simbahan sa paghangyo kanila sa pagpadala og mga misyonaryo sa India.

Ang sunod nga miabut mao ang usa ka dako nga surprisa. Si Presidente Spencer W. Kimball mitawag *kanila* sa pagserbisyo isip mga misyonaryo sa India!

Ug karon, ania na sila.

Ang ilang unang adtoan sa India mao ang balay sa igsoon nga lalaki ni Edwin. Ang mga ginikanan ug mga igsoon ni Edwin anaa didto usab. Diha-diha dayon, misugod sila si Edwin ug Elsie sa pagtudlo kanila. Ang ilang pamilya nalipay nga makakat-on sa ebanghelyo.

Pipila ka semana ang milabay, si Edwin ug ang iyang pamilya nagpundok palibut sa swimming pool sa nataran sa iyang igsoon nga lalaki. Ang pool gilimpyohan na, gipintalan, ug gipuno sa presko nga tubig. Ang tanan nagsul-ob og puti. Ang mga babaye nagsul-ob og nagbitay nga mga sari nga nagpatong ibabaw sa ilang mga abaga. Ang mga lalaki nagsul-ob og luag nga estilo sa Indian nga mga jacket ug karsones.

Mibarug si Edwin sa pool uban sa iyang amahan. “Samuel David,” miingon si Edwin, “ingon nga sinugo ni Jesukristo, ako mobunyag kanimo sa ngalan sa Amahan, ug sa Anak, ug sa Espiritu Santo.”

Nalipay si Edwin samtang gibunyagan niya ang iyang amahan. Gani mas nalipay siya sa dihang gibunyagan niya sunod ang iyang inahan. Sa pagtapos sa adlaw, nabunyagan ni Edwin ang 18 ka tawo!

Pagkasunod adlaw, misakay og tren sila si Edwin ug Elsie sulod sa unom ka oras. Mibisita sila og dugang nga mga sakop sa pamilya ug mitudlo kanila mahitungod sa ebanghelyo. Mibunyag si Edwin og upat pa sa iyang mga paryente sa duol nga sapa.

Sa katapusan, mibiyaye og 16 ka oras sakay sa tren sila si Edwin ug Elsie aron sa pagbisita sa mga ginikanan ni Elsie. Ang amahan ni Elsie usa ka lider sa laing simbahan. Wala siya mabunyagi, apan nagtuo siya nga ang Basahon ni Mormon usa ka maayo nga basahon. Mita-bang siya sa paghubad sa Basahon ni Mormon ngadto sa Telugu, usa sa mga pinulongan sa India.

Sa dihang nahuman sila si Edwin ug Elsie sa ilang misyon, aduna nay igong bag-ong mga miyembro aron magsugod sa usa sa unang mga branch sa Simbahan sa India! Malipayon sila si Edwin ug Elsie sa dihang mibalik sa Samoa. Mapasalamaton sila nga gipadala sila sa Langitnong Amahan sa usa ka misyon! ●



Nagserbisyo sila si Edwin ug Elsie Dharmaraju sa ilang misyon sa India niadtong 1978. Karon usa ka matahum nga templo ang gitukod didto!



*Wala pa ko sukad makahimo og dili
gayud maayo. Kinahanglan ba ko
nga maghinulsol gihapon?
—Nagduha-duha diha sa Udine*

Minahal nga Nagduhaduha,

Ang tanan kinahanglan maghinulsol, tungod kay walay usa nga hingpit! Ang paghinulsol mahimong yano lang sama sa pag-ampo sa Langitnong Amahan mahitungod kon kumusta ang imong adlaw ug sa pagsulti Kaniya kon sa unsa nga paagi nimo gusto nga mahimong mas maayo ugma. Mangayo kita Kaniya og kapasayloan kon kita nakabuhat og sayop, ug mopasaylo Siya kanato. Ang ubang mga tawo naghunahuna nga ang paghinulsol usa ka makahadlok nga butang. Apan kini usa ka malipayon nga butang! Ang paghinulsol usa ka gasa nga gihatag kanato ni Jesukristo aron kita makakat-on, motubo, mausab, ug mahimong mas sama Kaniya. Miingon si Presidente Nelson nga kinahanglang maghinulsol kita matag adlaw. Samtang inyong buhaton, kamo mobati og dugang nga kalinaw ug gahum sa inyong kinabuhi.

Uban sa gugma,
Ang *Higala*

Sulayi kini!

Sama sa kutsara nga gikuha ang paminta niini nga kalihokan, ang paghinulsol makahimo kanato nga limpyo gikan sa sayop nga mga pagpili nga atong mahimo matag adlaw—gamay o dako. Tungod ni Jesukristo ug sa Iyang Pag-ula, kitang tanan adunay oportunidad sa paghinulsol.

Magkinahanglan kamo og:



asin
itom nga paminta
plastik nga kutsara
tualya

1. Pagbutang og gamayng asin sa usa ka plato. Kini nagrepresentar kon sa unsang paagi kita putli ug limpyo sa dili pa kita makasala.

2. Isabud ang gamayng paminta ibabaw sa asin. Kini nagrepresentar sa sayop nga mga pagpili nga atong gihimo.

3. Karon kuhaa ang plastik nga kutsara ug ibagnos kini sa usa ka tualya.

4. Lihoka og hinay-hinay ang kutsara ibabaw sa asin ug paminta. Ang paminta mopilit ngadto sa kutsara! Sama kini nga gipasaylo kita kon kita maghinulsol.



Gamay ug Yano nga Puzzle

Sama sa Liahona nga migiya sa pamilya ni Lehi, ang yano nga mga butang makatabang kanato sa pagsulbad og dagkong mga problema (tan-awa sa Alma 37:6, 38–44).

Mahimo ba nga pangitaon ninyo ang matag usa sa mga piraso sa ubos diha sa puzzle?



Unsa ang gamay ug yano nga mga paagi nga kamo makasunod ni Jesus?

Si Alma nga Batan-on Naghinulsol

Ni Haley Yancey
Mga Magasin sa Simbahan




Si Alma anak sa propeta. Gihatagan siya og ngalan nga sama sa iyang amahan, apan wala siya motuo sa unsay gitudlo sa iyang amahan. Iyang gisultihan ang mga katawhan nga ang Simbahan dili tinuod.



Usa ka adlaw, ang anghel mipakita ni Alma.
Ang anghel misulti ni Alma sa paghinulsol.



Sulod sa tulo ka adlaw,
si Alma daw nahikatu-
log. Naghunahuna siya
mahitungod sa iyang
dautan nga mga pagpili.



Dayon nag-ampo si Alma aron mapasaylo. Ug siya
gipasaylo! Gibati niya ang gugma ni Jesukristo. Si
Alma nakamata ug nagtudlo sa uban mahitungod
kon giunsa siya pagluwas ni Jesus.




Ako makahinulsol kon ako makahimo og sayop nga pagpili.
Si Jesus kanunay anaa alang kanako. ●

Kamo makabasa mahitungod niini nga istorya diha sa Mosiah 27.

Si Alma Naghinulsol ug Misunod kang Jesus



Kon kamo nakahimo og sayop nga pagpili, unsay inyong buhaton?



Minahal nga mga Ginikanan,

Usahay dili kita mouyon sa ubang mga tawo. Apan kita mahimo giha-pon nga mohigugma kanila. Mahimo usab kita nga mopadayon sa unsay atong nahibaloan nga tinuod. Basaha ang istorya sa pahina H10 uban sa inyong mga anak ug maghisgot mahitungod niini nga mga pangutana:

Sa unsang paagi nga ang pamilya ni Ellie nagpakita og gugma?

Sa unsang paagi nga gituman sa pamilya ni Ellie nga mapabilin nga lig-on ang ilang hugot nga pagtuo?

Sa unsang paagi nga ang atong pamilya makapakita og gugma ngadto sa ubang tawo, bisan kon dili kita magkauyon?

Kitang tanan managlahi, apan ang matag tawo anak sa Dios!

Pagpaambit sa gugma,


Ang *Higala*

UNSAON SA PAGPADALA SA ARTWORK O KASINATIAN SA INYONG ANAK NGADTO SA *LIAHONA*

Adto sa liahona.ChurchofJesusChrist.org ug i-klik ang "Submit an Article or Feedback." O i-email kini kanamo sa liahona@ChurchofJesusChrist.org uban sa ngalan, edad, siyudad nga gipuy-an sa inyong anak, ug kini nga pamahayag sa pagtugot: "Ako, [isukip ang imong ngalan], mohatag og pagtugot sa Ang Simbahan ni Jesukristo sa mga Santos sa Ulahing mga Adlaw sa paggamit sa gisumiter sa akong anak diha sa mga magasin sa Simbahan, sa mga website sa Simbahan, ug sa mga platform sa social media, ug posible sa ubang mga materyal sa Simbahan." Mahinamon kaming maghulat nga makadungog gikan kanimo!

MGA SULOD

- H2** Gikan sa Unang Kapangulohan: Pagsunod sa mga Pioneer
- H4** Ang Pagpili ni Lila
- H6** Kumusta gikan sa Argentina!
- H8** Ang Gamayng Karwahe sa Pan
- H10** Managlahi apan Manag-uban
- H12** Ang Akong Nagkadako nga Hugot nga Pagtuo
- H14** Higala ngadto sa Higala: Ang Sekreto nga sagol
- H15** Maayo nga Ideya
- H16** Maisugon nga mga Ehempto: Ang Surpresa nga Mission Call
- H18** Unsay anaa sa Imong Hunahuna?
- H19** Makalingaw nga Buhaton: Gagmay ug Yano nga Puzzle
- H20** Mga Istorya sa Kasulatan: Si Alma nga Batan-on Naghinulsol
- H23** Koloranan nga Pahina: Si Alma Naghinulsol ug Misunod kang Jesus



**Pangitaa ang Liahona
nga gitago sa sulod!**

ANAA SA HIGALA NGA HAPIN
Paghulagway pinaagi ni Rebecca Sorge Jensen